


**TUDUKAN DO KOSIPAN
DOGMATIKS
ETIKA DOT ULUN KRISTIAN**


T. A. Forscher

1995
PCS Kudat



TUDUKAN DO KOSIPAN

**Panalahasan do nunu it onsi di kosipan
dot ulun Kristian**



SIONGGO IT INANTADON TOKOU? SIONGGO O RIKOTON TOKOU? NUNU O TOMOD DOT APASI TOKOU?

It ulun iadko kazu naku?

di sumuni

om sumurut

om humaba-ogi



I riniba

sumino

opodok-po

sumusu

mokipasi di molo-

hing dau



sumukod

ohijau

muvalai

musavo



om matai-ogi

orukung

lumoun

lumohing

masa sid tana

Asot elaan di riniba mangaharati do nunu o panangan do koposizan dot ongoulun. Baiko kolu-koluvon it ulun.

Varo momoros,

Ong osinang it ulun, retan do kisurupu.

Ong osusa it ulun retan do vangun-no dau

Ong matai it ulun, retan do pinonimpaan-no dau.

Varo momoros ong, Makan tokou om rumamai tokou diti, tu suvab matai-no.

Varo momoros ong, asot ontok diti koposizan, tu susaoni do rogon sampai pempatai mosi-rosi it ulun, ka.

Iti-no ot elaan tokou, Ong riniba a-milo-milo mokipapasi. Suvaiko it ongoulun Kristian om elaan-ogi dot.

I Kinoringan i minongurug o manahak di koposizan sid di tokou

I Yesus Kristus o manapul di tokou antad sid kosusaan om mangada di kasalaan om monori di kapatazan

om i Sundu do Kinoringan mangagazad di tokou sid ralan dot otopot om otulid.

Sabap ino, mokituduk tokou do kuran i kavazao om gama do Kinoringan it Ama om it Anak Yesus Kristus om i Sundu dot Osusi.

ISAI-KA O KAPANALAHAS DI KAVAZAO DO KINORINGAN?

Okonko i tokou riniba ot elo manalahas di kavazao do Kinoringan. Tu ong riniba baiko hovoron do mad ulun dot bolou di monuduk di kobuatano di mato dot adau.

I Kinoringan mintonon sid anavau it a-osonsob dot ulun. Topot iosido minokimot di tokou om minongimbulai di kobuatano dau. Varo tolu o vazaan do Kinembulazan do Kinoringan, ino-no

It Ongonabi

Iti-no i boros do
Kinoringan ka di
nabi

I Yesus Kristus

Ioku om i Ama,
nga
iso-no, ka di Yesus

It Ongorasul

Uripon-okoi, ka
dit ongorasul

I Kitab dot Osusi: Boros do Kinoringan sid riniba om Surat di Janji do Kinoringan sid riniba. Rontob sid Kitab dot Osusi o kematan tokou di Kinoringan i kapapasi.

Sid saralom do Kitab, Kinoringan o momoros:

Kondiri di Kinoringan mongimbulai di kobuatano dau om kavazao dau om kenginan dau.

Gulu-po sid ongoulun dot Israel, tu ioti-no dino o bansa di nipili dau.

Iri-ogi sid saralom di gama dit Anak Dau Yesus Kristus, i nakasampai sid riniba om nokoriniba sampai minonongobpinai di tokou.

Iri-ogi sid kabang dit ongorasul di sinumasi di Tuhan Yesus sid sokovia i it ongobansa..

Sokovia i iti nokosurat-no kavi sid Kitab dot Osusi. Sabap ino, iso o buuk nga aso do katalib di Kitab dot Osusi. Ino Kitab nasalin-no sid ongoduvo ribu o boros dit ongobansa, supaya kotutun it ongobansa do Kinoringan.

I Kitab dot Osusi

manarang di ralan do riniba muli sid Kinoringan.

I Kitab mongodim di tokou
I Kitab pouli di tokou
I Kitab posuhut di tokou
sid kopolisizian penlaid

I Boros-nu, ino-no titiu-ku, supaya amu-oku kotongkihal, tu anavau i ralan-ku, ka di Zabur 119.

Ogumu it ongobuuk, topot baiko ulun o kumiboros dot ongoulun sid ongobuuk dino. Ogumu it ongobuuk, topot baiko keloo do riniba.

Topot I Kitab dot Osusi, kondiri di Kinoringan kumiboros di riniba.

Ogumu it ongobuuk di kikelaan kavi. Topot i Kitab dot Osusi monuduk di kelaan do kopolisizian penlaid.

Sabap ino,

1. agazo o ginavo-ku dot elo-oku mamasa, supaya kabasa-oku do Kitab.
2. sid saralom di gama-ku mamasa, andaman-ku dot iti Kitab dot Osusi otopotko boros do Kinoringan, supaya amu-oku ounanangan do tanid o pongitungan.
3. Kopongoriat-oku mamasa do monikid`t adau, supaya amu-oku mangalai.
4. Ong mamasa-oku, minta dua-oku-po laid, tu mindamo di tudukan di Sundu dot Osusi. Ino-no o gama-ku minta dua, O Tuhan, boroso-no, tu ioku diti, uripon-nu di mongining, ka di gama-ku minta dua.

I TUDUKAN DI KITAB

Keso, I Kinoringan ino-no i Minongurug di sokoviai

I gama dau mongurug pengkaa dino

Adau keso it anavau om it otuvong

Adau koduvo it avan om i tana

Adau kotolu i tindal om rahat om totonomon

Adau kaapat it mato dot adau om vulan om korimbutuon

Adau kolimo it ongosada om it ongoombolog

Adau koonom it ongodupot om i riniba

Adau koturu it adau do pongintaranan

I kinotimpunaan, i Kinoringan minongurug dit avan om i tana (Kinot.1,1) Iti-no i ayat keso sid Kitab. Ino gama dau mongurug:

Aso-po do pomogunan ko i nunu-nopo, aso pakakas ko babaal. I boros do Kinoringan o minongurug di sokoviai om i sokoviai i gama dau dino banalko avantang!

Sokoviai i varo, antad kavi sid Kinoringan:

Ongopomogunan, ongoburul, ongonapu, ongorahat, ongobavang om vosoi ongosada, ongoombolog, ongodupot om ensanan i riniba om ioku-po.

Sabap ino, IOKU DITI DANG KINORINGAN.

Koduvo, I Kinoringan ino-no o Tuhan

Iosido o monguasa di sokoviai: kodung koboros i Tuhan, tantu kosunu.

Kodungko monuhu iosido, sino-no. (Zabur 33,9)

Iosido-no o kelo-no di sokoviai: Boros di Zabur 139: O Tuhan, ikau-no i mongimpuras dohon om kelo di kobuatano-ku. Mogom-oku antawa mingkat-oku, elaani. Ohorotizan-nu i pongitungan-ku dit osodu-ko.

Iosido o kosolot dit avan om i tana. Zabur 139: Siombo-nopo ilombuson-ku, kakali sid tinoguvangon-nu. Ong mindakod-oku sid avan, sori-koid avan. Modop-odop-oku sid naraka, nga sori-koid naraka. Tumulud-oku mozo do kosilahon, tu rumikot-oku sid rahat di banalko osodu, tantu sori-no i palad-nu mangagazad dohon om monunda dohon.

Iosido-no o sampai penlaid. Zabur 90: It amu-po nongurug it ongoburul om it amu-po nagama i tana om i riniba, Ikau-no o gulu banal om amu-ko tu-manus sampai penlaid.

Iosido-no ot a-emot do riniba. Kolobusan 33,20: Boros di Tuhan, Iti vuros-ku diti a-ku ipemot dikau. Tu isot ulun nga asot apasi di kemot dohon.

Iosido ot osusi om avanus: Yesaya 6,3: Boros dit ongomalaikat, Osusi, osusi, osusi i Tuhan di kinogumuai. Noponu-no do kovosihan i songpomogunan.

Iosido o Tuhan: Dolupo ong engin-oku do iosido o Tuhan-ku, minsanko amu-oku engin, nga aso bida: I Tuhan o kumavid dohon om mangahatul di koposizan-ku. Iosido dino aso kerad. Yesaya 44-45: Ioku-no diti o Tuhan, aso-no vokon. Aso Kinoringan dot tanidko ioku. Iso nga aso-no kerad dohon.

I RINIBA BANALKO ASO`T ELAAN MERAD DO KINORINGAN

Kotolu, I KINORINGAN INO-NO IT AMA

Osianan i Kinoringan:

iadko osianan i ginavo dit ama sid anganak dau, iadino o kobinsianan di Kinoringan it ongoulun di mongoguna dau.

Oruhunan i Kinoringan:

I gama do Kinoringan okonko isusui di kasalaan tokou. Amu sumusui iosido di karaatan tokou.

Alanut i Kinoringan:

Asamod om avasih i Tuhan. Alanut iosido om ogumu i koruhunan dau.

Avasih i Kinoringan

I Kinoringan mongumbasih di tokou

Atatap i Kinoringan

I kovosihan di Tuhan nga amu engkod sampai penlaid om i katatapo dau nga atantu sampai sid muaki.

Asamod i Kinoringan

It iso it anak dau sinuhu dau sumampai sid riniba, supaya it Anak dau dino o mananggung di sokovia i riniba. Pinensodu iosido dit anak dau, tu pensomok di sokovia i riniba.

I Kinoringan ama di tokou riniba:

Okonko baiko kokuasaan dot asavat om osundu dot a-kopitiim i riniba.

Okonko baiko kuasa iadko barat ko rahat ko gonit ko korud dot asot elaan tokou it inantadon om rikoton. Kinoringan, ino-no o harati, AMA DI TOKOU, tu ong i tokou anganak dau.

Iosido o manamod di tokou Iosido mogihim di tokou

Iosido mongodim di tokou Iosido pouli di tokou sid dau.

Sabap ino, atag dot i tokou di nanangan di samod do Kinoringan, it Ama tokou nga monuli dino samod dino sid saralom di gama tokou manamod do Kinoringan. Amu atag dot it anak di nasamadan dit ama amu manamod dit ama.

ISAI I RINIBA?

Keso, i riniba tana o ginama.

Boros di Kitab, Manjadi minanganu-no i Tuhan Kinoringan do tana dot osilou om inurug-ogi dau do riniba sampai tinohugi-no dau it odung do riniba dino do pinuhobo do kapasi om iri-ogi kipinuhobo-no do kapasi i riniba. (Kinot.2,7)

Sabap ikau dino (riniba), tana ot inurug-ku. Manjadi muli-ko vagu sid tana. (Kinot. 3,19)

Sabap it umul do riniba iadko sakot om iadko it ongovusak sid govuton. Tu ong otongus-no di barat dot alasu, atanus-no i vusak sampai aso-not andaman dau dino.

Ong i riniba kondiri, tanid o pongitungan. Vokon ong momoros dot,

I riniba merad do Kinoringan, tu i riniba nokelo-no kavi om kontutun-po.

Varo-no ong,

I riniba baiko iso gingis dot ongodupot. Aso bida tantu, tu mad kara sampai dupot ot inantadon om kinaranzatan diti riniba. Baiko mad kara do randavi i riniba, ka.

Topot ohorotizan tokou dot, i tokou ginama do Kinoringan, om soumul-umul tokou sid palad om tinaud do Kinoringan. Sabap ino, tumatap tokou sid tinoguvangon dau om monumbozo di hoturan di kinourugan om kenginan dau.

Koduvo, i riniba koluu do Kinoringan

Boros di Kitab:

Iadno keno o kinourugan di riniba koluu di kobuatano do Kinoringan. I buatan dau kondiri ot inanu dau do suntuan di riniba dot ondu om kusai ot inurug dau. (Kinot. 1,27)

I tinomod di kinourugan:

I tokou riniba inurug, tu apasi tokou sid piniizaan om samod do Kinoringan. I Kinoringan om i tokou riniba mitoguvang om miboros om mititimpa-timpa sampai misamod. Ong sukul tumuluk i riniba dino tomodon dau dino, koluu ioti do Kinoringan. Ong titalib ko titongkizad i riniba do Kinoringan, tantu orungoi-no i koluuvan sampai misinglovong-no i riniba.

I Kitab monuduk dot

NUNU I KENGINAN DO KINORINGAN

Boros di Tuhan Yesus,

Manamod-kou di Tuhan Kinoringan-nu dot iseso o ginavo-nu om iseso o koposizan-nu om iseso o pongitungan-nu om iseso o kakansangan-nuom manamod-kou dit ulun vokon meradko i kondiri dikou. Aso pinonuhuan vokon di katalib dino pinonuhuan.

I minangajadi i Kinoringan di turunan di Yakub do bansa dot Israel sid tanga do belantara, hiza di nakalabus ioti antad sid kinouripanan sid Masir, minanahak i Kinoringan sid dioti di hopod o pinonuhuan (Taurat). Ino hopod pinonuhuan monodiri di gama manamod do Kinoringan om it ulun vokon sid olumbatos o boros.

Ioku-no diti o Tuhan Kinoringan-nu

1. Kadan-ko-no sumamba do Tuhan do tanidko ioku.
Kinoringan manansanganu di tokou. Sabap ino engin iosido dot i tokou apasi ponong sid dau.
2. Kadan-ko-no mangagama do gambar antava barang i buatan iadko Kinoringan sampai kadan-ko-no sumamba do nunu-nopo i barang do iadino.
Engin i Kinoringan dot ensanan i pongitungan tokou sid dau.
3. Kadan-ko-no mangarait di ngaran di Tuhan Kinoringan-nu dit aso panangan.
Engin i Kinoringan dot i kabang om i boros tokou ensanan bahagi sid dau.
4. Hondomo-no dot osusi it adau do pongintaranan. Onom-not adau gumama-ko-om posurut di gamaon-nu. Topot it adau do koturu adau do pongintaranan, nakatanid-no bahagi di Tuhan Kinoringan-nu.
Engin i Kinoringan dot i tokou kotibang bahagi dau.
5. Pongohormat-no dit ama-nu om it idi-nu.
Engin i Kinoringan do mongohormat tokou dit ongomolohing.
6. Kadan-ko-no mamatai dot ulun.
Engin i Kinoringan do mongoguna tokou di koposizan dot ulun.
7. Kadan-ko-no kumiagai.
Engin i Kinoringan do mongoguna tokou di guvas om i piniizaan do minisavo
8. Kadan-ko-no manakau.
Engin i Kinoringan do mongoguna tokou di barang di dang koruhang

9. Kadan-ko-no monimbaal antawa sumasi dot araat.

Engin i Kinoringan dot mongoguna tokou di ngaran dot ulun.

10. Kadan-ko-no sumolon di valai dot ulun antawa i savo dot ulun antawa it uripon dot ulun antawa i karabau dot ulun antawa i nunu-nopo i dang ulun.

Engin i Kinoringan dot osusi i kenginan tokou minsanko sumirot sid dang koruhang nga amu-no.

I hopod pinonuhuan, ino-no o harati

Keso, Tanda di samod do Kinoringan. Tu kenginan do Kinoringan do gunaon tokou i nitahak do Kinoringan. Isai-ka o mongorongoi om mongohuzas ko mamabak di nitahak sid dau?

Koduvo, Mad tobon om mad parapad, supaya atabanan i ralan ponong sid kasalaan om karaatan om kobinasaan, om kiko-vidan tokou, supaya amu aratu om amu kotongkihal it ulun.

Kotolu, mad soromin, tu i pinonuhuan o mongimbulai di kavazao tokou, iadko sid soromin kosonsob tokou ong odungit i vuros.

KURAN O GAMA TOKOU SUMUHUT DI KENGINAN DO KINORINGAN?

I pinonuhuan do Kinoringan mongoduat di tokou dot,

1. Bana-banal-no-ka ko ensanan o ginavo tokou manamod di Tuhan Kinoringan?
2. Banal-no-ka ko i sokoviai i pongitungan-nu soumul-umul sumuhut di boros do Kinoringan sampai aso-no harapan vokon?
3. Kuran-ka di gama-nu mangarait di ngaran di Tuhan?
4. Kuran-ka di gama-nu mongoguna dit adau do pongintaranan?
5. Kuran-ka di gama-nu mongohormat dit ongomolohing-nu?
6. Aso-ka`t ulun dit ikasana-nu?
7. Atarang-no-ka i piniizaan dikou minisavo?
8. Otulid-ko-no-ka?
9. Otopot-no-ka i boros-nu?
10. Omomos-no-ka i kenginan-nu sid tinoguvangon dit ulun vokon?

Ong riniba mongitung: i tokou diti tantu sumuhut tokou kavi. Rontob-nopo, i gama tokou monimbang om monukat tanid-no, tu baiko kolu-koluvon om mamakai do ponukat, isuhut di kenginan kondiri. Ong it ulun vokon, oruhai mongintutun tokou di dau do karaatan. Topot ong i kondiri, mad amu-no kemot ko timbangan, retanko tanid ong i di tokou do gama, ka.

Tanid-no i timbang om pangaki do Kinoringan, tu atarang i gama dau. Minsanko isot obuk nga aso dit amu andaman dau.

Boros di Kitab dot Osusi:

Minsanko iso`t ulun nga aso`t abanal, iso nga aso-no. Aso kaharati, aso mogihim do Kinoringan. Sokovia i ioti tinumongkizad-no om ensanan ioti dot aso guna. Isot ulun nga asot elo monimbaru do katagan, minsanko iso nga aso. (Rom, 3,11-12)

Antad sid gama sumuhut di pinonuhuan dino isot ulun nga asot embanaran, sabap i pinonuhuan baiko pentalang di kasalaan. (Rom 3,20)

Monguro-ka?

Boros di Kitab: I tokou rinumaat sid kasalaan.

Nunu-ka o harati,

Kasalaan om nunu o kanangan do sala?

Ino-no o harati, nokotongkizad i kenginan do riniba sid kenginan do Kinoringan.

Kenginan do Kinoringan:

Iosido o Tuhan, i mananganak di riniba. Asamba iosido do riniba, oguna iosido do riniba.

Iosido o puun do kopudan om kopolosizan do riniba

Kenginan do riniba:

kalapas sid kuasa do Kinoringan, mokerad do Kinoringan, moki-sasavat i kondiri,

mogihim di kogunaan dau kondiri om mokiopud kondiri

Kasalaan, ino-no o harati:

Kineduan antad sid Kinoringan, kinotongkizadan sid Kinoringan, natagak om napalid, okonko rontob toriso-iso o hal dit amu atag, inoi nga ensanan i kobatano nokotongkizad sid kenginan do Kinoringan.

I kosungguvo do kasalaan:

It ulun di minogidu-no, osodu-no iosido antad sid Tuhan om Ama, aso-no bahazan dau om ihimon-no dau i tanid o pinokokingan om harapan. Kagi-po, i kasalaan pehas dit ongoulun sampai misasana om miooduw om misasaap-saap it ongoulun.

I kasalaan mongimbulai dit ongosala. Galatia 5,17-21

I kanangan di gama do guvas atalahas-no dot, Kaagazan, kensasakahan, kakanggahan, kasambayanan sid rogon, monindaat, sumana, mogoduw, mongivogu, rumodus, humungot, mioduw, misangod, miagil, rumusuk, magavuk om nunu-nopo i iadino.

I kasalaan mad tukad di pensibak dit ulun:

Kasalaan

rodus do Kinoringan

kapamatazan

kopihuhukuman

kobinasaan

Boros di Paulus: I suul do kasalaan, ino-no i kapatazan Rom 6,23.

Varo-po-ka ralan om vazaan muli sid Kinoringan?

Elo tokou-ka kondiri muli sid Kinoringan? Amu!

Nokosuhut tokou-no-ka di kenginan do Kinoringan? Amu!

Okonko pokurang tokou di kasalaan, gamko mangamung-nopo suvab-suvab.

Kapangapus tokou-no-ka di mad utang sid Kinoringan? Amu!

Amu nakalaba i gama tokou sumuhut, gam asarok do minsanko kosuhut, nga amu.

Boros di Paulus: Ioku diti banalko osian. Isai-no-ka o kapanapul dohon potindal antad sid guvas di dang kapatazan diti? (Rom 7,24) tu, ong mongohukum i Kinoringan, saribu gingis ot igili do panalaan, songlinsou nga aso't adahava dot ulun. (Ayub 9,3)

Minsanko i Yakub nokoponginud di kosopulan dau. Boros dau sid Kinot. 49,18: O Tuhan, monginud-oku di kotulungan-nu, ka.

Ino-no i vazaan do kosopulan om koulisan sid Kinoringan:

I hiza di kinoponulukan do janji sinuhu-no di Kinoringan it Anak dau, it inusu do riniba om nokosuvang-ogi sid hoturan do pinonuhuan, supaya iosido o monobus dit ongoulun, ka di Paulus. (Galatia 4,4-5)

Yesus Kristus o manapul di tokou

Lukas 19,10:

Nokorikot it Anak do riniba do mogihim om mongumbasih dit ulun di natagak, ka di Yesus sid di Zakai.

Yahya 14,6:

Boros di Yesus, ioku-no diti o ralan om katapatan om koposizan. Iso nga aso korikot sid Ama ong okonko maza iosido sid dohon.

Usuran Rasu'i 4:

Tantu aso kuasa vokon sitid pomogunan om aso ngaran do kikuasa bahagi di riniba, inoi nga iso-no, o ino-no i ngaran di Yesus i Minananggung om pinalabus di tokou antad sid karaatan,


It ulun Kristian humarap di koposizan dot ensanan antad sid gama di Yesus Kristus, i manapul om mamasi di riniba. Elaan-no dit ongoulun Kristian dot obinasa ioti, ong okonko osopulan di Tuhan Yesus.

Isai i Tuhan Yesus?

I kinosinaan di Yesus

I Yesus ino-no it anak do Kinoringan di kapapasi, iosido dino	
banalko riniba	om banalko Kinoringan. Ioku diti
i Yesus inusu di Mariam	gulu-po ko di Ibrahim om
i Yesus sinumukod	okonko antad-oku sid riniba, ka.
I Yesus vinitilon	ioku-no diti o kakanan om koposi-
	zan
i Yesus hinumuzan	ioku-no diti antad sid savat,ka
i Yesus hinumongkob	ioku-no o monguasa di sokoviai
i Yesus nopogos	ioku om i Ama iseso-no, ka
i Yesus minatai	ioku-no o mongogulian om mama-
	si, ka.

I YESUS O MONGONTOK DI TOKOU sampai iosido-no o sid pialatan do Kinoringan om i riniba



Yesus-no o bantaran do kinopigaganggazan tokou sid Kinoringan. Iosido rontob o kapanapul di tokou.

Manjadi, it ulun Kristian ohorotizan dot i Yesus Anak do Kinoringan. Pengkaa dino i kinosinaan di Tuhan Yesus.

Antad sid Sundu do Kinoringan, anak iosido di Mariam.

Nihabal dit ongomalaikat baiko ulun do manaud do domba o nakasaki.

Sinana di raja Herodis sinamba dit ongoulun do Majus

Nilingob sid ibu kota Yerusalim nilanta-no sid kampong do Baitlahim

Aso valai om asot intoronon sid tanga do ralan om sid kandang

Anak dot ulun mosikim minongovit di kovosihan do Kinoringan

Anak do Kinoringan di nakasampai do riniba om ulun dit kikhizon om aso ngaran.

Basao-no it ongotuturan di kinosinaan sid Lukas Fasal 1-2.

I gama di Yesus

Kuran-ka i gama di Yesus manapul di tokou?

Sid sokovia i kavazao, kobuatano om gagamaon, minonuduk i Yesus di ralan do kopoulosan.

Minangahabal iosido di kinotimpuunan di karajaan om hoturan do Kinoringan, dot iosido kondiri o tanda di kinotimpuunan dino.

Sid tudukan sid Burul mananarang i Yesus dit atag o vaza masi sid tinoguvangon do Kinoringan.

Minsomok sampai rumundun i Yesus dit ongoulun do mosikim om it ongoulun dot osusa. Tumorima iosido dit ongoulun dit aso ngaran om aso hak, nosunsub-no sid razat om ugama do Yahudi.

Kondiri di Yesus polombus di Samod do Kinoringan sid isai-nopo it ulun dit orukung om nasaan dot amu monodiri do bansa om bahazan, anak ko osukod, ondu ko kusai.

I vaza dau manarang om pemot sid ongoulun di kovosihan do Kinoringan,

isuhut di keloo om kavazao dot ulun. Ogumu it suriban dau, inanu sid gama dit ulun di mongumo, supaya oruhai rumamit it ulun di kogofoo di samod do Kinoringan.

I Kinapatazan di Yesus

Iri-ogi minatai i Yesus sid kazu do sangkap, rumundun dit ulun di kisa.

Orodusan tokou do Kinoringan, gima i kasalaan tokou di nokotongkizad om nasala sampai natagak om napalid tokou. Nonong tokou dara di hukuman do Kinoringan. Topot

RINIBA

inandus tokou di Kinoringan, gima i Kristus o minamanal di tokou

KINORINGAN

i Kinoringan o nakapanala dit ulun dit aso sala, ino-no i Yesus, tu ipamanal di tokou

I kinasangkapan di Yesus ino-no, tanda di kogofoo di kasalaan-ku om tanda di kogofoo di rodus do Kinoringan om tanda di kogofoo di samod dau.

Varo't a-ko piro o vaza di Kitab manarang di kinapatazan di Yesus, ino-no, retan dot:

- a) I tokou diti notobus-no dot agazo o horogo, minsanko agazo ot utang tokou
- b) i tokou nembanaran-no, minsanko araat i gama tokou
- c) i tokou nogontian-no, tu i Yesus o ginumanti di tokou dot iosido o nasala-no.
- d) i Yesus pinasamba di kondiri dau do iadko boli, tu monginsogit om mananus di hungot do Kinoringan

Iti-no kavi vaza posuntu om manarang di gama di Yesus dit aso tinganan tarangan om horotizon.

Boros di nabi Yesaya kananganko i Yesus i Minananggung 53,4-7:

Topot iosido-no, nasaadan dot oruol, i konong dara sid di tokou om norualan iosido sid kapagasan dot ong otopot-no, nga i tokou dara o momurimon. Ong i di tokou do kiroon, nohukuman iosido do Kinoringan sampai nabambang. Topot i di tokou do kasalaan ot nokopogos dau om minamambang dau, tu i koguvelo di tokou. I hukum di nipanala di tokou, iosido nanangan, tu mananggung di tokou. Nadamat om nasaadan iosido. Topot ong i tokou nolingasan.

I tokou diti mad domba di natagak sid butul, tu minaza sid dau om dau do ralan. Topot sinaan-no di Tuhan i nunu-nopo i di tokou do kavagatan.

I Kinogulianan di Yesus

Kuran i gama di Kinoringan mongompus di kosopulan tokou?

MINONGOGULIAN IOSIDO DI YESUS ANTAD SID ULUN DI MINA-TAI

Apasi vagu i Yesus, nosukap-no i lobong

I kinogulianan di Yesus antad sid ulun di minatai manarang dot,

Otopot i Yesus o monguasa di pentongkop do pomogunan

Otopot i Yesus o manapul di tokou, it ipat-ipat it ulun di mangasip

Otopot i Yesus manahak di koposizan penlaid

Otopot i Yesus mangapad om monunda di tokou

Matius 28,16: Boros di Yesus di nogulian iosido, Sokovia i kuasa, nakatahak kavi dit Ama-ku sid dohon.

Rom 8,39: Boros di Rasul Paulus, Olumbatos-no dot elaan-ku, okonko i kapatazan ko i koposizan, i malaikat ko i nunu-nopo i monguasa, i bianco ko i rumikot-ogi, ko it ongo kuasa dot akansang, i sid savat ko i sid sibak, antawa nunu-nopo songvinangun, iso nga aso kopotongkizad di tokou antad sid samod do Kinoringan, i nokembulai sid di Kristus Yesus.

It ulun Kristian humarap do notori-no di Yesus i sokovia i it ongo kuasa di nunu-nopo.

Basao i tuturan di kinogulianan di Yesus. (Matius 28; Markus 16; Lukas 24 om Yahya 20-21)

I Kinensavatan di Yesus Kristus

Siombo-no-ka i Tuhan Yesus?

Nokensavat-no iosido sid surga

**nokogom-no iosido ponong sid
vanan do Kinoringan**

YESUS KRISTUS O RAJA TOKOU RINIBA

I kinensavatan di Tuhan Yesus o minanantu dot,

Yesus Kristus o mangahatul do sompomogunan

Yesus Kristus o mongontok di tokou sid Ama sid surga

**Yesus Kristus o mangajamin di kosuvangan tokou sid karajaan do
Kinoringan**

**Yesus Kristus o miguli vagu sitid pomogunan do monuluk di hoturan do
Kinoringan**

I Yesus dino,

KONIHAB

BIANO SUVAB

SAMPAI PENLAID

I gulu diri

biano diti

i tohudi dino

sid kuasa kavi di Tuhan Yesus Kristus, i Minananggung di tokou riniba.

**Ibrani 13,8: Yesus Kristus amu sumimban, konihab om iti biano sampai
penlaid.**

**Basao i tuturan di kinensavatan di Yesus sid Usuran Rasul 1 om Lukas 24.
It ulun Kristian kumavid om humarap di kuasa di Yesus Kristus.**

I Kinendohuan di Sundu dot Osusi

I Sundu dot Osusi o momihot di kotonggungan tokou.

I Sundu dot Osusi, ino-no Sundu do Kinoringan om kuasa do Kinoringan di mizon sid ulun di mangasip.

Iadko i minyak nokosuvang sid
politaan om sinikit-ogi

I Sundu dot osusi nokosuvang sid
ulun om pakansang-no dit ulun

I SUNDU DOT OSUSI

mananus di kosusa-
an-ku

momihot di kosopu-
lan-ku

pembulai dit uva do
samod-ku

I kouvaan di Sundu, ino-no

SAMOD KOTOMON DO GINAVO KOPIOONDUSAN
KOLONUTAN KOVOSIHAN KATATAPAN KAMAMASAN
KOVONUSAN

Basao i tuturan di kinendohuan di Sundu dot Osusi sid Usuran Rasul F. 2

IT ULUN KRISTIAN GINAZAD DI Sundu dot osusi

Na sid kosipan dot ulun Kristian mongoho tokou do mangasip sid
Kinoringan it Ama, i minongurug dit avan om i Tana om

I Yesus Kristus it Anak do Kinoringan, i minananggung di tokou om
I Sundu do dot Osusi, ko Sundu do Kinoringan.

Ong tumiim tokou do koduzan dino kobuatano do Kinoringan dit aso tinganan tarangon om horotizon, pengkaa dino,

I Kinoringan om i boros om i Sundu dau, varo-no laid hiza di kinotimpunaan. Na i Yesus jinadi do boros do Kinoringan (Yahya 1,1) om i Sundu do Kinoringan, ino-no i kuasa di sumuvang sid ipat-ipat it ulun di mangasip sid Kinoringan, sampai mongogiang di ginavo dot ulun om paharati dit atag o gama sumuhut di kenginan do Kinoringan.

Ong okonko i Sundu do Kinoringan koluhung sid ginavo dot ulun, rumusod i rogon di nunu-nopo sambansa sid ginavo dot ulun sampai manarik dit ulun sid ongokobuatano om ongokenginan kondiri ko i hoturan dit koundango om ugama laid.

Ong agazad do rogon, ko i ginavo kondiri, atarik-no it ulun sid hoturan kondiri om karalazan om kenginan kondiri.

Ong agazad di Sundu do Kinoringan, iri-ogi varo kouvaan dot otopot.

Ogumu o vaza di minoniim manarang di retanko Tritunggal, Ama, Anak om Sundu, topot oruhai kalandu, retanko i Kinoringan varo tolu o kobuatano om tolu-no o rupa. Antad diri nakalandu i Muhammad mongitung dot it ongoulun Kristian sumamba sid tolu o Kinoringan. Kagi, i hiza diri varo-pot ulun di minangarait di Mariam dot Minaganak do Kinoringan. Ino dino kavi, pogoli-vong dot ulun.

Minsanko riniba, ong ulun, varo boros dau om varo kakansangan dau dot iri-no ko iri guvas om inan o mongimbulai di boros om kakansangan dau dit amu emot, bai ening om opurimon. Amu nakatanid i boros ko i kakansangan dot ulun, iri-no ko irit ulun. Ong otopot, minsanko ino bai vaza manarang di Kinoringan dit aso tinganan do tarangon om horotizon. I sokovia i it ongovaza manarang om mongintutun di kobuatano om kavazao do Kinoringan, aso tinganan om aso dahada.

Okonko i riniba o kadapat kumavid ko kumandai do Kinoringan, inoi nga i riniba dino sid palad do Kinoringan, do minsanko i boros di iadino, mamakai di buatan do riniba sid vaza manarang di kobuatano do Kinoringan. Tu ong otopot, amu elaan tokou do bana-banalko kupalad i Kinoringan ko kuran i kuasa om Sundu do Kinoringan kumavid di tokou, palad ko unturu, ko nunu-no-ka. Bai iti-no ot elaan tokou, otunda tokou om oontupat tokou di kuasa do Kinoringan. Sid hal dino, nonong-no i panarangan di Muhammad dot aso tinganan do manarang di Kinoringan iadko riniba sampai retanko i Kinoringan minaganak di Yesus do iadko i kusai potizan dot ondu.

Nunu o harati KOSIPAN?

Kolu-koluvon naku?

Amu

Mamanal-ka do tudukan-ka?

Amu

Tomod humarap naku?

Amu

Ino-no, i mangasip mavid-kavid di kotonggungan di Yesus Kristus iadko katarangan dot,

Ioku diti, i....., guvas om ginavo-ku, mizau-po ko minatai-oku-no, nga nasanganu-oku di Tuhan Yesus Kristus, i Minananggung dohon, tu i gima raha dau i minonobus dohon antad sid kasalaan om minanapul dohon antad sid kuasa do rogon sampai minamanal dohon, minsanko amu-oku abanal sid tinoguvangon do Kinoringan. Soumul-umul-oku otunda om ataud di Yesus Kristus, supaya apasi-oku bahagi di Tuhan, gima i Sundu dot Osusi.

Kasip-oku, ino-no o harati,

1. Atalahas sid dohon do nosusa-oku om noholian-oku om napalid-oku sid tinoguvangon do Kinoringan sampai apatut dot onong-oku di hungot om ira do Kinoringan.
2. Otutunan-ku dot i Yesus Kristus o minongimbulai di kaadaan do sala om i ralan muli sid Kinoringan sampai pinorikot sid riniba di karajaan do Kinoringan. Iosido o minanantu di koposizan vagu om i koposizan penlaid.
3. Opotutan-oku dot ioku diti dang Tuhan, sampai atag-no ong i kabang-ku om i ginavo-ku ensanan do mangarazou di Tuhan Kinoringan.

Sabap ino, it ulun Kristian, ino-no it ulun di kiginavo di nopusok do katamanan om kounsapatan sid Kinoringan.

Kuran-ka o gama-ku mangasip?

ino-no: Muli-oku sid Kinoringan:

Isai o mogihim di koposizan dau, iri-no ot atanus o koposizan. Topot isai-nopo o polingan i koposizan dau, sabap sumuhut dohon om i habal do kovosihan, ino-no o kemot di koposizan, ka di Yesus (Markus 8,35).

Tumolikud tokou-no sid kavazao laid, supaya kemumui tokou sid ralan ponong sid Kinoringan.

Kumavid-oku dot:

Anak-oku do Kinoringan: Isai-nopo i sinumamung di Yesus, ino-no o pinangkat dau do retan dot Anak do Kinoringan, ipat-ipat it ulun di nakasip sid ngaran dau. (Yahya 1,12) Kumapit tokou om mokipapasi tokou di Yesus.

Sumurut-oku sid kosusian:

Mindamo-oku dikou, gima i kobinsianan do Kinoringan, patahako-no i guvas dikou do parsambaan di mizau om osusi om ikozi do Kinoringan. (Rom 12,1)

I tokou posuvang sid kuasa do Kinoringan dit ipat-ipat i koburuo di guvas tokou, mato, tolingo, kabang, munung, dila, ivou, palad, longon, hakod, pongitungan, utok, ginavo, kenginan, kopolisan, ongakob, anganak, savo, molohing, valai, kabun, ringgit om gaji.

I gama mangasip, okonko tomod mangagama:

A-kadapat mongumba di gama mangasip iadko muvalai do boroson-no laid dot, Ong kokotu-no, tantu mangasip-oku sid Kinoringan, ka dara.

Kinoringan o mongimbulai do kosipan, pengrikot di ginavo-ku. Sabap engin i Kinoringan dot ensanan i riniba, nga mangasipi. Sabap ino, asot sangkut pavazaan do riniba, ko a-elo-oku mangasip, ka.

Atag dot ipat-ipat it ulun Kristian sumasi dot:

Topot ioku diti, suvaiko osodia i ginavo-ku om kasip-oku-ogi. Suvaiko gumamit-oku di Kristus, kagi-po, mokigamit-oku dau. Bang okonko iadino o gama-ku, tantu mad a-engin-oku mangasip. Sid Markus 9,24 momoros it ama dit huhumadan, Kasip-oku-no diti, tulungai-no do posipo-no iti ginavo-ku dit asazou, ka.

I Gorija, i piumpugan di dang Tuhan

Nunu o harati gorija?

I gorija, ino-no i bansa do Kinoringan sid tanga do rimba. Sokoviai ko it ongoulun di mangasip, nga mizo sid gorija. I gorija ino-no i guvas di Kristus. I Tuhan Yesus ot ulu di guvas dino. I Tuhan Yesus o mangahatul om manaud di gorija.

Siombo-ka i gorija?

I gorija jumadi siombo-nopo varot ulun miuumpug om kaharati dot, I Yesus Kristus o Tuhan dioti sampai sumasi di Tuhan sid tanga do razat om mongohormat di Yesus dot iseso o ginavo om pongitungan.

Boros di Yesus, Siombo-nopo ong varo duvo ko tolu ot ulun di miuumpug sid saralom di ngaran-ku, sino-okunod pialatan dioti dino, ka. (Matius 18,20)

Ino-no o kongkod do gorija:

sid saralom di tudukan ening dit ulun dit osipan do gorija om i vaza sumuhut om mongusaha di kenginan do Kinoringan.
sid saralom di kopodsuan mamung it ulun sid gorija.
sid saralom di poginakanan di Tuhan Yesus mizo it ongoulun Kristian sid gorija.

It ulun Kristian amu mopud dot iseso iosido, inoi nga suvai nakamung iosido sid gorija di Yesus Kristus i nokotongkop do sompomogunan.

I gorija di Kristus amu engat o volit om rontob do boros ko bansa ko tasantanid-tanid o kulit om vuros, tu i piumpugan di dang Tuhan ino-no o Bansa dot vagu.

It ongotanda di boros do Kinoringan o momihot om manatap di kosipan dot ulun. Ong bai it ongotolingo o nokening, amu-po kosondot. Iti-no o sabap do varo-po tanda di nakamung it ulun sid gorija, ino-no i kopomoduan om i poginakanan di Yesus.

I KOPOMODSUAN

Ong i tanda: **Vaig**

Ong i suhu:

Pamanau-kou-no, jodizo-no dikou do koruhang-ku i sokovia i it ongobansa. Podsuo-no dikou ioti sid ngaran dit Ama om it Anak om i Sundu dot Osusi sampai tudukai-no dikou ioti sumuhut di sokovia i i nimuhun-ku sid dikou (Matius 28,18-19)

Ong i harati:

Iadko i vaig momoug dit asakau, i raha di Yesus o momoug di karaatan tokou. Ino vaig dino tanda di kinapatazan di Yesus. Ong kotonlong sid vaig, matai it ulun, ino-no it ulun laid om iri-ogi tumindal om masi it ulun di vangun vagu. Iadko i karabau ko it uripon natandaan di sanganu, i Kinoringan o mananda dit ulun sid saralom di kopomodsuan, dot iti-no o harati, Ikau diti, ioku-no o sanganu, ka di Kinoringan.

Ong i vaza:

Aso bida, ipihid o vaig ko kotonlong sid botung. Sabap ensanan i rahat do Kina Selatan amu miuma do mongohugus di bai iso o sala dot ulun. I bai sontihi i vaig di kosondot sid ulu dot ulun, nga tanda-no di gama do Kinoringan monimbaru di guvas om ginavo dot ulun. Atagal do kogumuai do boloji ko bavang om botung. Sabap okono i vaig o mangagama.

Ong anak do ragang-po opodsuo antad sid kenginan do molohing, i molohing mindamo do pamung dit anak sid gorija di Kristus sampai mangakun ioti do mangagazad dit anak sid di Yesus Kristus. Sumukod-po it anak, mongoho-no iosido. Topot okonko i gama dit ulun mongoho o keso o guna di kopomod-suan, inoi nga i janji do Kinoringan sid ulun dino.

I kopomodsuan dino o tanda di boros do Kinoringan di manalahas om mamanal di Habal do Kovosihan, ino-no

I Kinoringan, i Minongurug om manguasa di sokovia i, ino-no it Ama tokou.

I Yesus Kristus, it Anak do Kinoringan, i nakasangkap om nogulian bahagi di tokou o mongodim om manapul di tokou antad sid karaatan.

I Sundu dot Osusi mizon sid di tokou om monimbaru di kopolisan tokou, supaya i tokou ajadi dot ulun di sumuhut di kenginan do Kinoringan.

I POGINAKANAN DI TUHAN YESUS

Ong i tanda:

kakanan om inumon (roti om anggul) ombo it oubasan sid tempat

Ong i suhu:

Onuvo-neti om akano-no. Iti-no i guvas-ku, ka. Onuvo-neti om inumo-no.

Iti-no i raha-ku di pangajanji, i nokouza bahagi di kinogumuan.

Ong i harati:

I poginakanan di Tuhan Yesus, ino-no o pangahandaman di poginakanan di Yesus dit insan-ogi i sodop di kinojuvaran dau. I makan om minum, kezo tokou sid gama di Yesus di sodop diri, i minongorubat iosido di guvas om i raha dau, supaya kedu tokou antad sid karaatan. Okonko baiko i ginavo ot ohorotizan, gamko i dila om i tatalanan tokou o kopurimon dot atantu itahak di Yesus bahagi di tokou.

Ong i vaza:

Okonko i roti ko ginazau, vaig dot anggul ko oren ot kiharati, inoi nga i Yesus pezo di tokou om pelang di tokou sid gama dau pakan om pamung di tokou sid piniizaan dau.

I poginakanan di Tuhan Yesus,

a) ino-no i harapan tokou do monginakan tokou vagu milang di Tuhan sid karajaan do Kinoringan. Sabap ino, i poginakanan di Tuhan mad kokorui tokou di pakansang di tokou sid tanga do ralan.

b) ino-no tanda di piniizaan di Tuhan om i tokou. Minsanko mad neduan tokou di Tuhan, sid saralom di poginakanan kondiri di Tuhan tumanga di tokou, pakan om penum om pezo di tokou sid gama dau.

c) ino-no o tanda di piniizaan di piumpugan dot ulun Kristian. Sid tinoguvangan di Tuhan mizo it ongoulun di nopiduvo o ginavo. Kondiri di Tuhan o popionong dit ongoginavo dot ulun, supaya mizo vagu sampai miandus-no.

Sabap ino, It ulun Kristian ozi milang sid poginakanan di Tuhan Yesus. Varo kosusaan do gorija di Kristus sampai biano, ino-no, i meja di Kristus di popezo di tokou, kakali nalapak-no om nabahagi-no. Tu i RC ko i Gorija Ortodox kakali amu mangakun do milang tokou dioti sid poginakanan di Tuhan Yesus, retanko amu nokonong i kosipan tokou ong sid dioti dot ohorotizan di kogunaan di poginakanan di Yesus. Iti-no i kodolikatan dit elaan o dahada.

I Harapan tokou

Nunu-ka i kosungguvon om rikoton tokou?

I KARAJAAN DO KINORINGAN

Rumikot vagu i Yesus Kristus om mongim-bulai sampai monuluk di hoturan di karajaan do Kinoringan.	Iri-ogi ogulian it ongoulun minatai sampai ensanan i riniba di mizau ko minatai-no, kasamung kavi di Tuhan.	Iri-ogi mongohukum-no i Tuhan om monodiri dit avantang om it araat, isuhut di suriban sid Matius 25,11-46.
--	--	---

Iri-ogi mimbulai-no it Avan vagu om pomogunan vagu om i riniba vagu om i vinangun vagu. Ino-no i retan do KOPOSIZAN PENLAID.

It ongoulun Kristian mongindazou di harapan dino, sumusui di pomintaan dua di Yesus dot,

Sabap ikau-no o sanganu di karajaan om i kekuasaan om i kohormatan sampai penlaid.

Sinod karajaan dino atandas dot,

Kopioondusan


Kolobusan

Kobebasan

Kabanaran om

Kosusian.

IT ONGOULUN KRISTIAN MINUD DI KORIKATAN VAGU DO KINORINGAN



DOGMATIKS: I KOSIPAN DOT ULUN KRISTIAN

I. I kosipan do Kristian

1. Nunu o harati do Kinoringan?
2. I sabap di kosipan sid Kinoringan

II. I KOSIPAN SID DI YESUS KRISTUS

1. I harati di kosipan sid di Yesus Kristus
2. I sabap di kosipan sid di Yesus Kristus
3. I Kristus i kakali sid tanga tokou
4. It usuran di Yesus Kristus

III. I KOSOSIZAN SID DI YESUS KRISTUS

1. I Yesus ino-no i Kristus
2. I Yesus ino-no i Tuhan
3. I Yesus ino-no it Anak do Kinoringan

IV. I KOSIPAN SID KOSOPULAN OM KOTINDALAN DOT ULUN KRISTIAN

1. I riniba di natagak om masi ponong sid kobinasaan
2. I koponopulan di Yesus Kristus
3. I harati di kosopulan/kotindalan
4. I kogunaan di kosopulan bahagi di tokou bianco
 - a) I samod do Kinoringan inimbulai sid di Yesus Kristus
 - b) It inantadon di kosipan
 - c) I kopoulosan vagu
 - d) I kobebasan dot ulun Kristian
 - e) I piniizaan dot ulun di nosopulan

V. I PINIIZAN DIT ONGOULUN DI MANGASIP

1. I tomodon om panangan di piniizaan dino
2. I piniizaan di kosipan dot ulun Kristian om i gorija.

Bahagi I: I KOSIPAN DOT ULUN KRISTIAN

1. Nunu o harati di pongoretan *KINORINGAN*

Atalahas-no dot i kosipan dot ulun Kristian, i Kinoringan o panangan. Topot varo ongougama vokon dit a-engat do varo Kinoringan. Varo ongoharapan dot ulun di mangasip do varo Kinoringan om varo-po ongopinokokinoringan. Gam varo't ongougama di humarap sid bai iso o Kinoringan, nga kakali okonko Kristian ioti dino (iadko it ugama Yahudi om Silam). Iti-no o sabap dot osusa tokou manalahas om monodiri sampai mongonsi dot nunu o harati i boros tokou *KINORINGAN* :

I kodori diri, varo-no laid i tangan om tuturan kananganko i Kinoringan, i Minamangun om varo-po a-ko piro o vokon do vaza manarang dot isai om siombo sampai okuro-kuro i Kinoringan, dot ong otopot, ino kavi dino, bai hovo-hovoron om jangkakan dit ongo-pongitungan dot ulun kodori diri kananganko i gama mongitung om mangalu-kalu do siombo antad i pomogunan om avan om rahat om i riniba ko ensanan i vinangun. It uog dioti diri, amilo milo varo tukang diti vinangun, ino-no i Minamangun om varo-po a-ko piro o koruhang dau. Kagi, ong iosido dino, nga mintoron dati sid savat. Sabap, tu aso tempat vokon dit asavat mantadko i Nabalu, iri-ogi i rontob jumangka it ongogulu-gulu diri dot sori-no sid Nabalu ot inintoronon dau diri sampai biano. Ogumu o jangkakan om kolu-koluvon kananganko i buatan om gama om hoturan do Kinoringan, dot iso nga aso vaza ko tanda di minanantu di hal dino. Sabap it ongogulu diri minongitung om minonuturan di iadino, it ongotohudi sinumuhut dit usul om tradisi sampai rinumonok om minongoguna sampai sinumamba sid Kinoringan dino.

Ong momoros tokou do *mangasip-oku sid Kinoringan,ka*, osusa tokou manarang om pentahan do nunu o harati dino pongoretan *KINORINGAN*, gima i Kinoringan dino, bai hal do kosipan tokou. I Kinoringan okonko barang iadko kazu ko vatu ko burul ko rahat dit emot di mato tokou om opurimanan di palad tokou. Amu kadapat tokou pemot ko mimot do Kinoringan, ko bai manarang do siombo kopitoguvang do Kinoringan do mimpuras om kopiguvas. Gam i kosipan tokou pogili om pelo dit ulun vokon do bai i tokou o kopihabal dot isai i Kinoringan dit otopot om bai i tokou o nokelo mangarait do Kinoringan sampai mongolumbato do bai i tokou o kopiharati dot isai i Kinoringan di banalnoko Kinoringan, okonko bai pinokokinoringan di vinaal do pongitungan ko ginama di palad do riniba.

Manjadi, ong mangahabal tokou di Habal do Kovosihan, amu tokou mongimbulai do pongo-retan vagu bahagi di panangan di kosipan tokou, inoi nga mamakai tokou di pongoretan *Kinoringan* di napakai om narait-no laid sid ongougama vokon, iadko i harapan laid dit Ongomomogun.

Banal-no, ong mangarait tokou do *Kinoringan* sid kosipan dot Kristian, atalahas-no dot nosimbanan-no i harati di pongoretan dino. Na kakali mongoho tokou do varo-no laid harati sid pongoretan dino di kiguna om it atag ponong sid kosipan dot ulun Kristian. Kagi, suvai sid panarangan di kosipan om kembulai-ogi dot isai om okuro-kuro i *Kinoringan* om kuran o kotutunan do *Kinoringan*. Ong aso pongoretan di napakai-no laid dot ulun, kuran-ma koduzan (humarati) it ulun dit insan-ogi kening do pongoretan do nunu om isai-ka ong ino dino? Kokiraai, ong noboros-no laid sid Ongomomogun hiza di hatustoun kodori diri dot tarabang, tantu aso't elaan diotidi diri do hamarati i hal do tarabang.

Rontob-nopo, minsanko momoros tokou do *Kinoringan* sid boros Momogun ko *God* sid boros dot Ingeris ko *Allah* sid Bahasa, kakali ino pamaraan/pongoretan dino bai vaza manarang, okonko i *Kinoringan* kondiri. Baikomanarang it ulun di mangasip di kosipan dau. Amu kadapat it ulun di kikosipan do pemot ko palanta do *Kinoringan* sid ulun vokon. Okonko it ulun o palanta do *Kinoringan*, inoi nga kondiri di *Kinoringan* pentutun sid ulun dino sampai kotutun om hamarati sampai mangasip it ulun sid *Kinoringan*. Sabap ino, varo't ulun di pakaso do *Kinoringan*, retanko, *sabap a-nakasamung do Kinoringan, tantu aso Kinoringan, ka*. Amu kadapat tokou pemot do *Kinoringan* miabal di gama tokou pemot sid ulun do sangup ko vatu. Ino dino, iadko it ulun dot obolou. Aso tenganan do pemot dit ulun dino di mato dot adau ko i vulan. Suvaiko posirotpo di mato dau sampai kosirot it ulun dino om kotutun-ogi dot okuro-kuro i vulan. Bai i kosipan o karamit dot isai i *Kinoringan*, sid saralom dit ongosuriban om suntuan om panarangan sampai pangalaman dit ongoulun sid Kitab, di kakali bai manarang dit aso tinganan tarangan. Suvai i Sundu do *Kinoringan* o momuka di ginavo dot ulun om pambulai di kosipan dot ulun dot isai i *Kinoringan*.

Na varo kiroon om harapan dot ulun sid hal dit okonko *Kinoringan*. Ino dino retanko pinokokinoringan, tu kondiri dit ulun (antava it onogogulu-gulu dit ulun dino) minongitung om minangagama di dau do harapan om panangan di kosipan dau. I nunu-nopo o harapan om sondihon dot ulun, ino-no o pinokokinoringan dau. Minsanko i kolunduo ko i kurita dot ulun, ong bai ino o harapan dau, nga pinokokinoringan dit ulun (Matius 6,21). Iso't ulun nga aso

dit aso harapan ko panangan om rikoton di kopolisan dau. Iti-no o sabap, it onogogulu-gulu diri minongitung sampai minorou do varo kuasa di Minamangun, ino-no i kuasa di mad korosizan dit Ongomogun. Tu kodung varo kosusaan, lizud, ka, ko koruzahan, iri-no minogihim it ongoulun do mokisian om mokiandus dit kuasa dit antad sid Minamangun ko minonogit om minoginum dati.

Pengkaa dino, ogumu it ongobansa vokon, sid dau om dau do tempat minongitung om minorou ong kodung varo hal dit a-kotutun ko a-kemot, gonit ko korud, lizud ko ruwab om ogumu it onoghal vokon dot a-milo milo, varo dati kuasa di mangahatul do iadino ko monusa dot ongoulun sid dau om dau do pomogunan. Iri-ogi minongitung ioti di vaza mokisian om mokitulung di kuasa dino sampai i kuasa dino jinumadi do harapan om kosipan dioti. Inot onogokuasa dino, nga nokosokot sid dau do bansa om dau do tempat ko pomogunan, iadko it onogokuasa sid Momogun diri i retanko rogon di nokentoron sid pampang ko kazu ko luvang ko burul om konopuan.

Manjadi varo't ongoulun kodori diri, ulun iadko i Ibrahim ko i Noa di hinumarati do bai iso o kuasa om bai iso o harapan dot aso bida, siombo-nopo it ulun, sid belantara ko sid pomogunan dot avantang, dot ino kuasa dino o harapan om sondihon, tu monguasa ino kuasa dino di sokoviai i vinangun om i surga. Iosido o kumavid om sumahau di songoriniba om songvinangun, okonko bai iso bansa ko iso turunan dot ulun ko pomogunan om puru. Iri-ogi nokembulai it ugama do Yahudi sampai i pangalaman dit ongoulun Israil om Yahudi nakatandon sid surat di KITAB LAID. Sid pangalaman dioti dino, i mula-mulai, kakali minongitung ioti dot osusa do monogit om sumamba sid Kinoringan do tomod mokisian om mangapus sid gama pasamba do dupot (ko riniba, ong it ongobansa vokon) do tomod monian ko mangapus om pozom di rodus do Kinoringan. Alaid-nopo om kaharati-ogi it ongoulun Yahudi dot bai iso't indomoon do Kinoringan, ino-no, manamod do Kinoringan om sumuhut di kenginan dau (Kinotimpunaan 18,19; Mikha 6,8; Yesaya 5,1-7 om vokon-no).

Iri-ogi i tokou ulun Kristian nakaharati sampai sumasi dot minsanko ipat-ipat it ulun, nga sid palad om tundaan do Kinoringan. Iti-no o sabap do sumasi tokou dot, I Kinoringan o minongurug di sokoviai om kakali iosido manaud om monunda sampai mamasi di sokoviai i vinangun om riniba, dot iso nga aso atagak. I tokou, nga inurug do Kinoringan om i Kinoringan, nga mamasi di tokou sounul-umul. Na i kinourugan dino, kinourugan di bai boros o minongurug sampai minongimbulai di vinangun dit antad sid aso. I kinouru-

gan do vinangun okonko miabal di gama do tukang poturug do valai. Tu ong valai, varo-no laid it ongobabaal, vatu ko kazu ko pagung. Topot ong i vinangun, antad sid aso. Tigogi kodung noboros-no do Kinoringan, iri-ogi kivinangun. I Kinoringan, ino-no i kuasa dit a-eremot, nga kakali minongimbulai i kuasa dino di nunu-nopo sid vinangun om riniba dot aso babaal do vinangun om riniba. I tokou nga iadino. Iti kavi, nga nokosuvang sid kosipan om kososizan tokou, ong sumasi tokou dot, Kasip-oku sid Kinoringan.

Na i Kinoringan okonko iadko ulun ko riniba. Ong sid Inggeris om it a-ko piro boros vokon, retanko Kinoringan nga *persona* (mad ulun, guvas, kazu). Gam sid ogumu o boros mamakai-po di pongoretan di mad kusai i Kinoringan. Topot ino pongoretan dino mamalid di kiroon dot ulun, tu poluu ko posuntu di Kinoringan sid kobuatano do riniba. Ong i Kinoringan, ino-no, Sundu, kuasa dit a-eremot, nga kakali opurimanan dot ulun. Iadko barat dit aso tanganan mongimot ko popemot. Bai sid ongoroun do kazu ko sid darun dit otilib o kotutunan tokou do varo barat, antava ong osunsungan o barat, mad palad ko longon monurung dot ulun om alud, nga a-eremot i kuasa dino di retanko barat. Iad-no dino i Kinoringan nokopomoros sid ginavo dot ulun kodori diri, isuhut di kososizan dit ongonabi sampai i Tuhan Yesus, sampai mongonsug iosido di tokou, supaya i tokou tumoguvang om kumiboros do Kinoringan sid gama minta dua.

Banal-no, noboros-no laid sid Kinotimpunaan 1,26-30 dot i riniba kolu di kobuatano do Kinoringan. Topot amu kadapat tokou kumavid do Kinoringan iadko i longon om palad dot ulun, ko mangagambal do Kinoringan poluu do riniba di nunu-nopo songbansa. I riniba di kusai om ondu, nga nokoluu di kavazao do Kinoringan, ka diri. Ino-no o harati, varo varo kadapatan mitoguvang om mivozo-vozo om kopitulung. I riniba soumul-umul sid tinoguvangon do Kinoringan. Mad varo mato do Kinoringan di mongimot di sokoviai i kavazao om kobuatano om gama tokou, sampai i ginavo tokou nga hoturanan di kovosihan om kenginan do Kinoringan, supaya elo tokou monodiri ombo it atag om kuran o tanggung jawab tokou ponong sid Kinoringan sampai tumimpa tokou sid kenginan do Kinoringan. Minsanko it ulun di pakaso do Kinoringan, kakali sid tundaan om ponoudan do Kinoringan sampai nakatandon sid ginavo dau ombo it atag om amu. Iso't ulun nga asot masi sid tempat di tanid mantadko sid tinoguvangon do Kinoringan (Zabur 137).

Ong mogidu-oku dara sid tinoguvangon do Kinoringan, a-milo-milo varo't ongo kuasa vokon di momorinta om monusa dohon. Suvai tumoguvang-oku do Kinoringan sampai sumuhut di hoturan om kovosihan om kenginan dau, iri-

ogi ajadi-oku dot ulun dit obebas om kitanggung jawab ponong sid Kinoringan om ponong sid ulun vokon.

Gulu-ko i sokoviai, varo-no laid Kinoringan. Iri-ogi kadapat-oku mangasip sid Kinoringan. Iti-no o sabap do mozo tokou di Yesus minta dua dot, *Ot Ama dahai sid surga. Posusio-no i ngaran-nu. Porikoto-no i karajaan-nu. Posunuo-no i kenginan-nu*, (i nokosunu-no laid sid surga) nga sitid pomogunan-po sampai sid dahai, ka. Iti- kavi atag om kosunu guluko tumoguvang tokou sid ongokosusaan sid vinangun om riniba sid saralom di gama tokou minta dua isuhut di pomintaan dua di Yesus.

I kosusian do Kinoringan banalko osodu antad sid di tokou. Ong bai riniba, a-kotutun tokou di kosusian dino (Yesaya 6,1-5: I nabi Yesaya moki-patai iosido do Kinoringan hiza di nokotoguvang sid rinuvang di panambayanan). Ong riniba tantu aso tanganan do kopikondiri kumavid ko kopiguvang tumoguvang do Kinoringan. Bai i Musa om Elia o nokotiim sid burul do Torsina. Ino kosusio om kenginan do Kinoringan iadko i garau dot adau dit aso tanganan mononsob monirot, tu kosumporou do mato. Iti-no o sabap dot i garau di kosusian om kenginan do Kinoringan mad monorob di sokoviai i hal dit aso tantu-tantu. Manjadi i rasul Paulus posuntu di hal dino sid hakim di mongohukum (Rom 9,20) om sid tukang di mongurug do kiongoluvang. Sid suriban dino i tokou iadko i tana dot osilou sid palad di tukang do kiongoluvang. Ong a-mopud i gama di tukang mongurug do kuron ko panding ko gumoroi, huzason-no vagu di tukang om urodon-no vagu di tukang i tana dot osilou dino om igama-no vagu dau sumuhut di kenginan dau. Na i tana a-kadapat mamajal ko kumidahava di tukang dau ko mangahatul dot ombo it atag ot agama.

2. I sabap di kosipan tokou ulun Kristian.

Nunu-ka o harati, Sabap do kosipan? Ong momoros-oku dot, i kazu nanangan do gonit, tantu varo sabap di boros-ku dino. Ino-no, kaluto ong nemot-ku-no i kinasandatan di gonit sid kazu sampai navaal-no i kazu i hiza diri, ko nosorob-no i kazu dino dot banalko etom, ko nalapak-no i batang do kazu antad-no sid untu sampai nokososi sid puun dau, antava varo't ulun vokon di nakasasi di gonit om i kinalapakan di kazu dino om it ulun dino, ulun dot obuli harapan i boros dau.

Manjadi ong momoros-oku do iadino, ino boros-ku dino, nga dohon do navazaan/nahajangan. Topot it ulun vokon dit aso pangalaman om a-nelaan

do iadino, kuran kadapatan dau mangasip dot otopot i boros-ku di iadino? Humarap di boros-ku, ko kondiri mongimpa di kazu ko mogihim-po dot ulun vokon di meradi o kososizan? Banal-no, iosido kadapat mamantau mokodimot di kazu dino sampai momorisa dot otopot ko amu i boros-ku dino, antava, ong varo sompudung o kazu dit nosorob do gonit, nga tanda di hal dino, ino dino jumadi do sabap di dau do harapan om kosipan kananganko i gonit diri.

I harati, i sabap dino, nga antad sid pangalaman ko tanda ko harapan dot ulun. Topot i kosipan sid Kinoringan banalko tanid. Okonko i tokou o mongimbulai ko momorisa om manantu do varo Kinoringan, inoi nga i Kinoringan-nopo varo-no laid i hiza dit aso-po riniba om aso-po diti vinangun, gam i hiza dot aso-po hiza, varo-no laid ong iosido. Tu ong Kinoringan aso kinotimpunan om aso pongovian. Iti-no o harati do soumul-umul ko sampai penlaid ong Kinoringan. Manjadi it ulun di mangasip o nakaharati do iadino sampai kumavid iosido di katapatan dino om sumasi do pengkaa dino. Rontob-nopo, it ulun di bai nokening di kososizan om kosipan dot ulun kakali a-kemot do tanda ko kabanaran di katapatan dino. Tu ong mangasip it ulun do varo Kinoringan, gima noboros-ku i iadino, tantu i kosipan dit ulun dino bai kosipan dau ponong sid boros-ku, okonko kosipan sid Kinoringan. Suvai kondiri dot ulun o nakasabap di gama mangasip sid Kinoringan, iri-ogi i kosipan dau nga kosipan dot otopot.

Ong i riniba antad di kodori minogihim do tanda om kososizan om ongosabap do varo Kinoringan. Pengkaa dino i riniba biano, mad lobipo mogihim om mongiro dit onghal di kapanalahas om kadapat manantu dot isai i Kinoringan. Iadko i duvo it ulun di nokotulud sid roket di nokensomok-no sid vulan i hiza di ko-80 an. Boros di Armstrong, ulun astronaut do USA, ioku diti nopurimanan-ku do nokensomok-oku banal sid Kinoringan ontok di nokotutuk-oku-no di vulan om iti pomogunan, ka. Topot it ulun Russian,, i kosmonaut om komunist di pakaso do Kinoringan, gam minonuturan iosido dot, Minsanko nokorikot-oku sid vulan dot 300 000 Kilometer asavat mantad sid pomogunan, kakali aso't nemot-ku di kolu do surga om Kinoringan. Sabap ino, tantu aso surga om aso Kinoringan, ka dau. Ino-no o pongitungan dau, ong kodung nokelo i riniba di saiens do vinangun do sampai kadapat monimbak dot ulun sid roket ponong sid vulan om it ongokorimbutuon, suvai i mato dot ulun o kotorupung dit hal dit opodok banal ko i teleskop o kemot di banalko osodu sid avan, iri-ogi mimbulai do varo hal ko aso, Kinoringan ko isai-nopo. Kodung asot emot di mato dot ulun, tantu aso-no i nunu-nopo, ka dau. Suvai-no ong i ginavo om utok dot ulun di karamit-no do hal om iri-

ogi varo, ka. Aso hal dit a-korusod om koduzan i mato om palad om utok dot ulun, ka.

Manjadi kuran-no-ka ot vaza dit atag manantu do varo Kinoringan?

a) Sid Kitab Laid om Kitab Vagu iso nga aso kinoponontuan ko tanda di manantu banal do Kinoringan. Sokoviai it ongososizan sid Kitab manarang om kumavid di kosipan sid Kinoringan. Minsanko i keloo di Pengkhotbah di Solomon ko i Buuk Ayub di nosuba-no do kinumuro-no i Kinoringan, nga amui opiduvo i ginavo dau do varo Kinoringan ko aso. Sabap ino, i katapato do varo Kinoringan sid Kitab okonko antad sid kiro-kiro om koponontuan dit utok do riniba, inoi nga notontuan-no laid dot amu osusa tontuon-po di keloo om saiens do riniba.

b) It ongougama vokon, iadko i dang Yunani nokotiim do manantu di pinokokinoringan i hiza di varo kososizan dit ulun Kristian kananganko i Kinoringan, i Ama di Tuhan Yesus. Kenginan dioti ongoyunani, dumahava om sumaap di kososizan dot ulun Kristian.

c) Sid saralom di 2000 toun do varo gorija, nokotiim it a-ko piro it ulun Kristian do manantu di Sabap do Kinoringan do tomod mamanal om momihot-po di kosipan dot ulun Kristian ko pemumui dit ulun dit opiduvo o ginavo. Retan dioti ko, i Kinoringan, o puun di sokoviai i keloo di varo sid hoturan do vinangun. Topot ino tanda dino kakali mad aso guna om aso sabap dot otopot ko kikinoringani.

Gam varo tolu o vaza di minoniim manantu di sabap do varo Kinoringan, ino-no,

1) Retanko, sabap sokoviai i varo sid vinangun, tantu varo inantadon, tantu varo-po hal di minongimbulai di sokoviai, ko i hal dino guluko i sokoviai i nakantad dit inantadon, ino-no i nokogulu banal di varo-no laid om it aso't inantadon. Topot ino vaza monodiri om mongonsi bai tanda di pongitungan dot ulun di mogihim di puun dot inantadon.

2) retanko sokoviai i vinangun, nga antad sid ongokuasa do vinangun di minongimbulai di sokoviai. Na suvai varo't ongokuasa di mongimbulai ong varo-no laid it iso o kuasa di minongimbulai laid di sokoviai it ongokuasa vokon. Ino kuasa dino, ino-no i Kinoringan, ko kuasa di kinotimpunan, ka. Topot ino panarangan di iadino kakali amu kadapat manantu do Kinoringan.

3) retanko, sid vinangun varo ogumu it ongohoturan do koposizan om kopudan do vinangun, iadko it ongomusim ko i rahat om i kosunizan dit ongakazu om kouvaan ko totodukon om i riniba-po om i mizon talun. Sokovia i kopudan dino, ahatul banal. Sabap minsanko i kosurutan di bai iso't obuk dot ulun ko i sondulu sid unturu, ko i darun om it adau, i manampangi om i manangadau ko sodop om adau, ko i korimbutuon om vulan om mato, nga ahatul-no kavi dot aso tenganan monimban di hoturan dino. Ong banal-noko nahatul-no iti kavi dino, suvai varo kuasa di minongimbulai di sokovia i ongohoturan dino, ka. Ong i Saiens bei elo-no mongintutun om sumusui dit ongohoturan dino, iadko mongiro di koledo do sombulan om sontoun ko sera varo Arob do vulan om adau. nga kakali a-nokelo i Saiens do monimban di hoturan do kopudan do riniba, minsanko nokotiim i riniba do monimban di kosurutan do vogok om sapi om ongodupot vokon. Ong moniim i riniba dara do monimban di hoturan, tigogi i korikoto di kosimbanan dino atandas ponong sid karaatan. (i sakit AIDS nga iadino, ko ong bianco, tu kikirita i riniba sampai kadapat mamanau dot alankas mantadko bai minghakod, tigogi, toun toun rinibuvan ot ulun apatai do kurita. I gama humago banal rumikot sid rikoton dau mongimbulai di kapatazan om kobinasaan dit ulun vokon).

Varo't ulun di bai humarap ko rumosi di NASIP. Inot ulun dino engat do sid konoruvo di koposizan dau varo hal dit a-kaharati om a-kele ponong sid kavantango om kosurupuvan om ponong sid karaatan om kobinasaan. Tigogi kisakit ko kopunovot it ulun om tigogi nakahajang iosido do kosurupuvan. Ino kavi dino, nga okonko Kinoringan. Topot minsanko it ulun di humarap om rumosi do iadino, nga kakali sid pongohoturanan do Kinoringan.

Varo't ulun di mongolumbatos dot, i hoturan do vinangun o kasabap do varo sokovia i, retanko i vinangun mangahatul di kondiri dau. Ino nga aso vaza manantu do Kinoringan sid kavazao om hoturan do vinangun. Topot minsanko it ulun di humarap sid hoturan do vinangun, nga kakali sid pongohoturanan ioti do Kinoringan, sampai mangasip tokou dot i Kinoringan o mavid-kavid dit ongoulun di iadino o vaza humarap om mongiro.

Na i ginavo dot ulun mangagazad dit ulun sid sokovia i i kobuatano om bahazan dau. I ginavo dot ulun okonko dolou om kabang do Kinoringan. Kagi amu enizo it ongoginavo dot ulun. Vokon-no okugui i ginavo ko mokipalid i ginavo ko sumaap om pakaso do Kinoringan, gima notudukan om ginaratan dot ulun vokon. Ino-no rontob, i ginavo dot ulun mad tanggung jawab di sokovia i i kobuatano om gama dot ulun. Minsanko it arampus ot ulun ko it

araat banal o gama, nga i ginavo dit ulun dino pentahan sid dau dot ombo it atag o gama om ombo it amu. Ong moniim it ulun do pobolou di ginavo ko dumahava di pajal do ginavo, kakali aso tanganan do papatai dit uog do ginavo dau. Vokon-no ong it ulun di minamatai dot ulun vokon, minsanko hopod toun kinotoliban, kakali ohondom di ginavo i karaatan di nagama dau sampai it ulun dino, sodop-sodop epi dau. Ko it abanakau monokop-po laid i gambal di Yesus sid ongakob. Iri-ogi manakau iosido dit ongobarang sid ongakob di nosoruvang dau.

Ong antad sid ginavo do riniba mogkiro, tantu i Kinoringan dino iso o suromo dit a-koduzan om a-aramit dot utok om palad dot ulun. Bai i kosipan dot ulun Kristian sumasi dot otombian iosido do Kinoringan biano sid saralom di kososizan om pangalaman dit ulun Kristian, i nakatandon-no sid ongosurat do Kitab. Sabap sid Kitab om sid kososizan dot ulun Kristian biano kembulai i pangalaman om pongitungan do kuran i Kinoringan nokopomoros sid dioti om kuran i boros dino o puun om sabap di kosipan dioti. Gam notugasan-no ioti di boros dino, supaya kihak ioti do pazazad om polombus di boros do Kinoringan sid ulun vokon.

Manjadi it ulun di mongining di kazazadan di habal dino ot oebas do tumorima di habal dino ko tumimpa dot, Nening-ku-no ino, nga kakali amuku humarap om mangasip di boros dino, ka.

Aso vaza dit ulun Kristian do mamanal di kososizan om kahabaran dau. Sid UR 2,37 varo boros dot, *Norongou-po dioti i iadino* (ino-no i khotbah di Petrus hiza do Pentakosta), *notobok-no i ginavo dioti sampai pomoros-no ioti dot, Nunu-no-ka ot apatut do gamaon-za*, ka. Ko i Paulus minonurat sid 2. Kor. 2,17 dot, *loko i dioti, otulid o gama-za momoros di suhu do Kinoringan*, ka antawa sid 1. Tes. 2,13: *Notorima-no dikou i boros dahai dot okonko bai boros do riniba, inoi nga kiroon dikou do boros do Kinoringan. Om ino-no ot otopot, sampai i boros dino najadi-no do kuasa sid dikou, it ongoulun di mangasip*, ka.

Ino hal dino retan tokou dot i kososizan di Sundu do Kinoringan, dit aso tanganan do gamaon ko tontuon ko imbulazon dot ulun. Iti kagi o sabap di kosipan do Kristian sid Kinoringan. Rontob-nopo, ino kososizan di Sundu do Kinoringan okonko hal do iadko it ulun do kososorou om vuvulazon, inoi nga isuhut di Boros do Kitab. I boros do Kitab om i Khotbah di mongimbulai di boros do Kitab o potoguvang dot ulun sid Kinoringan om i boros do Kinoringan, sampai humarati it ulun dot iosido ulun di soumul-umul sid

tinoguvangon om pitutunda do Kiningan.

I hiza dit amu-oku-po nakasip, varo kiroon-ku dot ioku masi ponong sid dohon dot amu osusa do varo Kiningan ko varo hoturan di mangagazad dohon sid pialatan do riniba. Sukul ioku. Gam kipongitungan-ku diri do ioku kondiri elo mangahatul om masi isuhut di kenginan-ku. Kodung mangasip-oku, elaan-ku dot i Kiningan o mangagazad om mamasi sampai mongopud dohon sampai manahak dohon di panangan di kopoulosan-ku. I hiza di humarati om mangaramit-oku di kovosihan om samod do Kiningan, mongoho-oku di samod om kovosihan dau. Iadno dino i kembulazan om kopudan di kosipan tokou.

Keso, i kosipan-ku jumadi do kopitoguvangon-ku sid Kiningan, tu sumondu-oku sid Kiningan, gima i Kiningan o minongurug dohon om najadi dot Ama-ku om hakim-ku, dot ioku diti, nga anak do Kiningan om inurug do Kiningan. I sabap om onsi di kosipan tokou, bai i kososizan dot ongoulun kananganko i boros do Kiningan om i vaza do Kiningan manamod dot ongoulun sid saralom di piniizaan di Sundu do Kiningan.

Rontob-nopo, i tolingo do riniba a-kening di dolou do Kiningan miabal di gama kumiboros om kopening do riniba. Bai i kososizan dot ulun ot nokening i tolingo-ku. Aso mato dot ulun nokemot do Kiningan om aso tolingo do riniba nokening di dolou do Kiningan. Iso't ulun nga aso nokelo do mongining di dolou do Kiningan. Suvai i Kiningan momoros om mongogiang-po di ginavo dot ulun, isuhut di kenginan dau, iri-ogi kening it ulun. Na i Kitab manarang do iadino i kenginan om gama do Kiningan. Iti-no o harapan tokou.

Koduvo, Ong varo't ulun di tumanggai dara dohon, obebas-oku do tumorima di kopianggazan dino ko amu. Ong tumorima-oku dino, kakal-oku miabal-oku di gulu. A-kosimban i kavazao-ku. Ong Kiningan manahak di samod dau sid saralom di boros dau, ino samod dino moniag di dohon do kavazao di bai monongkudau om bai kopiturug sid kondiri-ku. I samod do Kiningan pembulai do hoturan vagu, ino-no, monuli-oku di samod do Kiningan dit iseso o ginavo om pongitungan om kakansangan-ku. *I boros do Kiningan mad karis di miampaping-paping, nga kotogu banal sampai kogutas di kinopigaganggazan di guvas om ginavo, tu kelo sampai kopongohukum di nunu-nopo sid saralom di ginavo* (Ibrani 4,12) Ino-no o harati, kodung kaharati-oku dot asamadan-oku do Kiningan, a-milo-milo mogidu-oku antad sid hoturan-ku kondiri om mamung-oku sid hoturan do Kiningan, ino-no

monuli-oku di samod do Kinoringan om polombus di samod do Kinoringan sid ulun vokon.

It ulun dit amu mangasip tumiim do masi sid kondiri dau. Topot it ulun aso tinganan dot a-mangasip om tumolikud di kavazao dau laid, isuhut di kososizan di Yeremia 23,29 di mininta dua iosido dot, *Okon-ka i boros-nu mad apui om iadko dunsul di momiding do pampang?* ka. I boros do Kinoringan mamatai di kavazao laid om mamasi-ogi sid hoturan vagu. I boros do Kinoringan monimban di kobuatano om kavazao-ku, ino-no mamung-oku sid Kinoringan sampai nakalabus-oku sid kenginan-ku om kozian-ku om karalazan-ku. Kosipan, ino-no o harati, kopolisan vagu, gama vagu, kavazao vagu, isuhut di boros di Paulus sid Rom 14,7-9: *Iso't ulun sid di tokou nga asot apasi bahagi di kondiri dau om iso nga aso matai bahagi di kondiri dau. Ong apasi tokou, dang Tuhan i kopolisan tokou. Ong matai tokou, dang Tuhan i kapatazan tokou. Manjadi it apasi tokou-po antawa apatai tokou-no, nga i Tuhan o sanganu di tokou.* Sabap ino i kosipan tokou sumondu sid Kinoringan, om masi sid Kinoringan ko mogom sid samod om kovosihan do Kinoringan. Sokoviaia it ongosabap vokon, nga aso guna om aso panangan.

BAHAGI II I KOSIPAN SID DI YESUS

1. I harati di kosipan sid di Kristus:

I panangan om harapan di kosipan do Kristian, ino-no sid di Yesus Kristus. Noboros-no sid bahagi I dot i kosipan tokou, nga kosipan sid Kinoringan. Nokokuro, tu varo duvo o boros dino, ino-no, Kasip-oku sid Kinoringan om iri-ogi, Kasip-oku sid Yesus Kristus? Varo-ka naku pitonidan sid duvo o kososizan dino? Ino-no o timpa tokou, I kosipan sid Kinoringan om i kosipan sid Yesus Kristus, nga iri-no ko iri. Aso bida, tu i Kinoringan om i Yesus Kristus nga iso-no. Iti-no i pitonidan ponong sid kosipan do Yahudi om Silam, om iti-no i randavi di kosipan do Kristian, dot i Kinoringan om i Yesus antad sid Nasaret, nga iseso. Aso tinganan do pokurang ko monimban di kosipan, tu iti-no o lugu om onsi banal do kosipan. Sid ongougama do Yunani varo tuturan om tangon do varo't ulun di dang riniba di nokensomok sampai nokorompok sid Kinoringan do mad kinoringan iosido. Inot ulun di iadino, nga ulun di tinumalib di kavazao dit ulun vokon, tu tumirai iosido sid pialatan dot ulun dot ahakang iosido ko elo iosido mantadko i vokon ko

kikosunduvo om i iadino, ka. Topot ong i Yesus antad sid Nasaret tanid-no, tu ulun iosido do mosikim om okugui, opogos iosido sampai nohukuman-no iosido do meradko it ulun dit araat om pinatai sid pialatan dit ulun dot araat. Ino Yesus dino dit antad sid kuasa do Kinoringan nokoriniba o nokezo-no do Kinoringan, ka di Habal do Kovosihan. I boros dot, i Yesus om i Minaman-gun di sokovia i it avan om pomogunan, nga iri-no ko iri, amu otorima dit ongougama vokon, Yahudi ko Silam, gam retan dioti ko, ino boros do iadino mad kopongimbuhalan do Kinoringan. Ong sid di tokou, kakali atarang dot ino boros dino, isuhut di boros di Yesus sid Yahya 10,30; 17,11-12 *Ioku om it Ama-ku, nga iso-no*, ka, ko Yahya 14,9: *Isai-nopo i mimot dohon, nokemot iosido dit Ama*, ka.

Ino-no o kososizan om kosipan tokou: sid saralom di riniba, ino-no i Yesus antad sid Nasaret, nokoriniba i Kinoringan sampai nokorompok di tokou. Nokensemok i Kinoringan sid isai-nopo it ulun dit aso ngaran om aso hak om kuasa. Ino dino nakasasi-no laid i Kitab Laid. Okonko bai i Yesus minongim-bulai di keloo do Kinoringan. Sid Kitab Laid varo a-ko piro o tuturan di manarang do kuran i Kinoringan minongimbulai sid a-ko piro it ongoulun, ino-no sid ongonabi, di vaza dau minsomok om manamod di riniba. I bansa dot Israel nosodiri-no laid do Kinoringan sid pialatan dit ongobansa vokon sid saralom di kinembulazan do Kinoringan sid dioti (Ibrahim, Musa, it ongonabi). Nosopulan-no i bansa dot Israel antad sid kinuripanan sid Masir om sid tanga do belantara (Kolobusan 1-15) I hiza diri varo a-ko piro ot ongosasi, retanko nabi di minanarang do kuran i Kinoringan minomili om minangagazad di bansa dau dino. Inot ongonabi dino minangahabal di kovosihan do Kinoringan sid dioti om ponong sid tohudi't adau. Sid pamarasan dot, Boros di Tuhan, ka, ko, Boros do Kinoringan, ka, o vaza dioti ongonabi poromot sid bansa dot Israel i kenginan om hukum do Kinoringan. Asarok suvai agaratan i nabi om kogoos om katama iosido do mumbongut sampai polombus di boros do Kinoringan sid ongokoruhang om bansa dau. Ino boros do Kinoringan di minimbulai do iadino, okonko bai tudukan om keloo om kovosihan, inoi nga hoturan om pajal bahagi di kobuatano di bansa dot Israel om Yahudi hiza di nokedu-no i bansa dot Israel antad sid tinoguvangon do Kinoringan. I tinomod di boros dau, pemumui vagu di bansa dot Israel sid Kinoringan. Alaid-nopo, mad noken sodu-no banal i bansa dino sampai it ongoulun do Yahudi nokemot do vaza sumambayang, isuhut di dau do kenginan. I kiniro dioti diri, ong sukul ataud i pinonuhuan do Taurat, a-milo-milo kemumui vagu ioti sampai kumoruhang do Kinoringan, om i

Kinoringan monuul di vaza dioti sumamba sid Kinoringan, ka dioti. Rontobnopo, sid kobuatano di iadino, nokensodu-no banal ioti sampai nengkod-no om nozom-no i dolou do Kinoringan sid bansa dau. Mad aso nabi vagu om aso't ulun di mongimvagu di boros do Kinoringan bahagi di hiza vagu.

Iri-ogi nokembulai i Yesus di mad nabi iosido. Topot i habal dau dino tinumalib di Habal dit ongonabi, tu it onsi di habal dau, ino-no, I KORIKATAN DI HOTURAN OM KARAJAAN DO KINORINGAN (Markus 1,15).

Minongodim i Yesus dit ongoulun, supaya muli ioti sid Kinoringan om tumorima di habal do Kovosihan om i kaadaan di kasalaan om karanggalan. Ino kodim di Yesus nokonong sid sokovia i it ongoulun, it okosog om it araat, supaya ensanan it ongoulun tumoguvang vagu do Kinoringan. Sid saralom di habal dino nokembulai dot i Kinoringan iadko Ama di banalko obinsianan (Lukas 15,11-32) di mongogobu dit ulun di kouli sid ama dot amu monodiri di kobuatano laid.

Alaid-nopo minanarang-no it ongorasul dot i gama di Yesus poromot di samod do Kinoringan sid ongoulun sumunsui di boros laid dit ongonabi, retanko i Yesus nga nabi om Anak di Daud ko Kristus (Almaseh) ko uripon di Tuhan (Yesaya 53), ko Anak do Riniba om i iadino. Amu atalahas dot i kondiri di Yesus minamakai dit onogoral om pamarasan dino. Topot i gorija dit Abad keso nakapamakai dit onogoral di noening-no sid ongonabi do manantu di kosunuan di nokentahan om nokentalang-no laid sid ongonabi sid Kitab Laid o tomodon. Ino-no o kososizan di gorija diri, Kondiri di Yesus o nakapanapul di riniba, supaya a-onong di hukum do penlaid. I Yesus, ino-no i Tuhan. Sabap ino, i kosipan dioti sid Kinoringan jinumadi do kosipan sid Yesus Kristus, sampai, ong mininta dua ioti diri, gam tinumoguvang ioti di Yesus Kristus sampai amu minonodiri-po do Kinoringan om i Yesus Kristus ko minomiduvo do Kinoringan om i Yesus.

2. I sabap di kosipan sid di Kristus.

Kuran-ka dot it ongoulun Kristian di nokogulu nokokristian minomoros om sinumasi dot i Yesus nga Kinoringan? (iadko i Tomas Yahya 20,28: *O Tuhan-ku om Kinoringan-ku*, ka) Ong bai i kinogulianan di Yesus (1. Kor. 15,1-8) amu miuma do kasabap dot i Yesus nga Kinoringani. Sabap sino dino bai nakasasi dot nokoriniba om nogulianan-no i Yesus. Okonko i kinogulianan di Yesus o tanda ko sabap dot i Yesus dino banalko Kinoringan.

Sid Kitab Vagu, iso nga aso boros di Yesus di manarang ko manantu dot

iosido nga Kinoringan. Topot i kinoruhangan di Yesus bai hinumarap sid boros di Yesus, tu nakaharati ioti dot i Yesus, ino-no i Kristus (Almaseh). Pengkaa dino, i Paulus bai mongohondom di kinapatazan di Yesus sid kazu do sangkap om i kinogulianan dau sampai sumasi dot ino Yesus dino, nga Kinoringani (UR 9; Rom 1,1; 1.Kor. 1,3) I kosipan sid di Kristus, kuran-kuran, nga okonko antad di tuturan om tudukan di Tuhan Yesus, i nisurat-no sid Injil di Matius, Markus om Lukas. Ong it injil di Yahya di nisurat-no sid tohudi banal bai manarang di gama om tudukan di Yesus, isuhut di kososizan di gorija diri.

Ong mongitung tokou di gama di Yesus, it ongokosunduvo om tanda dau, i nihabal-no sid ongoinjil, tantu inot ongokosunduvo dino nga vaza di kinembulazan di kuasa om kohormatan antad sid Kinoringan, ino-no i Sundu do Kinoringan. Sid Matius 11,2 minongoduat i Yahya i minomodsu di Yesus dot, *Ikau-no-ka i rumikot (i Almaseh) antawa osusa-okoi-po monginud do vokon? ka*. Ponimpa-nopo i Yesus dot, *Habarai-no dikou i Yahya: It ulun do bolou kosiro? om it ulun do kakung kapanau om i kibalang nga olingasan om i bongung nga kening, i minatai ogulian-no vagu om i mosikim orikatan di Habal do Kovosihan sampai osinang it ulun dit amu enggirit dohon*, ka di Yesus. Ino boros di Yesus di iadino bai manarang do nokorikot i hiza di nokentalang-no laid di nabi Yesaya (Yes. 35,5; 29,18; 61,1) kananganko i karajaan do Kinoringan om i hiza di kosopulan do riniba. Siombo-nopo i Yesus, sino-no i karajaan om hoturan vagu (Markus 1,15: Nokorikot-no i karajaan do Kinoringan, ka). Aso boros di Yesus dot iosido mad bobolizan om kihojimat di nokelo do mongimbulai do kosunduvo.

Ong i Nikodemus, i guru dit ugama Yahudi (Yahya 3,2) minanangrabi di Yesus. Boros dau, *O rabi, elaan-za dot ikau dino o guru, nokorikot siti antad sid Kinoringan. Sabap isot ulun nga aso kapangagama di tanda di nagamanu, ong okonko i Kinoringan o mozo-vozo dau, ka dau*. I harati, i Nikodemus minongiro di Yesus dot ulun di kihak antad sid Kinoringan sampai borontuvilan do Kinoringan. Topot it ongokoruhang di Nikodemus, gam minomoros dot i Yesus nga susuhon di vozon do rogon. (Mark. 3,3 om Mat. 12,24).

Manjadi sid sokoviai i kososizan om pangalaman do Kitab, aso't iso o sabap om kotontuan dot i Yesus Kinoringan, inoi nga it ulun Kristian diri nakaharati dot i Yesus o i Kristus, ino-no i Tuhan dit antad sid Kinoringan di minongimbulai di kosopulan om kopoulosan penlaid, sampai minangasip ioti om mininta dua ioti sid di Yesus sampai sinumuhut di kovosihan dau om hinumarap sid

karajaan dau. I harati, Minangasip ioti sid di Yesus di nakasamung ioti diri om i kakali mozo-vozo dioti (Matius 28,20) dot amu minonodiri-po di Yesus antad sid Nasaret di kinumuruhang dioti sid pomogunan om i Tuhan di nogulianan-no sampai nakasamung di Paulus sid Damshek om it ongovokon (1. Kor. 15).

Ong i Yesus kondiri, nga iadino o boros dau (Mat. 11,6; Luk. 12,8-9) *Isainopo i sumasi dohon sid tinoguvangon dot ongoulun, ino-no ot isasi-ku sid tinoguvangon dit ongomalaikat do Kinoringan, ka.*

I kinoruhangan di Yesus om it ongokristian kodori diri nokelo-no do kodung kotoguvang ioti di Yesus, kotoguvang-no ioti do Kinoringan, i nelaan-no om nokentahan-no laid sid Kitab, sid ongoboros dit ongonabi om it usuran di bansa dot Israel, sampai minangasip ioti dot ino Kinoringan dino o minongurug dit avan om i tana. Sid di Yesus nakaharati ioti di kinembulazan do Kinoringan om i kinentalangan dau, sampai ino kelaan dino jinumadi do kosipan dioti sid di Yesus.

Manjadi antad di hiza diri, varo pangalaman om kososizan dit ensanan i piniizaan dit ulun Kristian di mongimbulit di gama kopitoguvang sid Kinoringan sid saralom di kahabaran di Habal do Kovosihan di Yesus Kristus. I boros om kodim do Kinoringan sid saralom di Kitab om i dolou di Yesus Kristus nga iso-no o boros ponong sid di tokou. Iti-no i kinososizan dit ongoulun Kristian kodori sid Kitab Vagu; om i tokou diti kadapat mongining om manarang sampai mamanal di kososizan dino.

Ino vaza manarang biano okonko miabal di vaza kodori diri. I pongitungan om pongo-horotizan diri om biano nga mitanid banal. Bai iso-no ot a-milomilo dot amu simbanon, ino-no, Sid kososizan tokou kananganko i Kinoringan kopisamung om kokodim it ulun do Kinoringan sid saralom di Yesus dino. Iti-no o kososizan tokou, I Kristus dino, ino-no o Kinoringan.

I sabap do iadino o kososizan tokou, ino-no:

Banal dot i Kinoringan, nga siombo-nopo, nga sino-no i Kinoringan, tu iosido o minongurug di sokovia. I sokovia i vinangun, nga sasi di ginama dau. I bai sonlinsou o pantai ko i sontihi o vaig, nga tanda di kovosihan do Kinoringan. Gam sid saralom do sontihi o vaig, varo-po kopudan dit a-kemot, nga kiguna. Boros di Yesus Mat. 10,29-30 *Songinan o pirit nga aso rumatu sid tana, ong okonko kenginan do Kinoringan om mulongko it ongoobuk dikou, nga nezap-no kavi.* Na lobipo i Kinoringan monunda dit onghal dot agazo sid pialatan dit ongobansa om ongopomogunan, songkonoruvo dit usul

do sompomogunan. Topot sokovia i kobuatano di iadino, it opodok om it agazo, nokosusut-no i Kinoringan. A-emot tokou i Kinoringan, bai i ginama di palad dau om i kosurutan do vinangun ot emot tokou. Sid nunu-nopo it ajadi, nga aso tinganan do humarati do nunu banal i kenginan do Kinoringan. Aso't elaan tokou ko kentutun tokou di siombo ponong o gama om hoturan do Kinoringan. Ong bai mangalu-kalu di panangan di ginama do Kinoringan, tantu aso guna om aso't ontok. I vinangun om it usuran do pomogunan sompi a-kadapat do pembulai do Kinoringan do sampai kopitoguvang do Kinoringan. Mad kenginan do Kinoringan dot osusut iosido. Bai iso-no vaza di kenginan do Kinoringan do tumambi di tokou riniba do pembulai di samod om kovosihan dau sampai i suhu dau bahagi dit atag o gama, sumuhut om tumimpa di samod om kovosihan dau dino, ino-no i Yesus Kristus, inot ulun antad sid Nasaret. Sid boros om gama di Yesus mimbulai i Kinoringan, om ensanan i Kitab om i tudukan do gorija kananganko i Kinoringan, nga nembanaran-no sid di Yesus Kristus.

3. I Kristus kakali varo sid tanga-tanga tokou riniba.

Osusa tokou monodiri om monginsosok dot,

Keso, kuran kadapatan tokou tumoguvang do Kinoringan sid ulun di kodoripo, ino-no i Yesus antad sid Nasaret? Banal-no, it ongoinjil minongusul di Yesus. Inot ongotuturan dit ongoinjil dino okonko usul iadko koubasan, tu amu manarang dit ongoadau om vulan om tinouan di Yesus, songkonoruvo di sukud dau iadko daiari. Bai iso o tinomod dit ongotuturan dino, ino-no, mongusul dit okuro-kuro i Yesus di jumadi do ponuhu om palad do Kinoringan. It ongoinjil minongumpug dit ongoboros di Yesus om it a-ko piro vaza di Yesus minsamung dot ongoulun sampai monuturan do kuran i Yesus kinumiboros dit ongoulun dino sampai minonulung dot ulun, om kuran it ongoulun dino tinumimpa ko minozo di Yesus. Sokovia i hal vokon, nga amu-no nousul.

Tasantanid-tanid it ulun di sinumamung di Yesus. It okosog o Parisi, it ongokatib, it ongokrani do sukoi, ulun do sumakit om ulun dit aso bahazan, ino-no it ongoulun dit aso ngaran sid bansa do Yahudi, gima a-sumuhut ioti di hoturan dot ugama Yahudi, isai-nopo i mosikim ko kibalang ko kimai om bolou. Ioti kavi a-kosuhut sid piumpugan om kasambayang, tu kodung orukung ko aso balanja, a-kavasa mamung sid piumpugan. Topot ong i Yesus tinumorima dioti kavi. Varo-po't ulun di kinumoruhang di Yesus. Na i sokoviai it ongotuturan dino manarang do kuran it ongoulun, ong kodung nakasamung ioti di Yesus, olumbatos-no do sinumuhut ko sinumaap di Yesus. Ino

kolumbatasan dino mad kipanangan ponong-po sid Kinoringan. I tinumorima di Yesus, nga nokoho do sumuhut do Kinoringan. I minogidu sid di Yesus, nga ulun di nokotolikud sid Kinoringan.

Suntuan keso: Markus 2,1-12 monuturan do varo't ulun di minonompuzung dot ulun do kakung sid di Yesus do tomod mokitulung om mokipasi. Na varo boros dot, *Nemot-no di Yesus i kosipan dioti*, (5) ka. Ong kosipan sid di Yesus, ino-no, i harapan ponong sid Kinoringan dot i Kinoringan monian di kosusaan dot ulun sampai i Kinoringan mamakai di Yesus do polingos di sakit dit ulun dino. Ong bai riniba tantu aso tenganan do mongulit-po dit ongouhat do kakung dit alaid-nopo kakakung. I kosipan di koruhang dau dino, nga minangasip dot i Kinoringan mamakai di Yesus iadko pakakas dau di monulung om mangatag di kakung.

Rontob-nopo, i gama di Yesus tumimpa sid harapan om kosipan dioti okonko bai rontob sid korukungo di guvas dot ulun di kisakit, gam pembulai-po i Yesus ombo it amu atag ponong sid Kinoringan. Aso kiroon dioti dot i Yesus mad Doktul di kikosunduvo iadko bobolizan om ulun do borontuvilon. I Yesus minangatag di kobuatano dot ulun, i guvas om i ginavo. Inot ulun di kisakit, aso-no kiroon dau ko harapan dau sid Kinoringan, mad minoguhang dati iosido dit ongoulun om isai-nopo, (minsanko i Kinoringan), gima varo sakit dau. Iti-no o sabap i Yesus mangatag-po laid i ginavo dit ulun iadko i boros dau dot, *nakada-no i kasalaan-nu*, ka, i harati dino, I Kinoringan nakapangada-no di sala-nu. Ong ulun Yahudi amu mangarait dot ino dino ginama do Kinoringan, sabap tu retanko ioti, varo najadi.

Nening-po dit ongoelo do Kitab ino boros di Yesus kananganko i kasalaan dit ulun dino, retanko dioti dot i Yesus mongusiba do Kinoringan. I kiroon om hoturan dioti, a-kavasa om a-kadapat ong riniba do pada do kasalaan dot ulun. Iti-no o sabap dot suvai sid kotulungan ponong sid korukungo di guvas dit ulun mongimbulai i Yesus di kuasa dau antad sid Kinoringan. Sabap ino, i kinolingasan di bulud dit ulun dino jinumadi do tanda do kihak i Yesus ponong sid kapangadaan do sala om ponong sid kapangatagan dit guvas di norungoi-no.

Manjadi i duvo o nakasamung di Yesus, i kakung om i Katib o tinomod di tuturan dino. Sid kinopisomungan dino, kondiri do Kinoringan kopisamung di duvo it ulun dino. It iso tinumorima di Yesus sampai sinumuhut di boros dau do pemozoon di hoturan dit ugama (a-kavasa do manaan do barang ontok dit adau do Sabat). It ongoulun dit elo do Kitab nga tinumolikud sid Kinoringan, gima i kovosihan om samod do Kinoringan amu miabal di dioti do kiroon di

kavazao do Kinoringan.

Suntuan koduvo: It Anak vagu do lumundu (Markus 10,17-22) Ino tuturan dino pemot di kinopisomungan di Yesus om it ulun do lumundu. It ulun dino mogihim di ralan kumaa sid Kinoringan (koposizan penlaid), om minindamo do kovosihan sid di Yesus. Minangarait iosido di Yesus dot, *guru dot avasi*, ka. It ulun dino minogihim do kovosihan di bai riniba, kananganko i Kinoringan, okonko minonginsosok iosido do nunu banal i kenginan do Kinoringan. I duaton dau i Yesus bai mokibanal o tomodon. Tu i boros dau, *nosuhut-ku-no i sokoviai i pinonuhuan do Kinoringan*. Nokosuhut dati dau i pinonuhuan ong bai i hurup om lininsahan do boros di Taurat diri. I Yesus tumorima dara dit ulun dino, gam varo boros dot i Yesus minanamod sampai ozi banal dit ulun dino. Agazo o ginavo di Yesus sid ulun di nokopomoros dot iso nga aso pinonuhuan ot inalazan dau. Iri-ogi minongimbulai i Yesus di mad tanda dot otopot i ginavo dot ulun ensanan sid Kinoringan om iri-ogi atalahas dot it ulun dino inuripanan di kolunduo dau.

Isai i nokosokot sid kolunduo om barang dau, mad a-kogoos lumombus ponong sid Kinoringan. It ongobarang dau lobipo kiguna mantadko i korikatan dau sid Kinoringan om i hoturan dau. Iti-no o sabap do banalko osusa i ginavo dit ulun dino sampai minogidu iosido.

Sid tinoguvangon do Kinoringan a-milo-milo it ulun osusa mongolumbatos dot ombo i keso o harapan om sondihon, Kinoringan, ka ko i barang om i kolunduo dau. Sid di Yesus osusa tokou monodiri om mongolumbatos do mozo di Yesus ko mozo di kondiri-ku. Ong mozo om kumuruhang di Yesus, ino-no o harati, tumolikud antad sid nunu-nopo it engin momorinta dohon. Ombo i sid di tokou, barang, valai, tana om nunu-nopo, nga ensanan ino antad kavi sid Kinoringan ponong sid gama manamod do Kinoringan om it ongoulun vokon.

Na sid duvo o tuturan dino mimbulai do kuran i Kinoringan kumavid di duvo it ulun dino. I Yesus o palad do Kinoringan, ponong sid kosopulan om kosinangan om ponong sid kapatazan om kobinasaan. Sompri pogili i Kinoringan sid duvo it ulun di nosopulan dit inovit di Yesus. Sid keso it ulun, atalahas-no dot ino gama do Kinoringan, ino-no i kaadaan di sokoviai i kasalaan dot okudik nga aso gama antad sid ulun dino. Sid korukungo dit ulun dino tinumorima iosido di kovosihan do Kinoringan dot amu dinumahava iosido ko ginumuvail do Kinoringan.

Sid koduvo i tuturan engin i Kinoringan dot ensanan it ulun, guvas om

ginavo om barang nga isuhut kavi di kenginan do Kinoringan sampai mozo di Yesus. Tu iti-no it atag o vaza tumimpa di kovosihan om samod do Kinoringan. Sid di Yesus osodiri i kopolisan om i kapatazan penlaid. Ino-no i kososizan dit ongoinjil, Sid di Yesus i Kinoringan nokoriniba om nokorompok sid osibak om osusa it ulun, tu tomod manapul om posinang dit ongoulun (Matius 5,3-11)

Ong minonuturan it ongopiumpungan do Kristian kodori diri, aso kiroon dioti do bai mongimbulit mongusul di tuturan di Yesus. Ino-no o kiroon dioti, Ong monuturan ioti dot i Yesus mininsamung dot ulun dit orukung, varo purimon dioti dot ino Yesus diri kakali minsamung manamod om mogkovosihan dioti. Tu i Yesus okonko bai ulun di kodori diri, inoi nga kakali iosido tumoguvang dot ulun om mangada di kasalaan dot ulun sampai mangatag dit ongokosusaan om mongonsug do mozo sid hoturan do Kioringan sampai mongimbulai om mongolombus di samod do Kinoringan. Iri-ogi varo't ulun di pinatandon dit ongotuturan dino sid buuk. Inot ongosurat dino tinaud-no do gorija soumulumul sampai biano. Antad dino i harapan tokou dot ino Yesus diri nga kiguna sid di tokou sokovia, om sid di Yesus o kosodirizan di kopolisan om kapatazan penlaid di sokovia i riniba.

Koduvo: Osusa tokou-po do mokitalahas dot, Kuran-ka otopot ino hal dino bahagi di tokou?

Ong it ongoulun di hiza di Yesus, oruhai hinumarap ioti dot i Yesus o minangagazad dioti sid Kinoringan om i karajaan do Kinoringan. Topot ong minatai-no i Yesus, kuran-ka kopisamung tokou di Yesus diri om ino kopisomungan nga kiharati ponong sid Kinoringan? Sabap bai it ongoboros om tudukan di Yesus o kadapat tokou mamasa om mongohondom, iadko it ongoboros dit ulun vokon, ong sukul nokosurat-no sid ongobuuk. Inot ongoulun kavi mad natanus-no. Bai i boros dioti o kakali natandon sid buuk sampai i boros dino mad kovosihan om keloo dioti di niopung-no. Minsanko varo gambal dit ulun di minatai, kakali ino gambal dino okonko guvas om ginavo dit ulun dino.

Ong i kinososizan di Kitab Vagu om it ongoulun Kristian gulu diri, nga tanid-no. Boros dioti, Ino Yesus diri apasi-no vagu, gam apasi soumul-umul do tanid mantadko riniba (*Matius 28,20: Hondomo-no dikou, ioku diti mozo-vozo-oku dikou soumul sampai sid kovian do pomogunan*) sampai minangasip ioti di Yesus dino iadko it ulun Kristian biano mongoho di kosipan dot ulun Kristian. Ino kosipan dino mad kopitoguvangan di Yesus, minsanko a-emot iosido.

Antad di kinotimpunaan do gorija tinumimpa om minongohodtol it ongoulun Kristian dot ino Yesus antad sid Nasaret, i nisangkap-no dit ongofojal do Rom, nga nogulian-no vagu. I keso o kososizan do iadino, nga antad sid surat di Paulus 1. Kor. 15,3-8) *I Kristus minatai, gima i kasalaan tokou, nisuhut sid Kitab. sampai nokolobong-no om adau-po do kotolu, ginumulian-no iosido nisuhut di Kitab sampai minokimot-no iosido di Kefas om iri-ogi hopod om duvo om iri-ogi minokimot-no iosido dit ongoobpinai di labaan limo natus ot ulun noumpug, i kogumuan dioti kakali mizau sampai biano. Om iri-ogi minokimot-no iosido di Yakub om iri-ogi sokoviai it ongorasul. Om sid kopupusan-po minokimot iosido dohon... ka di Paulus.*

I Paulus sumasi di kinogulianan di Yesus antad sid ulun minatai, gima it a-ko piro it ongorasul om ulun vokon nakasamung di nogulianan i Yesus. Vokon-no dot toriso-iso, vokon-no i rombongan dit ulun. Kondiri di Paulus nokopiboros dit ongoulun dino (1. Kor. 9,1 om Gal. 1,13) Iri-ogi i Paulus dumahava om mongolumbatos di kinogulianan di Yesus sampai manantu di kosipan tokou (1. Kor. 15,14 *Bang amu nogulian i Kristus, tantu asot ontok di habal-za om asot ontok di kosipan dikou*, ka. Ensanan i kosipan dot ulun Kristian suvai kiguna, ong osokot sid kinogulianan di Yesus (1. Kor. 15,17: *Bang amu nogulian i Kristus, asot ontok di kosipan dikou*, ka. Ino-no o harati, ensanan i Habal do Kovosihan kiguna ko aso guna, ong banalko nogulianan i Yesus antad sid kuasa do Kinoringan, ko amu.

I kosipan dit ongopiumpungan do Kristian engat dot ino Yesus diri kakali apasi sampai biano om i hiza-po di rumikot, sampai penlaid (Ibrani 13,8: *I Yesus Kristus amu sumimban, konihab om iti biano sampai penlaid*).

Banal-no, minsanko i hiza di Paulus varo't ulun dit opiduvo o ginavo kananganko i kinogulianan di Yesus, gam sinumaap ioti di Paulus. Sid ugama do Yunani varo-no laid tangon retanko varo't ulun di nogulian-no vagu. Topot i kiroon dit ugama diri, atagal dot ogulian i guvas dot ulun, tu bai i hatod dot ulun o kiguna. Ong i guvas tantu aso harati. Na sid UR 17,22 mininghotbah i Paulus sid Tuhunan do Athen. It ongoulun di borontuvilon om kihukum sid Athen onining. Suvai minanarang i Paulus dot i Kinoringan o minongogulian di Yesus antad sid ulun minatai, tinumimpun-no ioti mongusiba om misingkavaro di Paulus sampai mogidu (32).

Minsanko i kinoruhangan di Yesus opiduvo i ginavo di nokening ioti di habal dit ongondu, om i hiza do kondiri di Yesus nakatanga sid dioti (Matius 28,17; Luk. 24,11; 17,22,36; Yahya 20,25). Ensanan i Habal do Kovosihan

nokengkakat sid kososizan kananganko i kinogulianan di Yesus (Rom 10,9: Ong mangakun-ko-no sid kabang-nu dot i Yesus o Tuhan sampai mangasip-ko-no dot i Kinoringan o minongogulian di Yesus antad sid ulun minatai, apasi-ko-no, ka.

Ino kinogulianan di Yesus okonko mad buntung di napasi-no vagu. Boros di Paulus sid 1. Kor. 15,35 dot ino kobuatano di Yesus di nogulian iosido nga vangun vagu do Kinoringan okonko onsi om raha di dang riniba. Tu *it onsi om guvas tokou amu kotungkus di karajaan do Kinoringan* (1.Kor. 15, 50). I kogulianan dit ulun minatai okonko koimbulitan di kososizan laid. I kososizan di Lukas om i Yahya gam varo boros dot i Yesus vagu kiguvas om kitulang om kinipon di kadapat mongogop do liniking o sada. Rontob-nopo, kakali kadapat i Yesus sumuva om lumabus sid ongakob, minsanko notombol-no i rongobon.

Sabap ino, sid di Yesus kopemot om kopisamung sampai kopitoguvang tokou do Kinoringan. Ino-no o panangan di Yesus, monulung iosido di tokou do tumorima do Kinoringan, tu sid di Yesus o kinembulazan dit agazo o samod do Kinoringan. I Sundu om kuasa do Kinoringan mongogiang dit ongomato om ginavo tokou, supaya kotutun tokou di Yesus om i Habal do Kovosihan. Manjadi ino kosipan dit ulun Kristian o minongonsi di kosipan sid di Yesus sampai minongolumbatos dot, Kasip-oku sid Yesus Kristus, tu rumikat vagu iosido, tu mongohukum dit ulun di mizau om minatai.

4. It usuran di Yesus Kristus.

Sid di Yesus nokembulai i hiza vagu bahagi ensanan i riniba. Iti-no o sabap, mongizap om mongiro tokou di hiza antad di toun di kinosinaan di Yesus. Kondiri di Kinoringan minonimban di kobuatano do riniba. Topot sid di Yesus minogidu-nopo sampai pakaso do Kinoringan it Ongobansa, retanko i saiens om i teknik mangahatul di sompomogunan. Ipat-ipat it ulun a-milo-milo monodiri om mongolumbatos do tumoguvang ko tumolikud do Kinoringan, dot sid di Yesus o kolumbatasan dino.

Ong onsizon tokou i kosipan tokou, pengkaa dino,

a) I kinourugan do riniba om i kosurutan do riniba sid pentongkop do sompomogunan, nga ginama do Kinoringan om iti-no o panangan di kinourugan: sumasi di Minongurug om Minamangun.

b) Antad sid kinotimpuunan kondiri do Kinoringan pendongou di riniba di kovosihan dau. Ogumu ot ongotanda dit isai om sera om siombo i Kinoringan.

c) Na ipat-ipat it ulun mopud ponong sid kopikoruhangan sid Kinoringan,

pengkaa dino ipat-ipat i rombongan ko turunan om bansa, nga sid tinoguvangon-nopo do Kinoringan.

d) Antad di kinotimpunaan, minogihim i riniba di dau do harapan sampai misingkinoringan om rinumanggal di hoturan om pinonuhuan do Kinoringan. Iti-no o sabap do varo lupu do Kinoringan bahagi di kavazao dit ulun di pakaso do Kinoringan.

e) Kakali minogihim i Kinoringan do vaza manamod di riniba om pengkakat di hoturan dau ponong sid kosopulan om kopioondusan do riniba, ino-no, minomili i Kinoringan di bansa dot Israel, dot i Ibrahim i nokogulu minangaranzat di bansa dino, supaya i bansa dot Israel jumadi do suntuan di kenginan om hoturan ko karajaan do Kinoringan. Ensan an it usul di bansa dot Israel manarang di kogozoo di samod do Kinoringan om i vaza do Kinoringan magavi mogihim di bansa dino, supaya kemumui ioti om tumorima di kobinsianan do Kinoringan.

f) Inot usul di bansa dot Israel nga kiguna ponong sid panangan dit ensanan i riniba.

g) Ino rikoton do riniba, ino-no, i karajaan om hoturan do Kinoringan, supaya i riniba mopud sid tinoguvangon do Kinoringan, okonko bai i hiza biano, inoi nga i hiza di tumalib di kapatazan dot ulun, i retanko hiza do penlaid (imatai sid Buuk di nabi Daniel).

h) Manjadi ipat-ipat it ulun varo tomodon, ino-no, monodiri iosido sampai mongolumbatos dot isai o harapan om rikoton dau. Tu sid upakat dit ulun kembulai do siombo ponong o koposizan dau, ponong sid kenginan om kopioondusan do Kinoringan antawa ponong sid kenginan om kapatazan kondiri.

Manjadi it usul di Yesus o mozo dinot valu liang. I boros di Yesus sid Yahya 3,16 o mongonsi om manarang dino hal kavi: *I Kinoringan banal-noko minanamod do riniba sampai nitahak it anak dau it iso-no, supaya ipat-ipat it ulun di mangasip sid dau amu atagak, inoi nga kasanganu di koposizan penlaid.*

Bahagi III: I KOSOSIZAN DI KRISTUS

Suvai nokotorima tokou dit ulun antad sid Nasaret, ino-no i Yesus, i gama om i nahajangan dau, sampai engat tokou dot ino dino kiguna bahagi di tokou om i vaza tokou humarap sid Kinoringan, iri-ogi kaharati tokou dit ongogaran om hormat di Yesus, di nokosurat-no sid Kitab om i napakai dit ongoulun Kristian kananganko i Yesus. It ongoulun Kristian di nokogulu Kristian o

minamakai dinot ongogoral dino iadko vaza mangakun om sumasi sampai pohodtol dot isai i Yesus dino.

1. I Yesus ino-no i Kristus.

Sid Kitab Laid varo't ongobahanda om gama pentalang dot i Kinoringan porikot dot iso't ulun, i manapul di bansa dau om i songriniba. It ongonabi pinentalang do kuran i Kinoringan minanapul di bansa dau di hiza di kodori, iadko antad sid kinuripanan sid Masir ko sid tanga do belantara om kakali manapul dioti sid tanga do kosusaan. Ino koponopulan dino amu engkod sampai sid penlaid (i hiza di rumikot-ogi). Sid Kitab Laid varo a-ko piro ulun di retanko inumahan-no do Kinoringan ko nabakal do Kinoringan bahagi di tugas do manapul om mongimbulai do kopioondusan.

I hiza do norungoi-no i karajaan dot Israel om Yahuda, minongohondom it ongoulun dot Israel di hiza di karajaan di Daud. I hiza diri banalko osinang i bansa dot ulun Israel, tu aso sangod, aso kosusaan antad sid ongobansa vokon om ahatul i gama dot ulun sumambayang sid Kinoringan. Ino hiza diri retanko suntuan di kopioondusan do Kinoringan. Manjadi sid tanga do kosusaan om korungazan di karajaan, minamahanda-no it ongonabi do varo hiza di rumikot do tumalib i kosinango om kapapago om kopioondusan di karajaan di Daud. I hiza di Daud diri, iseso o hoturan di hopod om duvo rurungan. Aso bansa vokon minonusa ko minonguripon dit ongoulun dot Israel. I raja Daud, retanko uripon om sakai do Kinoringan, supaya mangahatul iosido di bansa dot Israel isuhut di pinonuhuan om kenginan do Kinoringan. Gam nakapamahanda-no i nabi Natan dot i mongkupu di Daud pengkakat do karajaan vagu dot sid karajaan dino, i Kinoringan kondiri o pakama di raja dino om i raja nga pakanak do Kinoringan:

Tohudi it adau, ong orikot-no i sukad-nu, ipolobong-ku ikau sid palabangan dit angaki-nu, om manganu-oku dit iso antad sid anganak-nu do pojodizon-ku do raja. Ino-not anak dino o mongingkakat do valai bahagi dohon om i karajaan dau impapagan-ku sampai penlaid, ka di bahanda dino.(2. Samuel 7,12-13).

Manjadi it ongozabur (2; 110 om vokon) sumasi do iadino, minsanko it anganak om muaki di Daud a-kerad di bahanda diri. Sid Zabur sinumasi it ongoulun dot Israel dot i Kinoringan mongimbulai vagu di Almaseh di mad pinokoanak do Kinoringan om iosido jumadi do mangahatul di songriniba om vinangun, okonko bai i bansa dot Israel. (Zabur 2,7-8: *Ikau dino anak-ku. Bianco-no o kinapananganak-ku dikau. Pokitahako-no sid dohon it ongobansa*

*om itahak-ku dot ipasanganu-ku dikau i sokovia i it ongobansa sid pentongkop do pomogunan... Sabap tu it ongoraja banalko obolukung, sinumaap ioti di hoturan om kenginan do Kinoringan, ogumu o kosusaan om kahajangan di karajaan dot Israel. Topot kakali varo't ulun di hinumarap sid Kinoringan, gam tinumorima dit ongokosusaan iadko hukum do Kinoringan, gima a-kosuhut i bansa om raja dot Israel. Sid sokovia i it ongokosusaan a-mengkod ioti mongindazou do Kinoringan om mokisian do Kinoringan sampai humarap sid kabanaran om kotulungan om kapangatagan om kopioondusan do Kinoringan. Tu, ka dioti, i Kinoringan monuduk om mangagazad dit ulun dau sid tohudi. Inot ulun dino iadko tolid sid tuod di Daud (Yesaya 11,1-5 om 10): *Antad sid Tuod di Isai (i ama di Daud) varo mulit, varo mutolid di gamut sampai monguva. Sid dau-no ot intoronon di Sundu di Tuhan, i Sundu o kajangkaan om kohorotizan, i Sundu o kohukum om kakansang, i Sundu o pelo om porosi sid Tuhan....* Ino hiza di kopioondusan (schalom) miabal di hiza di Daud, aso sangod, kikabanaran, aso lumundu om aso mosikim om avantang i mangahatul, ino-no i raja. Ino dino nibahanda-po sid Yesaya 9,6: *Agazo o karajaan dau om aso kengkadan do kopioondusan sid kinogomon di Daud om sid karajaan dau, tu pihoton dau do kabanaran om sungkodon dau do hukum dot abanal antad biano sampai penlaid.**

I harati dino, ino raja di mangahatul di bansa om i vinangun, ino-no o pakakas di Kinoringan di mongumbasih om mangagazad di bansa om songriniba. Manjadi ino harapan dit ulun dot Israel kinumavid om minongolombus it ongoulun Kristian sampai minomungaran om minamangkat di Yesus dot Almaseh (Messias). Almaseh, ino-no i harati, it inumahan-no do jumadi do raja (iadko nabakal-no do raja). Ong boros Yunani, ino-no, Kristus. Ong Momogun, mad i garal do Minananggung miabal di pongoretan dino. Iti-no o kososizan dit ongokristian diri, I Yesus, ino-no i raja di rumikot, i Kristus. Boros dioti, I Yesus kihak antad sid Kinoringan bahagi di karajaan dit ensanan i riniba, okonko bai i bansa dot Israel. Sabap i Yesus minonori di sokovia i it ongosangod om ongokuasa di sumaap di Kinoringan om i bansa dau. Inot ongosangod okonko bai ulun om bansa vokon, inoi nga i vozoon do rogon om it ongosakup dau di momorinta di riniba ponong sid kasalaan om karanggalan di pinonuhuan do Kinoringan. Iti-no o sabap sumasi i 1. Yahya 3,8 dot: *Nokorikot-no it Anak do Kinoringan, tu mominasa sampai mananus di gagamaon di vozoon do rogon.*

Manjadi ino Minananggung okonko sid tanga do riniba, inoi nga sid vanan

do Kinoringan, i monguasa di sokoviai. I mogom sid vanan do raja ko ulion, ino-no i sakai dau.

Ishut di Zabur 110 nensavat-no i Yesus om inogom sid vanan do Kinoringan. Banal-no, ino boros dino bai suriban. Aso tempat do iadko tempat do riniba ino surga om ino vanan do Kinoringan. Ong sid riniba, it ogomon ponong sid vanan mad ogomon dot kohormatan. Ino-no o kosondoto, I Kinoringan pinengkakat di kuasa di Sundu om karajaan dau ponong sid ongoulun di nokotorima om nokotutun di Yesus om sumamba om sumuhut di hoturan di Yesus. Sabap ino, i Yesus dino mangahatul dit ensanan i riniba om vinangun om mogkovosihan di sokoviai it ongoulun, minsanko it ulun dit osibak om it ulun dit aso ngaran.

Ong biano, ino-no i garal, i KRISTUS mad ngaran banal di Yesus. Sabap ino atag do mongohondom tokou dit inantadon di ngaran om garal dino. Tu suvai iadino o garal om pangkat om ohorotizan-ogi do songkuro kagazo o guna om kovosihan di Yesus sid di tokou dit inovit-no dau sid Kinoringan, supaya i tokou obebas do tumoguvang do Kinoringan.

2. I Yesus ino-no i Tuhan.

I nokogulu-no Kristian, nga ulun do Yahudi. Ioti minomili di garal dot Almaseh bahagi di Yesus antad sid Nasaret. Manjadi, kodung nokolombus i Habal do Kovosihan sid ongoulun Yunani, it Ongoyunani amu kaharati di pongoretan Almaseh ko Messias. Minsanko nasalin-no i pongoretan dino (inumahan-no = Kristus), kakali aso harati sid dioti. Tu sid kobudayaan do Yunani aso tradisi do mongumau di bakal do raja. Iti-no o sabap dot i pongoretan Kristus jinumadi do ngaran banal di Yesus; ino-no, Yesus Kristus, ka. Na sid tradisi do Yunani varo tanid o garal dit agazo o harati, ino-no, TUHAN. ko ong Yunani KYRIOS. Sid solinan di Kitab Laid varo-no napakai laid ino pongoretan dino bahagi di YAHWE ko ADONAI, ino ngaran do Kinoringan di notorima di Musa. Iti-no o sabap it ongokristian do Yunani minomili di garal dino bahagi di Yesus, ino-no Tuhan Yesus, dot i harati, i Yesus antad sid Kinoringan om i Yesus kikuasa di tumalib di sokoviai it ongokuasa vokon. I hiza diri bai i Kaisar ot arait do Tuhan (KYRIOS) dot varo harati nokovozo di mad, Anak sid Kinoringan. Iadko i Kaisar Augustus, varo surat sid ongosiin dot, I Augustus ino, anak di mad Kinoringan o Kaisar, ka. Kodung Tuhan, i mad Kinoringan, tu kikuasa do mamasi om mamatai. I Paulus, ong kodung minangahabal iosido di Habal di Yesus sid pomogunan do Yunani, sinumasi dot, I YESUS O TUHAN, ka (1. Kor. 12,3). Ino pongoretan Tuhan tanid mantadko bai tuan. Ong Tuhan, tantu kovozo i harati do

kigalar antad sid Kinoringan. Ong bai tuan, ino-no o harati, i manansanganu (dot uripon), ino pongoretan di misaap dot uripon (it ulun dit asanganu do tuan).

Kondiri di Paulus minangarait di kondiri dau dot uripon di Tuhan Yesus, tu iosido nokosuvang sid kuasa om tinaud di Yesus. Aso-no kiroon dau do varo-po kenginan kondiri. I manansanganu mangahatul di koposizon om koposizan sampai i kapatazan dit uripon dau (Rom 14,7-9 om 2. Kor. 5,2) *Isot ulun nga aso apasi bahagi di kondiri dau om matai bahagi di kondiri dau. Ong apasi tokou, dang Tuhan i koposizan tokou, ong matai tokou, dang Tuhan i kapatazan tokou. It apasi tokou-po antawa apatai tokou-no, nga i Tuhan o sanganu di tokou. Sabap ino-no i tinomod di Kristus di minatai om nogulian iosido, supaya ajadi iosido do Tuhan dit ongoulun di minatai om i mizau.*

Kodung iadino, okonko i Taurat ko surat o suntuan di gama dot ulun, inoi nga i Yesus i Tuhan o suntuan om ponukung ko ponulid dit atag o gama tokou.

Ong sumasi i Kristian dot, i **Yesus o Tuhan, ka**, engat tokou dot ensanan tokou nokosuvang sid kenginan om hoturan om karajaan di Yesus. Ong banalko i Kinoringan o Tuhan di sompomogunan om it ipat-ipat it ulun, tantu i vaza tokou sumuhut di Kinoringan nga mopud sid tinoguvangon di Yesus. Tu i Yesus o mongimbulai om posuhut di tokou ponong sid Kinoringan.

Na sid Kitab Vagu varo-po harati di pongoretan KYRIOS di tanid mantadko ino natarang sid savat dino. Sid ugama do Yunani nipungaranan-no it ongopinokokinoringan om ongorogon do kyrios. Ino garal dino minongohor-mat di boginisan dit ongokuasa dit aharap dit ulun Yunani. It ongoulun diri rinumosi-nopo dit ongokuasa di monusa di riniba (gonit, korud, vaig om i retanko Minamangun), gam ogumu it ongokuasa di iadino aharap om orosi ioti. Topot i kososizan dit ongokristian sid dioti pengkaa dino, Bai iso-no o Kyrios = Tuhan, ino-no i Yesus i nogulianan, om iosido kagi o harapan do Kinoringan. Tu sokovia i riniba om vinangun, a-milo-milo sumingkodut sumamba sid di Yesus sampai sumasi dot i Yesus ino-no i Kyrios bahagi di kohormatan do Kinoringan it Ama (Fil 2,11). Kagi iti-no i kososizan dit ongorasul, I Yesus o Tuhan di sokovia i it ongokuasa di minomorinta di riniba. Sid di Yesus kinengkadan di kuasa dioti dino.

It ulun Kristian nakalabus-no antad sid kuasa dot otuvong sampai ohoturan-no di samod om kovosihan di Kristus. Ong sid ongokuasa diri, ginaratan-no i riniba. Topot ong kodung nakamung-no sid kopomorintaan di Yesus, obebas-no it ulun do bai sumuhut-po om humarap sid di Yesus.

Iadko it Ongomomogun, oporinta dit ongorogon dot a-milo-milo pasamba sid ongorogon do boli om ongodupot vokon. Ino hoturan dino soumul-umul om ensanan dot aso tinganan mogidu sid hoturan om kuasa diri. Manjadi i hiza di kumoristian it Ongomomogun, nengkod-no i kuasa om amu-no agaratan-po dit ongorogon. Ong biano, tu nakamung-no sid di Yesus om nobebas-no sid gama, oruhai dot varo-no vagu ongokuasa dit engin momorinta di tokou. Okonko rogon iadko i gulu diri, inoi nga it ongokuasa di vinangun, ino-no it ongokozian om karalazan, ko it ongokuasa do razat, it ongokoubasan, i kolunduo, i ekonomi, i koringgitan, i mokipangkat, i bansa ko i parti antawa i bai kinomol om i magavuk. Ino dino kavi mad ongopinokokiningan dit ozi monguripon dit ulun Kristian om it ongopiumpugan om gorija tokou.

Na a-insan dot obebas it ulun di kosuvang iosido sid iso o kuasa. Bai sid di Yesus varo kobebasan dot otopot, tu i gama sumuhut di hoturan om kenginan di Kristus, nga tanid-no (Gal. 5,25--6,2) Sabap i Yesus minonori di sokovia i it ongokuasa (Kolose 2,15; Matius 28,16-20; 1. Kor. 15,24..) Sabap ino, it ulun Kristian humarap di kotulukan di kamanangan di Kristus sid sokovia i it ongokuasa di kakali misingraja om misingtuhan.

3. I Yesus ino-no Anak do Kinoringan

Tanid mantadko i garal dot i Yesus nga i raja di noumahan-no ko raja Almaseh om Kristus om i Tuhan, varo-po pongoretan vokon sid Kitab om sid tudukan do gorija, ino-no, i Yesus nga Anak do Kinoringan. Vokon-no ong inonsi-no i kosipan dot ulun Kristian sid pamarasan dot, *Kasip-oku sid Yesus it Anak do Kinoringan*, ka. Rontob-nopo ogumu ulun di hiza tokou biano mad ogolivong di pamarasan dino. Boros dioti, kuran-ka dot i Kinoringan maganak iadko riniba? ko manansavo/ mokisavo iadko i pinokokiningan dit ongougama do Yunani om Kaling ko vokoni?

Na i Kitab mamakai dino garal dino iadko suntuan om suriban. Sabap ino, atag do humarati tokou di tinomod di vaza dino monuriban om posuntu.

Banal-no, it usul di Lukas sid Fasal 1 dino monuturan do banalko sumuni i Mariam di minogontizan iosido sampai minusu iosido di Yesus. I Lukas, hiza di minonginsosok iosido dit ongoulun di nokensomok sid di Yesus antad di kinosinaan dau, minongumpug di sokovia i it ongotuturan kananganko i Yesus antad dit opodok-po, nga nakasamung i Lukas dot ongoulun di minangasip do banalko osundu jno kinosinaan di Yesus. I hiza diri kagi ogumu ot ongotuturan sid ongobansa om ugama vokon kananganko it a-ko piro ot

ongoulun di kigalal om kipangkat sid dioti (iadko i Kaisar sid Jipun om Kina diri ko it ongoulion dit ongosuku bansa sid Afrika), retanko it ongoraja dioti nga minaganak di pinokokinoringan dioti. Minsanko i kinosinaan di Musa om i Isaak nga varo kosunduvo, ka di Kitab Laid.

Na sid Zabur 2,7 narait-no laid i raja dot Israel dot, I pakaanak do Kinoringan, ka, mad nosingkapu-no,ko mad anak dit usan-usan, dit inanu-no do Kinoringan do mad anak banal dau. I tinomod diri, retanko i raja dot Israel o sakai do Kinoringan di kumavid di hoturan om barakat do Kinoringan sid bansa dau om sid pomogunan. Sabap ino, ino pongoretan "anak" bai mongimbulai dot iosido o tumungkus/monungkus di kuasa antad sid Kinoringan (Zabur 2,7-8: *Itahak-ku dot ipasanganu-ku dikau i sokovia i it ongobansa sid pentongkop do pomogunan, ka.*

Miabal dino i retan sid Kitab Vagu dot i Yesus nga Anak do Kinoringan. Sid Markus 12,1-12 nitarang-no di Yesus i kopiopudan do Kinoringan om i bansa dau sid suriban dit ongoulun di minoniwa di kabun dot anggur. I bansa dot Israel nga bansa di dang Kinoringan. I kogunaan di bansa dino, monguva bahagi di Kinoringan, ino-no mongohormat om pasasi di kuasa om kohormatan do Kinoringan sid tanga dit ongobansa vokon. Manjadi hiza do kokotuai, monuhu i sanganu di Kabun dot anggur (Kinoringan) dit uripon dau (i nabi) rumikot sid minoniwa do mongoi di siwa sid dioti. (i minoniwa: it ongoulun di mangahatul di bansa dot Israel). Topot it ulun di minoniwa minonunsub dit uripon om minamambang-no dot aso-not ovit dau. Iri-ogi monuhu-no vagu i sanganu dit uripon vokon. Varo-no binambang, varo-no pinatai dioti. Manjadi sampai siti manarang i suriban di kobuatano di bansa dot Israel iadko inusul sid Kitab Laid, ino-no, kuran it ongonabi minongonsug di bansa dot Israel om it ongoulion do sumuhut di hoturan om kenginan do Kinoringan, iadko nokembali-no laid sid di Musa. Sabap it ongonabi diri, vokon-no nosunsub-no om pinatai-no ioti, ong nokotiim ioti do pemumui vagu di bansa dot Israel sid Kinoringan om i kabanaran dau.

Iri-ogi momongo i suriban sampai manarang dot i sanganu di kabun, nga kianak dit iso-no di banalko sinamadan dau. I pongitungan dau, Ong a-otorima it ongouripon dau, tanid-no ong anak banal di sanganu mongoi di siwa, ka: *Inot Anak-ku dino rumosi-no ioti*, Topot nemot-po dioti, gam miniboboros ioti dot, *Ialo dino monungkus diti kabun iti. Tokou-no patazo tokou ialo dino om otungkusan tokou-ogi iti kabun. Manjadi pinatai-no dioti it anak dino om pasapazo-ogi sid govuton*, ka. Iti suriban diti nga manarang do kuran i Kinoringan minonuhu di Yesus Kristus do pemumui di bansa dau

sid Kinoringan om kuran ohukuman i Yesus dot ulun dit amu minangakun dot ioti nga asanganu do Kinoringan, gam minoniim ioti do mingkakat kondiri om misingkinoringan om misingtuhan-no.

Iti suriban om i kososizan do Kitab momeda om monodiri dot ombo i bai susuhon do Kinoringan ponong sid bansa dot Israel om it Anak, i sakai om wakil banal do Kinoringan di kumavid di kabanaran do Kinoringan. Manjadi it ongokristian di nokokristian gulu diri minanarang do kihak i Yesus antad sid Kinoringan kondiri dit isot ulun nga aso vokon do nakadapat. Topot kakali i Yesus nokosuvang sid hoturan om tinaud do Kinoringan. Sabap ino, iti kapamarasan dino, iso-no o panangan, ino-no,

I Yesus mongontok do Kinoringan ponong sid di tokou. Sid di Yesus kopitoguvangan tokou do Kinoringan di mad riniba iosido, nga kakali varo pitonidan di Yesus ponong sid Kinoringan.

Iti diti o suromo di Kitab Vagu kananganko i Yesus Kristus. It ongokristian kodori diri om sampai biano songitung-itung om monguro-kuro do kuran i Yesus nga ulun antad sid Kinoringan di kopezo do Kinoringan om kopezo-po iosido di tokou, tu mad nakamung iosido sid Kinoringan do mangahatul om mogkovosihan di tokou o tomodon, nga kakali kopihiza iosido nakamung sid di tokou sampai monongobpinai di tokou. Ino suromo dino, songkuro-nopo kogumuo dit ongopanarangan om ongosuriban, nga kakali amu miuma manarang om mongintutun om koduzan, tu aso tinganan sukabon it osusut banal.

Varo-po harati sid garal dot, Anak do Kinoringan, ino-no, Bai i Yesus o nokotoguvang sid Kinoringan dit atag o kavazao. Bai i Yesus ot atag o gama ponong sid Kinoringan dit aso borotuduon, iadko it anak sid molohing dau. Tu i Yesus minongoguna om minongohormat do Kinoringan sampai sinumuhut di kenginan do Kinoringan dot iso nga aso-no nalazan. Minonuduk iosido di kinoruhangan dau minta dua dot, Ot Ama dahai sid surga. ka. Sid pamarasan dino "dahai" nakamung i Yesus sid di tokou. Iri-ogi monuturan i Yesus kananganko i Kinoringan sampai momoros dot, It Ama-ku o minonuhu dohon, ka, om, It Ama dikou sid surga, ka (Matius 6,8 om 5,48). Sino dino kembulai i pitonidan do kuran i Yesus nokenksomok sid Kinoringan om kuran i tokou suvai kopitoguvang di Kinoringan, ong kumoruhang tokou di Yesus.

Ino-no i suromo, I Kitab laid om i Kitab Vagu mongimbulai di kosusian di kohormatan do Kinoringan (I Musa om i Eliya ko i nabi Yesaya a-kosirod do Kinoringan, tu opondou banal sid tinoguvangan do Kinoringan, iadko sumirot sid mato dot adau, tu aso tinganan sumirot) nga kakali varot isot ulun di

nokensomok sid Kinoringan iadko it anak minsomok sid ama dau. Antad sid Buuk do Kinotimpunaan sampai pengavi di Kitab ogumu o panarangan do nopitas-no i kopinsamakan di riniba sid Kinoringan, minsanko inurug i riniba nokoluu di kobuatano do Kinoringan om mad wakil do Kinoringan i riniba sid tanga do vinangun (Buuk Kinotimpunaan f. 1-2). Sabap i riniba diri (Adam om Hava) nosunsub-no sid Kabun dot Eden, om varo-po boros di Paulus di manarang di kobuatano do riniba, i boros dau, I riniba mad sangod do Kinoringan om sumaap do Kinoringan (Rom 8,7).

Iti-no o sabap, it ongonabi minanarang di hukum do riniba, gima banalko nakaranggal i bansa diri. Ko it ongoulun Yahudi kinumunsi di porinta do Rom (inot ulun di pakaso do Kinoringan) do mamatai di Yesus sid kazu do sangkap om iri-ogi mongogusa-po dit ongoulun di sinumuhut di hoturan di Yesus (inot ongokristian di gulu diri). Sabap ino manarang i Kitab di kavazao do riniba, retanko sid rondom om kotuvangan i riniba (Matius 4,17) do bai iso o titiu om panganavau sid tanga di rondom dino (Yahya 8,12) di mongimbulai dit kanavahan do Kinoringan, supaya i riniba, mogulu i bansa dot Israel kemot di ralan kumaa sid Kinoringan sampai mamung sid di Yesus om pemumui dit ulun vokon sid Kinoringan. Ino titiu om panganavau dino, ino-no i samod do Kinoringan om i kabanaran do Kinoringan. Ong tumorima it ulun dino samod om kabanaran, iri-ogi iosido mad suntuan om pakakas dino samod om kabanaran di mangagazad dit ulun vokon ponong sid Kinoringan. Sabap i Yesus dino antad sid Kinoringan, iosido minogulu nokosuhut om nokoposuntu sid riniba di samod om kabanaran do Kinoringan sampai minonuluk di kenginan do Kinoringan.

Hiza di kinopodsuan di Yesus, varo dolou antad sid avan di minomoros dot, *Ikau-no dino ot anak-ku di sinamadan-ku*, ka.(Markus 1,11) dot ino boros dino varo-no laid sid Yesaya 42,1 kananganko it uripon do Kinoringan. (Ong sid Yesaya diri, ino pamarasan dot, Uripun di Tuhan, nga ponong sid di Yesus nokoboros-no do mad bahanda om kentalangan).

Manjadi kondiri di Yesus ong minta dua iosido, minomoros dot, *Mongindazou-oku dikau ot Ama, Tuhan dit awan om i tana* (Mat. 11,25) ko i hiza sid kabun do Getsemane, minindamo iosido dot, *Ot Ama, elaan-nui kavi. Palazono i subung do kapagasan, isuhut di dikau do kenginan*, ka (Markus 14,36) Sid Injil Yahya nokembulai banal i kensamakan di Yesus sid Kinoringan, tu varo boros, It Ama manamod dit anak om nitahak dau i sokovia i hoturan sid palad dit anak (Yahya 3,35; 10,17; 15,9; 17,23-24,26).

Na i Yesus okonko bai avanus om okosog ot ulun. Ensanan i kavazao om kobuatano sampai i bahazan isuhut di sokovia i hoturan om kenginan do

Kinoringan. Ino katatapo di Yesus ponong sid Kinoringan retanko, Sinumuhut i Yesus sampai matai, o ino-no minatai iosido sid kazu do sangkap (Filipi 2,8). Ino dino tanda do nokosokot i Yesus sid Kinoringan do iadko anak-po (Yahya 5,19: *It anak amu kapangagama do sumuhut di kenginan dau kondiri, inoi nga suvai kemot iosido di gama dit Ama. Tu nunu-nopo i gama dit Ama, ino-no i gama dit anak. Sabap it anak, samadan dit Ama, ka.* Ino boros dino manarang dot it anak aso hak kondiri om aso kuasa. I Yesus okonko Kinoringan koduvo antawa kobuatano do mad Kinoringan di rumompok do Kinoringan. Ensanan i kobuatano di Yesus om i gama dau, nga antad kavi sid Kinoringan om sumokot sid Kinoringan iadko i gama dit anak di mopud antad sid ama. I Kinoringan minonuhu-no di Yesus (ong sid Injil Yahya, ingapat nopod minomoros i Yesus manarang dot it Ama o minonuhu dau) sampai minanahak di Yesus do tugas sid tanga do riniba. I kenginan do Kinoringan, nga jinumadi do kenginan di Yesus om i gamaon di Yesus, nga gamaon do Kinoringan.

Sabap i Yesus nokosuvang do iadino sid kenginan om gamaon do Kinoringan, ino kenginan om gama dau kihak om kiguna di tumalib di sokoviai i hak om guna do riniba. Sabap ino kobuatano om gama di Yesus nga antad sid kesaan dau sid Kinoringan. Kadapat i Yesus momoros dot, *Ioku diti om it Ama iso-no, ka* (Yahya 10,30) om *Isai-nopo i mimot dohon, nokemot-no iosido dit Ama, ka.* (Yahya 14,9). Iti-no o sabap, aso vazaan tokou vokon tumoguvang do Kinoringan tanid mantadko sid di Yesus. *Iso nga aso kotutun di Ama, baiko it Anak om isai-nopo it otudukan dit Anak, ka* (Matius 11,27). I Yesus okonko bai ulun di nokelo om nakaharati dot isai i Kinoringan, inoi nga ulun di nokopezo sid Kinoringan. Manjadi ino dino retanko om osuntu-no sid kapamarasan dot i Yesus nga Anak do Kinoringan. Iti-no o sabap i tokou humarati do Kinoringan sid kavazao om boros di Yesus, tu sid di Yesus mad nakatanga sid di tokou kondiri i Kinoringan. I minonuhu-no i Kinoringan di Yesus rumikot sid riniba, ino-no i vaza do Kinoringan mintalang sid di tokou di kondiri dau. I minangakun i Kinoringan dot i Yesus, i sinamadan dau, matai sid kazu do sangkap, ino kinapatazan dit kamalu banal, nga vaza do Kinoringan mongimbulai di samod dau om i vaza popiaandus di riniba. Iti-no o puun di kosipan tokou ulun Kristian om i kosipan sid di Yesus Kristus. Topot ino pamarasan dot i Yesus nga Anak do Kinoringan okonko tudukan dit a-milo-milo harapan om kosipan, minsanko amu kaharati, inoi nga mangasip tokou do kuran i Yesus nokopezo om nokopitanid do Kinoringan sampai mamakai tokou ulun Kristian ino pamarasan dot, Anak do Kinoringan iosido, isuhut dit ohorotizan dit ongoulun kodori diri om i vaza dioti monguji

dot ulun di kikosunduvo.

Antad di kohorotizan dino tinumimpuun-no i goriija do mongugal om mongitung di suromo di Yesus dot antad sid Kinoringan iosido, supaya osodiri banal i hal dino sampai amu malid it ongoulun Kristian sid kosipan. Antad sid pongitungan dino nokembulai i tudukan do trinita ko i Kinoringan do tritunggal. Ino vaza do goriija diri monodiri om manantu do nunu i harati dino, amu oruhai mongusul om mongimbulit. Kagi okonko sokoviai i gama diri manarang om mongolumbatos, nga gama dot atag di minoghihi ioti di katapatan di hal dino. Varo-po nakagavul i hoturan do porinta diri, varo-no kopomolitik om sampai mirurumpak-po. Om i vaza dioti manarang diri isuhut di dioti do pongitungan om keloo om kohorotizan di kobuatano do Kinoringan om vinangun, amu miabal di tokou do pongo-horotizan biano om i vaza tokou mongintutun di kobuatano do pomogunan om riniba.

Varo duvo vaza mamalid dit osusa tokou do hondomon om ontupaton, ino-no: Ong it ugama do Yahudi minomoros dot, i Kinoringan iso-no banal dot aso tinganan pamung-po di Yesus di dang riniba. Ong i Yesus bai rinibai, ka. Ong it ulun Yahudi bai minongiro, kaluto ong i Yesus ulun dit odundungan do kovosihan do Kinoringan om kikuasa antad sid Kinoringan, nga kakali riniba iosido. Ko it ongoulun di hinumarap sid keloo do riniba (Filosofia) minomoros dot, Ong i Yesus bai suntuan ko ondig-ondig do Kinoringan, ino-no vaza do Kinoringan pemot di kondiri dau sid tanga do riniba. Okonko nokoriniba i Kinoringan, inoi nga nokosusut i Kinoringan sid di Yesus, ka. Ong iadino, aso kosipan tokou sid di Yesus, inoi nga bai kosipan di maza sid di Yesus ponong sid Kinoringan. Iadko it ulun Yahudi di mangasip sid Kinoringan, gima varo panarangan sid Kitab Laid, ko i Silam mangasip sid Kinoringan, gima i tudukan di Muhammad. Topot i tudukan di Habal do Kovosihan tanid, ino-no, sid di Yesus nokemot tokou do Kinoringan sampai sid di Yesus nokopiobpinai tokou om anak tokou do Kinoringan sampai sid di Yesus i Kinoringan jinumadi do Tuhan tokou. Manjadi i Paulus om iri-ogi i Yahya om i surat sid Ibrani minoniim manarang di kobuatano om pongohorotizan dino, isuhut di vaza kodori manarang sid suromo om sid tangon. Varo minomoros dot i Yesus antad di kinotimpunaan nokembulai antad sid Kinoringan om nokoriniba-ogi, ko i Yesus nga "boros" do Kinoringan, ino-no i kuasa di keloo dit antad sid Kinoringan. Varo-po minomoros dot i Yesus nga inusu do Kinoringan i hiza di kodori banal, hiza di guluko i kinotimpunaan, ka. Ino dino kavi, vaza manarang dit aso tinganan tarangon. Kenginan dioti mangaharati dot i Yesus, it Anak do Kinoringan okonko bai vinangun do

Kinoringan, ko inurug do Kinoringan, gam nakamung-no i Yesus sid kobuatano do Kinoringan. Ong otopot, ino dino kavi bai suntuan om suriban di manarang dit banalko aso tinganan tarangon i suromo do Kinoringan. Rontob-nopo, suvai inot ongovaza manarang om manantu dino o minonulung di gorija do sumokot sid kosipan dot atag, ino-no i kosipan sid di Yesus di Tuhan om Kinoringan tokou.

Varo-po kopolidan koduvo, ino-no, Isuhut di tudukan sid Kitab Laid i Yesus mad Kinoringan, di nakatanid-no sampai sinumuvang sid kobuatano do riniba (Filipi 2,6; Yahya 1,1-3; 1. Kor. 8,6; Ibrani 1,8). Tigogi retanko dit a-ko piro it ulun dot i harati dino, i Yesus, nga Kinoringan dit osodiri mantadko i Kinoringan, sampai varo duvo o Kinoringan. I hiza diri kagi ogumu it ongougama minanarang do varo a-ko piro o kuasa ko pinokokinoringan dioti diri. Iti-no o sabap minongohodtol i gorija dot i Ama om it Anak nga iso-no. I Yesus okonko kinoringan koduvo, inoi nga iri-no ko iri Kinoringan di bai duvo o vaza, Ama om Anak. I Yesus okonko Kinoringan rumompok do Kinoringan, inoi nga kondiri i Kinoringan di nokoriniba sid di Yesus. Ong amu osodiri it Ama om it Anak, tantu i Kinoringan a-nokositid di tokou sid Anak dau Yesus. Ong okonko iseso i Ama om it Anak dot iri-no Kinoringan, tantu i Kinoringan a-kasampai sid di tokou sid saralom di Yesus. Ino duvo pamarasan di mad misaap, moniim manarang di suromo do Kinoringan om i Yesus dino, nga onsi di kososizan tokou kananganko i Kristus.

Varo-po kopigogutan kananganko i Sundu dot Osusi ko Sundu do Kinoringan. Noboros-no laid di Paulus dot varo trinita, ino-no i Kristus om Kinoringan om i Sundu dot Osusi, retanko ino dino o rikoton di kosipan tokou, ka. Aso boros di Paulus diri do kuran o kopioputan di Kinoringan it Ama om Anak om Sundu dino. Sino dino varo kopomolidan retanko i Sundu do Kinoringan bai hojimat antad sid Kinoringan, ka. Boros di tudukan do gorija sid tudukan do trinita, i Sundu dot Osusi, nga Kinoringani di mongusaha sid gama om kobuatano dot ulun, nga varo pitonidan ponong sid Kinoringan, i minongurug dit avan om i tana. Ino-no, i Kinoringan di varo laid guluko i kinotimpuunan di nunu-nopo om i nokoriniba sid di Yesus, supaya osomok iosido sid riniba, jinumadi do kuasa di Sundu dau sid ginavo om koposizan dot ulun di monimbaru di kavazao om gama dot ulun. Minsanko nakatanid-no ino kuasa dino, nga kakali nokezo ino kuasa do Kinoringan, ka. Iti-no i suromo di tudukan do trinita ko tritunggal: I Kinoringan mad tolu-no o vaza dit aso tinganan tarangon om gomiton, suvai i Kinoringan nga i Minamangun

ong nokopisamung tokou do Kinoringan sid di Yesus Kristus, it Anak, om i Sundu dot Osusi o minongogiang di ginavo tokou. A-kemot tokou di Kinoringan sid di Yesus, ong okonko i Sundu do Kinoringan o kumiboros sid ginavo tokou sampai kopitoguvang tokou di Kinoringan i Ama om i Minamangun di tokou. A-karamit tokou di Sundu do Kinoringan, ong okonko ino Sundu dino mangagazad di tokou sid di Yesus Kristus, supaya humarati tokou dit Ama di minongurug di tokou. Ino tolu vaza tumoguvang om tumoronong sid Kinoringan o vaza di kosipan tokou sid Kinoringan it Ama, Anak om Sundu dot Osusi. .

Na varo-po iso hal di kiguna bahagi di tokou. I Yesus okonko bai wakil do Kinoringan sid tanga tokou, inoi nga nokoriniba iosido, supaya i tokou, ulun di mad nokedu-no antad sid Kinoringan, minsanko anganak tokou do Kinoringan, manansanganu vagu om kotungkus vagu di kuasa dot anganak tokou do Kinoringan. Ong i Paulus manarang dot i tokou pinokoanak-no do Kinoringan, iadko nosingkapu-no, gima i Yesus, ka. I Yesus, tu Anak do Kinoringan dit otopot, mongontok di tokou, supaya i tokou tumorima di kovosihan om kobinsianan do Kinoringan sampai kadapat tokou manangama do Kinoringan. Natanus-no i hoturan laid dot anganak tokou do Kinoringan, gima nokedu-no antad sid tinoguvangon do Kinoringan om nosunsub-no, gima i karaatan om karanggalan do riniba. Suvai i Kinoringan nokoriniba om nokorompok do riniba sid di Yesus, iri-ogi varo vaza muli sid Kinoringan om jumadi tokou dot anganak do Kinoringan. I Paulus banalko mongohodtol di hal dino: *I hiza di kinoponulukan do janji, sinuhu-no di Kinoringan it Anak dau, it inusu do riniba om nokosuvang-ogi sid hoturan do pinonuhuan, supaya iosido o monobus dit ongoulun sid hoturan do pinonuhuan, supaya kotungkus tokou di kuasa dit anganak om ajadi tokou do varis (do Kinoringan).* (Gal. 4,4-5) om iri-ogi: *Songkuro-nopo kogumu dot i Sundu o mangagazad, ino-no it anganak do Kinoringan.. Sid saralom di Sundu dino kopongodim tokou-no dot Kinoringan dot, Abba, ka, o ino-no, O Ama, ka.* (Rom 8,14). I Paulus pinopuhondom di vaza di piumpugan diri do kakali mamakai di boros dot Ibrani, Abba, sid gama minta dua. Ino dino vaza manangama do Kinoringan, ka di Paulus, ginama di Yesus, tu i kuasa dau minionobus di tokou om pajadi di tokou dot anganak do Kinoringan. Manjadi ino gama tokou do manangama do Kinoringan, nga ginama di Sundu dot Osusi, dot ino Sundu dino, nga Sundu dit Ama om Sundu dit Anak, di monuduk di tokou do manangama do Kinoringan: *A-elaan tokou do nunu ot apatut ot indomoon di minta dua tokou. Topot antakan tokou di Sundu sid saralom di homu dit a-koumbongut. om i*

Kinoringan, i mongimpuras dit ongoginavo do riniba, kelo di harati di Sundu di mongontok dit ongoulun di nosusi, sumuhut di kenginan do Kinoringan, ka.(Rom 8,26-27) Sid gama do minta dua do iadino kembulai dot i tokou anganak do Kinoringan. I tokou nengkod-no do sangod do Kinoringan ko bai uripon do Kinoringan dit ohukuman, gima a-nokosuhut di hoturan do Kinoringan. Gam anganak tokou, gima it Iso it Anak do Kinoringan sampai najadi tokou do vangun vagu, ulun vagu di norolongan di Sundu dot Osusi, ulun dit oebas do sumuhut di kenginan do Kinoringan, isuhut di kavazao di Yesus di nokogulu nokosuhut di kenginan do Kinoringan.

Kananganko i pamarasan dot i Yesus inusu di Mariam di sumuni-po iosido, bai onibak o panarangan siti, ino-no, Varot ulun biano di momoros dot amu kasip dino boros dino. Ino pamarasan dino amu moniim manarang do kuran o kinosinaan om kinusuvan di Yesus. Ong ioti Roman Katolik, varo tudukan do gorija dioti dot i hiza di musu i Yesus, kakali i Mariam sumuni sampai penlaid iosido sumuni, dot i harati di tudukan dino, i kulaput di paganakan di Mariam okonko bai hiza dit inontizan a-kobubus, inoi nga kikulaput iosido pempatai (minsanko varo-po anganak vokon dau). Manjadi ogumu it ulun dit amu mangasip dino pamarasan dino, retanko ino dino tantu a-nokonong, gam mengkod ioti mangasip ioti sid Kinoringan, gima ino kapamarasan dino. Dot ong otopot, okonko i hal do kulaput di paganakan o tomodon di kosipan dino. Bai i Matius om i Lukas mongusul sid vaza manangon di kinosinaan di Yesus dot okonko enizo o tuturan dioti dino. Pengavi di Kitab Vagu aso boros vagu do iadino ko mongogorot dot ino kinusuvan di Yesus kiguna bahagi di kosipan miabal di kinapatazan om kinogulianan di Yesus. Minsanko i Injil di Matius om Lukas amu mongimbulit di hal dino. Ong i bahanda sid di Yesaya, okonko sumuni o boroson, inoi nga it ondu dit omulok-po minusu di Mananggung, ka sid Yesaya 7,14: *Imatai-no it ondu dit omulok-po nga mogontizan om usu-po, anak do kusai sampai pungaranan iosido dot Imanuel..* Amu monodiri i pongoretan sid Yesaya do sumuni ko bai ondu dot omulok-po.

I kosipan tokou okonko hal do mamanal dit ombo it aso tenganan mamanal. I hiza di Lukas diri, ogumu ot ongotangon kananganko it ongoulun di kiguna sid ongobansa om ugama vokon retanko inusu do sumuni, tu antad ongokuasa dot asavat inot ongoulun diri. Iti-no o sabap i Lukas om i Matius o minamakai di kohorotizan kodori diri sid gama manangon di kinosinaan di Yesus. Ino-no i kosipan tokou, agazo o gama do Kinoringan ponong sid di tokou i hiza dot i Yesus minatai om ogulian-no vagu. Ino kinapagasan om kinapatazan sampai

i kinogulianan o kiharati bahagi di tokou. Sabap ino, ino pamarasan dit on-gokosuvang sid kosipan dot ulun Kristian, kananganko i kinusuvan antad di Mariam di sumuni-po iosido, okonko hal dit a-milo-milo osipon, kakali i Yesus nga Anak do Kinoringan antad di sokoviai i kososizan vokon do Kitab.

Bahagi IV: I KOSOSIZAN SID KOSOPULAN OM KOTINDALAN

I kosipan dot ulun Kristian ino-no kosipan sid di Kristus om kosipan dot i Yesus Kristus o minongimbulai di kosopulan di sokoviai i riniba. Ong varo pongoretan do kosopulan om kotindalan, osusa-no laid manarang dot siombo antad osusa manapul om monindal.

1. I riniba di natagak om masi ponong sid kobinasaan

Okonko bai it ongoulun Kristian kaharati dot i riniba amu nokonong sid kobuatano dit atag. Sabap ino, ogumu it ongougama di moniim manapul dit ongoulun. Ogumu it ongovazaan dit ongoulun hiza bianco do moniim do palabus dit ulun antad sid kinuripanan om kinosusaan dau. Songkoledo di riniba, varo-no om varo ongotudukan om poniiman do kuran it ulun kemot di kosinango om kobebasan antad sid ongobalud do karanggalan om kasalaan. I kobuatano dot riniba om ipat-ipat it ulun iadko nakatanga iosido sid rahat sampai notogob it kapal om alud di sinakaan dau, nga osusa iosido mogihim di kotindalan om kosopulan. Varo do moniim do manarik sid obuk, indoson kotindal om atarik it obuk dau. Antava kakali sid kapal, topot i sarang amu-no kelo do sionggo o rikoton dau, tu norungoi-no i kiduman om a-otimpan it ongorimbutuon om a-kemot do tindal sampai ododos-po i rahat. Minsanko i labu, nga natagak sampai mantung-lantung sid ododos i rahat. Ong it ongodupot amu osusa mongitung di kogunaan om rikoton dau, tu i kopoşizon dioti dino bai makan, supaya apasi om apasi, tu gima kemot dot akanoh.

Ong i riniba, ipat-ipat it ulun engat di rontob di kopoşizan dau om i kumuro di kopudan dau sid tanga dit ongoulun vokon di milawan om mioodu sampai mirumpak om misangodi. Tanid mantadko ino, ogumu o kahajangan om kavazao dot ulun di popuhondom dit ipat-ipat it ulun dot okonko iosido o kumavid di kopoşizan dau, inoi nga varo kuasa vokon mangagazad om popunovot, mamasi om pasakit dot ulun. Iti-no sabap varot ulun di opiduvo i ginavo sampai opupusan iosido dot aso harapan ko i vokon nga sumokot sid nunu-nopo songhabal di retanko ongoharapan dot ulun. Ong varo boros laid dot i rikoton dit ulun dot araat, ino-no i naraka, ohorotizan dit ongoulun bianco

dot ino naraka dino mad sitid pomogunan, tu i vaza dot ongoulun miakan om mirorongit, monguripon om mokiuriponi. Ong otopot, varo dara hoturan di kinourugan di tumabang di riniba do kemumui di ralan dot avantang sampai kumavid di hoturan di kinourugan om varot ulun di moniim do sumuhut di hoturan dino. Manjadi it ongoulun di iadino moniim do kitanggung jawab ioti sid tanga do riniba om magavi ioti monuluk dara dit avantang o hoturan, dot iri-no ko iri o pangalaman dioti, Varo dara kenginan do sumuhut dit atag, dot tigogi, nakalandu om nakabambol sid karaatan. Minsanko it tinomod om panangan dot avantang, tigogi, mongimbulai do karaatan.

Suntuan: nokemot i riniba di vaza mamakai do kurita, supaya oruhai korikot sid ulun vokon ko mangatod do barang dot okonko bai kazab o sumaan, dot tigogi, sid saralom do sontoun, labaan do hatas ribu it ulun, anak om osukod, matai dit aranggalan do kurita. Antawa nokemot i riniba mangagama dit ongoenjin di tumabang dit ulun sid kerja, dot tigogi, osunsub it ongoulun sid ongokilang, tu it ongoenjin mangagama di sokoviai it ongogagamaan. Iri-ogi lumikop it ongoulun, tu aso ponsohorian. Sabap nakarangkat ioti sid bandar, supaya osomok sid kilang, tana nga aso, siwa do valai nga a-kadapat mansahari. Iri-ogi miringkozou it ongoulun dino dot aso panangan om kogunaan. Ko kodung nokemot do mangagama do tapung di miuma mamabak dit ongovatu, tigogi, ino dapung dino apakai sid senapang om bajil do mamatai dit ongoulun o tomodon. Na i rasul Paulus mongonsi di kobuatano di riniba di iadino do pengkaa dino, *Amu-ku ohorotizan-ku i gama-ku. Tu okonko i kenginan-ku o gamaon-ku, inoi nga it ikasana-ku, ino-no o gamaon-ku. Elaan-ku dot sid dohon diti, o ino-no sid guvas-ku, banalko aso noken-toron dot avantang. Ong i kenginan varo sid dohon, topot ong i mangagama nga aso. Sabap avantang o kenginan-ku dara mangagama. Topot it araat, it okonko kenginan-ku, ino-no it agama-ku. Sinusa-oku diti. Isai-ka o kapanapul dohon potindal antad sid guvas di dang kapatazan diti?*

Vokon-no elaan-no dit ulun mongumbasih dit ulun vokon. Rontob-nopo i gama dau di iadino, bai tomod mansahari sid kamamasan dau, tu kakal-oku mogihim di dohon do kosurutan om kosurupuan. Ong ino dino bai i kobuatano dit toriso-iso it ulun. Varo-po ong kiroon dit ensanan i razat om it ongobansa, i vaza monipu dot ulun di monodia dit ongokosukupan do riniba. Sabap it pongumpugan do siin, ino-no it ongobank om it ongoulun di lumundu di manahu di kolunduo dau sid bank, nga momorinta om momogos dit ongoulun dit okurang. I siin momorinta do pomogunan om it ongobarang sampai it ongoulun. It iso bansa momorinta om momogos di bansa koduvo sid

vaza posibak dit onghorgo do barang di dumagang sid dioti om pojuval di dau do barang dot asavat o horogo. Suntuan, it tolu nopod toun katalib, 100 kg nizu kihorogo dot labaan dot 30 RM, dot ino tolu nopod RM miuma do dumagang dot onom nopod batang roti. Ino hiza diri i kurita do Landrover nga 7000 RM o horogo. Ong biano, nga ino 30 RM o horogo do nizu, tu kakali bai iadino o horogo ong copra, bai 20 batang o roti dagangon, ong sid pomogunan siti. Topot i horogo do Landrover, nga 140 000 RM o horogo, induvo nopod di horogo laid diri. I gaji dot ulun di mangagama do kurita, sonjaham, nga duvo nopod om limo ringgit, dot i gaji siti, nga gaji dot asadapan gumaji om okurang mantadko ino. Iri-ogi, ong itungon i ekonomi di sompomogunan, i rumbul satu o kohuntungan, ino-no i mangagama dit ongapakakas do rumpak om i pakakas do pamatai.

Ino kosusaan dino kavi, nga antad di kobuatano dot ulun om riniba do pakaso ko pemozoon do Kinoringan. Sabap, tu amu kopionong i vaza tokou ponong sid Kinoringan, nga amu nokonong i vaza tokou mioopud sid tanga do riniba. Sabap nakalabus i riniba sid hoturan do Kinoringan, norungoi-no i nunu-nopo songhoturan sid pialatan dot ongoulun. Na i Kitab mangarait di kavazao do nokensodu i riniba antad sid Kinoringan. Ong mangaranggal it ulun di pinonuhuan om kenginan do Kinoringan, ino dino bai tanda di kasalaan banal dot notongkizad-no i riniba sid Kinoringan. Sid Rom 3,19 momoros i Paulus dot, *Ipat-ipat i kabang otombol dot amu-no kobongut sampai ensanan i vinangun onong do hukum sid tinoguvangon do Kinoringan*, ka. Okonko enizo i riniba araat. Varo pitonidan. Rontob-nopo, ong kakali kengkakat it ulun do pemozoon do Kinoringan, atalahas-no dot it ulun dino, nga kakali ponong sid kobinasaan.

2. I koponopulan di Yesus Kristus.

Manjadi i Habal do Kovosihan, ino-no i habal om i kosipan tokou ulun Kristian, ino-no i kopomihatan dot it ulun di sid tanga do kobinasaan nokemot do kosopulan, gima i Yesus Kristus. I Habal do kovosihan kumiboros dit ipat-ipat it ulun dot, i Kinoringan, it apatut dara kirodus ponong sid riniba, nga manamod di riniba sid saralom di Yesus Kristus sampai pada di karaatan om kasalaan om jinumadi do manapul di riniba. Ino gama do Kinoringan dino amu pemozoon di karaatan do riniba ko bozoturur di kasalaan dot ulun. Sabap ino karaatan do riniba minongusiba di kohormatan do Kinoringan. Gam sid saralom di samod dau om i vaza pada di karaatan, mangatag i Kinoringan di kabanaran dau. Na varo duvo vaza humarati ino dino: varo momoros dot, i Kinoringan minongogorot do varot ikapus om kopiganti di karaatan, iadko i

boli di bobolizan minonogit dit alasu o pomogunan, ka di kodori diri. Retanko i Yesus, it Anak do Kinoringan minatai do iadko i kapatazan dau minogit do Kinoringan, supaya atanus-no i lulupu dit antad sid Kinoringan. (2. Kor. 5,19+21) *Kinoringan-no minangandus di vinangun diti sid saralom di Kristus dot okonko kiniro-po i karaatan dioti sampai i boros di kopioondusan dino nipakavid dahai. Tu it aso sala jinadi do Kinoringan do kisala, tu mongontok di tokou, supaya embanaran tokou sid tinoguvangon di Kinoringan.* Tanid mantad dino panarangan do mad boli i Yesus monogit di karaatan do riniba, sinod kazu do sangkap nokembulai it oholian o karaatan do riniba sumaap do Kinoringan. Na i samod do Kinoringan di mogihim di kemumuzan do riniba kogoos do sampai mokipatai sid kazu do sangkap, ong sukul i riniba kentutun di samod di banalko agazo dit a-milod kiroon.

I Yesus okonko bai nokoriniba, gam nokorompok-no iosido sid ulun di nasala do porinta om i hoturan do riniba, supaya isot ulun nga aso mongitung dot a-kotivol iosido sid Kinoringan, i banalko asavat. Kinoringan-no o nokensomok sid ulun mosikim om it bolou ko i kakung, isai-nopo it a-kavasa mamung sumambayang sid ugama dot ulun Yahudi. Banal-no, sid gama di Yesus do iadino, minanaan iosido di sokovia i karaatan do riniba dot iosido kondiri, okudik nga aso karaatan om kasalaan. Topot ino sokovia i panarangan di Kitab kananganko i tugas om gama di Yesus om i kinahajangan dau, bai vaza manarang dit hal dit aso tinganan tarangan. Varo boros dot ohukuman i Yesus sid Hakim, ino-no i Kinoringan dot i Yesus bai minongontok dit ulun di kisala, supaya it ulun do kisala embanaran. Varo-no dot i Yesus iadko persembaan (boli) di nitahak sid Kinoringan, supaya ogontian-no i karaatan om kasalaan dot riniba, gam sid suntuan dino, i Yesus okonko bai i boli, inoi nga iosido-po nga i Imam do kipangkat di minangagaras ko minanamba di boli dino. Varo-po retanko i riniba ot inuripanan dot i Yesus minonobus di riniba, supaya obebas i riniba (Ibrani). Varo-po boros dot i Kinoringan pada di kasalaan do riniba iadko pada dot utang dit aso tenganan dot ulun kopusan (Matius 18). Inot ongosuriban om suntuan dino kavi, nga vaza monuntu dit apagon om aso tinganan posuntu om manarang. Ong it utok di riniba a-karamit di vaza do Kinoringan dino. Iti-no o sabap ogolivong it Ongoyahudi om kerak it ongoyunani ong nokening ioti dot i Kinoringan minatai sid kazu do sangkap dot iti i vaza do Kinoringan mangatag di kopiopudan do riniba sid tinoguvangon dau (1. Kor.1,22-25).

Ino-no it onsi di Habal di kinasangkapan di Yesus, i Kinoringan okonko

pinemozo di karaatan dot iadko aso karaatan laid dino, inoi nga it Anak dau Yesus Kristus o minomurimon di karaatan om kasalaan do riniba sampai pinembulai di kosuhutan sid kenginan do Kinoringan, dot okudik nga asot alazan. Sid gama di iadino i Yesus najadi-no do mad lulupu do Kinoringan. Ong i Paulus manarang do iadino, Rom 8,31-34: *Ong i Kinoringan mozo-vozo di tokou, isai-po-ka o kadapat sumaap di tokou. Kagi, it Anak dau kondiri okonko a-nizuhu, gamko nitahak do mongontok di tokou. Nokokuro, tu amu tokou atahakan di nunu-nopo sid saralom dit Anak dau? Isai-ka o kapanala dit ongoulun di nopili do Kinoringan? Kondiri di Kinoringan o mamanal. Isai-po-ka o kopongohukum? Kondiri di Kristus minatai-no, topot nogulian-no vagu sumpai nokogom sid vanan do Kinoringan, tu mongontok di tokou.*

Ong kaharati tokou ino gama di Yesus, elaan tokou-no dot sid di Yesus natanus-no i karaatan-ku, tu niada-no i kasalaan-ku, gima i riniba minongohukum di Yesus dit iso nga aso sala. Sinod kinapatazan di Yesus nokembulai i rontob di kogozoo di samod om kovosihan do Kinoringan. Manjadi kodung iadino o gama di Yesus, a-milo-milo sumuhut-oku om tumorima-oku dino kobebasan om i kaadaan di karaatan-ku sampai tumorima-oku di samod do Kinoringan om sumuhut di hoturan om karajaan dau. Iri-ogi engat-ku dot aso kopudan-ku vokon tanid mantadko sid piniizaan di Tuhan Yesus om i gorija dau. Asot iso kuasa vokon o momorinta-po dohon om asot iso kenginan-ku dit a-nokosuvang sid kenginan do Kinoringan. Sabap sid di Yesus nokotimbaru-no vagu i piniizaan do Kinoringan om i riniba iadko sid kabun dot Eden. I Paulus manarang dino do pengkaa dino, *Isai-nopo i nasanganu di Kristus, vangun vagu-no iosido. I vangun laid natanus-no, sampai nokembulai-no banal i vangun vagu.* (2. Kor. 5,17).

3. I harati di kosopulan/kotindalan

Ino pongoretan kosopulan/kotindalan, nga mongontok di pongoretan "shalom" ko "salam" sid boros dot Ibrani om Arab. I harati banal di pongoretan dino, it ulun dit ahali o sakit, osihat-no vagu, ko it ulun di nohukuman-no dot kapatai, nga nakalabus sid torungku, tu nemot-no i kosianan do raja, ko it ulun di sid tanga do rahat, gima notogob it alud dau, nga nokemot do kotindalan, tu varot ulun di minonindal dit ulun dino. Asot iso hal sid pialatan dot duvo ot ulun di mongunang-po di piniizaan dioti. Atag om avantang kavi, ino-no o harati shalom. Na nokentahan-no laid sid Kitab Laid dot i Kinoringan manapul di riniba ponong sid kopolisan penlaid, minsanko osukup i karaatan dot ulun dot ohukuman iosido do kapatai. Iri-ogi

i Kitab Vagu manarang, iadko sid di Zakai (Lukas 19,9-10) dot, *Biano nokosondot-no i kosopulan sid valai diti*, ka di Yesus. Ino kotindalan om koomungan sid Kinoringan om i karajaan om hoturan dau, kotimpun hiza biano iadko sid di Zakai om it ulun kakung di nokotorima di kaadaan do kasalaan dau om kengkakat iosido om kadapat manaan dit odopon dau (Markus 2,1-11), ko it ulun di kopihiza di Yesus nisangkap-no (Lukas 23,43). Ino dino nga bai tanid o boros mantadko vangun vagu it ulun Kristian.

Ino kosopulan dino okonko kiharati dot kikosurupuan tokou ko atandas i kosinangan tokou di kakal tokou mizau. I karajaan om hoturan do Kinoringan amu-po notuluk. Nokotimpun-no laid ino hiza di Yesus diri di minamanau-no iosido kumaa sid Yarden do mokipodsu, nga kakali amu-po nopongo (otuluk) om kakali osusut. Kagi i kuasa do kotuvangan kakali sumaap di hoturan vagu sampai moniim do pobolikung vagu dit ongoulun di mangasip. Kakali misaap i guvas om i ginavo ko i Sundu do Kinoringan di nokezon sid ginavo tokou. Okonko bai i Paulus kotiim vagu do kosusaan, iadko tinuturan dau sid 2. Kor. 6,4-10: *Ponulung-okoi do Kinoringan dot osibak o ginavo-za sid saralom do kosusaan om kosompitan om kahangkaban. Nabambang-okoi om notorongku-okoi om nourunan-okoi sumaap. Hinuzan-okoi om amu pinodop om pinakan-okoi. Topot kakali atapat om otulid o bahazan om kikeloo dot alanut om omomos o ginavo-za, tu ponulung-okoi do Kinoringan.* Nagasan dahai ino, tu antad kavi sid Sundu dot Osusi om i samod dot atantu om i boros do katapatan om i kuasa do Kinoringan. I kabanaran sid vanan om sid gibang o pakakas dahai sumaap om mangapad dahai. Toropatazo-no dahai, nga napasi-okoi. Nabambang-okoi-no, nga amu nengkono. Sid tanga do kosusaan, nga ohigak-okoi. Ulun-okoi do mosikim, nga polundu-okoi di kinogumuan. Aso barang dahai, nga varo i nunu-nopo sid dahai, ka di Paulus sino. Manjadi i kosipan dot ulun Kristian engat dot ino kosopulan dino nolumbatasan nakatahak sid dau dino, minsanko i kobuatano biano, varo kopidukaan om varo-po pensubaan.

4. I kogunaan di kosopulan bahagi di tokou biano

Nunu-ka i kongkod di kosopulan sid di Kristus? Ong ribahon o vaza tumimpa, ino-no i kosopulan tokou, i kosipan tokou. I hiza di Reformasi nakaharati i Luther do bai i kosipan o kiguna ponong sid kosopulan, okonko i vaza do riniba moniim do manapul di kondiri iadko it ulun di naratu sid vaig manarik sid obuk, indoson iosido kadapat monindal di kondiri, ong mangakat iosido di guvas dau sid obuk. Rontob-nopo, ino kosipan tokou diti okonko

kogulu gama tokou om vaza tokou kumianggai om tumoguvang do Kinoringan, inoi nga i kosipan tokou, mogulu vaza do Kinoringan kumavid di tokou sid saralom di gama om kavazao di Yesus Kristus om iri-ogi i vaza tokou (riniba) tumimpa om kumavid di palad do Kinoringan di nakanta-no sid saralom di gama om kavazao di Yesus Kristus. Okonko i tokou nakasampai sid Kinoringan, inoi nga i Kinoringan nakasampai sid di tokou avaza sid di Yesus Kristus. I Yesus Kristus mad kuhakup di kosopulan dit antad sid Kinoringan

a) I Samod do Kinoringan inimbulai sid di Yesus Kristus

I panangan di samod do Kinoringan ponong sid di tokou, ino-no i kosipan om kosopulan tokou. I riniba inourug ponong sid piniizaan do Kinoringan. Iti-no o sabap do bai osopulan it riniba om ipat-ipat it ulun sid saralom di samod do Kinoringan. It ulun di nokotongkizad antad sid Kinoringan, nga ulun do napalid om natagak ko nakatanga di kobinasaan iadko nakatanga sid rahat om amu elo tumozog. Baiko i samod do Kinoringan o kadapat mongulit di piniizaan sid Kinoringan. Na i samod do Kinoringan sumampai om kumavid dit ulun, dot okovidan-po, osopulan-no it ulun. Okonko i keloo-ku ko i humarati-oku do varo samod do Kinoringan o kasapul dohon, inoi nga bai i samod do Kinoringan o kosopulan-ku. I kosipan dot ulun tumorima om kumavid di samod do Kinoringan, i harati, mikakavid-kavid i palad do Kinoringan, ino-no i samod om i palad-ku, ino-no i kosipan-ku do tumorima om mamakai di samod do Kinoringan. Baiko sid di Yesus kotorimaan tokou di samod do Kinoringan. Iti-no o sabap dot i piniizaan sid di Yesus o vaza mangasip om mongopud di samod do Kinoringan. Bai sid di Yesus o kadapatan tokou humarati di kavazao do Kinoringan, ino-no i samod do kadapat manamod-po di riniba di pakaso do Kinoringan. Ino kogozoo di samod do Kinoringan dino natantu sid kinapatazan di Yesus Kristus. Sabap i samod dino aso rontob. Manjadi i Habal do Kovosihan poromut sid ipat-ipat it ulun di samod dino, supaya it ulun di tumorima di habal dino sampai kumavid di samod, nga ulun dot osopulan, tu ulun iosido di nogobu-no di longon di samod do Kinoringan.

Na i kosopulan sid di Kristus bahagi sid ensanan it ulun, okonko bai kosopulan di ginavo dot a-po nakamung i guvas om it ongokavazao sid tanga do riniba. Kenginan laid do Kinoringan dot it ulun kikoruhang, ino-no i Kinoringan om it ulun vokon. Topot i riniba di nokedu-no antad sid tinoguvangan do Kinoringan jinumadi-no dot ulun di monondeso-iso mogihim

di dau do kosinangan om dau do kenginan. Ong kiroon tokou i razat Momogun dit amu-po nokosuvang do Kristian, minsanko mopud sid binatang dot ogumu it ongoongkob oupug om apasi sid piniizaan do binatang, ong otopot baiko i korosizan do rogon o minamalud dit Ongomomogun sid piniizaan do binatang. Bai it ongorogon o popezo dit ongoulun, gima i korosizan. Manjadi, kodung noko-kristian it Ongomomogun, obebas-no it ongoulun, tu aso-no rogon di mongindorosi ko monusa-po dot ulun, do nokobebas-po, ipat-ipat it ulun mogihim-no di dau do kosinangan om dau do kenginan. Mad nolingan-no dot i kobebasan dino antad kavi sid Habal do Kovosihan om i samod do Kinoringan. Tigogi, ikid ulun magavi posurut di bai dau do kohuntungan om kavantangan om dau do ngaran om hormat om kolunduo om tana dot amu-no engat, dot ino kinolobusan dino, antad kavi sid Kinoringan om i samod dau. Tigogi varo-po misasana-sana om mioodu-odu om miaanggan-anggan sampai mirorodsit-rodsit dit ongoulun, tazonko amu aladtakan om oporintaan di vokon. Mopud tokou dara ponong sid ulun vokon, tu nosukung-no di piniizaan sid Kinoringan, nga amu agazo o ginavo humarap sid ulun vokon, tu varo pangalaman dot amu avantang o kopiopudan sid dau diri. Iri-ogi tumiim it ulun do mongopud di kondiri dau do bai iosido om i Kinoringan om amu-no engaton-po it ulun vokoni.

Na i kopiizaan di kosipan sid di Kristus mopud sid gama minta dua. Sabap i Kinoringan nokotivol sid di tokou, kavasa tokou minta dua do kumiboros sid Kinoringan. I Habal do Kovosihan monuduk di tokou di vaza minta dua om tumoguvang do Kinoringan. I Kinoringan mongoho dot i tokou tumoguvang om kumiboros do Kinoringan. (It Ongomomogun diri rinumosi do bai mangarait di ngaran di Minamangun om Kinoringan ko it ongorogon). Sid saralom do kosipan elaan tokou om katama tokou kumiboros sid Kinoringan, sampai i pomintaan dua nga vaza di piniizaan do Kinoringan om i tokou.

Na i gama tokou minta dua sid Kinoringan mad iso tanda di piniizaan dino, dot nengkod-no i hiza om kobuatano dot aso koruhang om asot mangambat tokou. I rikoton di pomintaan dua, okonko watu ko pampang om indai ko kazu, inoi nga i Kinoringan i kapapasi, i nakasampai di tokou sid saralom di Yesus Kristus. Iosido mangambat, isuhut di kenginan dau (Markus 14,36), tu bai i kenginan dau posurut di kosopulan tokou.

Manjadi i gama minta dua okonko bai mindamo ko poromut sid Kinoringan di kosusaan tokou, inoi nga mongohormat tokou om mongindazou tokou di Kinoringan sampai monguji di kovosihan dau sampai monorima kaseh bahagi di kosopulan di nadapat tokou. Kopihiza momurimon tokou di kosopulan

tokou sid vaza minta dua, tu i harati, nokotoronong tokou sid Kinoringan, i minanamod om kakalpo manamod di tokou, mongorindang-po di tokou antad di kotuvangan dit ongokuasa dot rondom. Iti-no o sabap, i gama minta dua okonko ensanan kosinangan om kamanangan, isuhut di pomintaan dua di Yesus sid Matius 11,25, inoi nga varo-po do mad i pomintaan dua sid kazu do sangkap-dot, O Kinoringan, nokokuro-ka, tu inedian-oku dikau, ka. Suvai i Sundu do Kinoringan o pakansang di tokou om mongontok tokou minta dua (Rom 8,26) *Antakan tokou di Sundu sid saralom di homu dit a-koumbongut*, ka, ko mindamo tokou do sumusui dit pomintaan dua di krani do sukoi sid Lukas 18,13 dot, *O Kinoringan, sianai-oku-no, tu ioku diti ulun do kisala*, ka. Sabap ino i gama minta dua mad tanda di kosopulan tokou sid tanga do korosizan om kahangkapan, gima ananganko di nasip ko agaratan dot ulun antawa a-kaharati di kondiri om vaza tumoguvang dit ongokahajangan sampai i kopiduwaan do ginavo kananganko i Kinoringan om i kovosihan om samod dau. I gama minta dua o sondihon tokou, ong otoro tokou di nasip om it ulun vokon, ko varo kogolivongo tokou om engat tokou dot i Kinoringan o mongohukum di karaatan do riniba. Ino sondihon dino, ino-no i Kinoringan di nokensomok sid di tokou sid Yesus Kristus, i minonori di sokoviai i korosizan sid tanga do vinangun (Yahya 16,39). Ong kopominta dua di kasip tokou, otori-no i kogolivongo om endorosi sampai i kopiduwaan do ginavo di kakali mongohondom di kotuvangan om rondom. Gam, ong sukul kopominta dua, nokosondi tokou sid kovosihan do Kinoringan, ino-no, mangasip tokou.

b) It inantadon di kosipan.

I kosipan ino-no i tanda do kosopulan bianco. Sid kosipan sumondui tokou om pomihot di kopolosizan tokou. Sabap sid tanga do razat om i hiza didino aso tampat dit okonko oguzu ko ogura om mimban-simban, tu ensanan i hiza didino om i kobuatano bianco tumanus om sumimban. Banal-no i riniba mogihim do sondihon sampai mongitung om mokitarang di sokoviai i kobuatano bianco, retanko iti ko ino nga otopot. Rontob-nopo, kakali mongitung it ulun do varo harapan dau sampai moniim do kumavid ko mumpalad di harapan dino, tigogi, natanus-no. Andaman-ku it iso Momogun diri. Nosomungan-ku ino sid tanga ralan sampai minongoduat-oku do nunu o harapan dau. I timpa dau, I nizu o harapan-ku, ka. Iosido dino nokogulu di sokoviai i Momogun mananom do nizu sampai vulan-vulan varot hasil dau. Dot tigogi, nening-ku-no do nisanda dau i kabun, tu i hiza di Toun Baru Kina minintikam iosido sampai navi-no i kabun dau sino. Iri-ogi minatai-no iosido dot ulun do mosikim om aso harapan. Ogumu ot ulun bianco posokot di

harapan om kosipan dau sid ongobarang ko it ongoulun ko parti om i Ideology do parti, retanko iti-no ot apapag o sondihon, ka. Varo-po ogumu harapan om kosipan vokon sid tanga do riniba dot iri-no ko iri humarap di kondiri dau.

Bai sid Kinoringan o kopihatan dit amu elo tumanus om amu sumimban om sino-no it atag o sondihon: ino Kinoringan dino ino-no i Kinoringan di nokembulai i kondiri dau sid di Yesus Kristus. I riniba ong sukul mongitung banal, engat di kotonusan dau sampai rumosi di rikoton dau, ino-no i kapatazan dau. Na i Paulus manarang do kuran i kosopulan om kosipan sumokot om sumondu sid di Yesus Kristus. Boros dau sid Rom 8,35. *Isai-ka o kopotongkizad di tokou sid samod di Kristus? Kosusaan, ka? Kosompitan, karakapan, viti antawa aso kosulungan? Kopunavatan antawa sapadang? ka.. Sabap olumbatos-no dot elaan-ku: okonko i kapatazan ko i koposizan, i malaikat ko i nunu-nopo i monguasa, i biano ko i rumikot-ogi ko it ongokuasa dot akansang, i sid savat ko i sid sibak, antawa nunu-nopo songvinangun, iso nga aso kopotongkizad di tokou antad sid samod do Kinoringan, i nokembulai sid di Kristus Yesus, i Tuhan tokou .*

Asot iso hal kadapat monimban ko monori di samod do Kinoringan di kumavid di tokou hiza di mizau tokoui om hiza di matai tokou-no. Gam ong ataud tokou di samod dino, minsanko i kapatazan a-kotogu di tokou. Ong matai tokou, kakali tokou otunda sid kangkap do Kinoringan di kikuasa do mongurug vagu di koposizan tokou penlaid. Iti-no o kopihatan di kosipan om koposizan tokou dit okonko sid tanga do vinangun di didino, inoi nga sid kovongunan vagu om sid karajaan om hoturan do Kinoringan. Sid harapan di iadino kogoos i kosipan do tumoguvang di nunu-nopo kosusaan om kapagasan. Boros di Paulus sid Rom 8,18: *I kapagasan di didino amu kogimbang di kohormatan di pambulazon sid di tokou. Sabap i vinangun diti tilangad sampai monginud-no do kembulai it anganak do Kinoringan. Kiharapan tokou do kalabusi i sokoviai i vinangun antad sid kinuripanan di kobinasaan om osibikan di kohormatan dit anganak do Kinoringan dit amu-no okuasa di nunu-nopo. Iti-no o sabap dot i Paulus mongonsug dot, Tomon-kou-no, tu kiharapan. (Rom 12,12)*

Okonko harati ino dot sokoviai i kavazao om kobomboro dot ulun Kristian kikatamanan. Kondiri di Paulus mongusul di kogumuai di kosompito om kosusaan om kahangkaban dau sid Koduvo Korintus. Varo pitonidan di koupusan di koubasan om i dang Kristian. Boros di Paulus, *I koupus antad*

sid Kinoringan o minongimbulai di kouliau sid kosopulan dit aso-no upuson-po vagu. Topot ong antad sid riniba o koupusan, kobinasaan ot embulai. (2. Kor. 7,10)

Pengkaa dino i hal do kopioondusan antad sid Kinoringan di sumondot sid ginavo tokou om mongoluhung-po di kavazao tokou ponong sid ulun vokon. Sid tanga do razat, kakali atarik tokou dit ongokoozian dot ulun om i di ginavo kondiri. Songkuro-nopo magavi it ulun Kristian do mangandus om mokiandus, kakali varo misaap sid ginavo kondiri dot ombo it atag om kuran kadapat masi kondiri. Suvai i kopioondusan antad sid Kinoringan di manaud dit ongoginavo om varo-ogi katagan (Filipi 4,7: *I kopioondusan antad sid Kinoringan, i tumalib di sokoviai i kohorotizan o manaud dit ongoginavo dikou om it ongopongitangan dikou sid saralom di Yesus Kristus*, ka. Suvai i tokou tumoguvang dit ulun vokon do iadko i vaza di Yesus tumoguvang sid ongoulun om sumirot tokou sid ulun vokon iadko i vaza di Yesus sumirot sid ulun vokon, om atag-ogi. Tu i mato om ginavo kondiri, nga kakali atarik sid pongitangan om jangkakan di dang riniba. Suvai i tokou sumusui di gama di Yesus minta dua do mindamo di kosunuan di kenginan do Kinoringan, okonko i dato do kenginan (Markus 14,36), iri-ogi nokosokot i kosipan tokou sid suntuan di Yesus Kristus.

c) I koposizan vagu

Ong nosopulan tokou-no, harati, nakadapat tokou do koposizan vagu. Ong apasi tokou ponong sid Kinoringan (Rom 14,7-9), i sokoviai i kobuatano om gamaon tokou, nga ponongi sid Kinoringan. I tokou jumadi do pakakas di samod do Kinoringan, tu sid saralom di gamaon, i tokou om i Kinoringan mangagama om mongusaha sampai mitabang om mitalad tokou do Kinoringan sid gama mongumbasi di sokoviai. Iti-no vagu mad tanda do kosopulan tokou, ong apasi tokou om mangagama tokou ponong sid kendazaan om kohormatan do Kinoringan. Kenginan di Yesus dot i di tokou do kabanaran tumalib di kabanaran dit ongoulun Parisi. Mongonsug i Yesus di tokou do *tujoo-no banal i ginavo dikou om sumusui-kou-no dit Ama dikou sid surga, tu arangkap banal iosido do kovosihan*, ka. (Matius 5,48) Kakali ino dino okonko harati do bai ulun Kristian elo mongumbasih. Ong i Yesus monuturan di suriban dit ulun di banalko kikobinsianan (Lukas 10), okonko ulun di mangasip sid Kinoringan ot onuvon dau, inoi nga ulun do labus, ino-no ulun do Samaria. Aso boros di Yesus dot it ulun dino minongohondom di Pinonuhuan dot Asamod om iri-ogi minonulung dit ulun dit toropatazo-no sid lisang do ralan.

Bai, *bana-banal-ko osianan iosido*, ka di tuturan di Yesus. Topot songkuro-nopo malingko a-korompok i gama tokou di karangkapo do Kinoringan, tu kakali amu-po kaharati kavi om varo-po alazan, sabap amu mongontupat banal om amu manamod banal dit ulun vokon, kakali i tokou ulun di moniim tumuju om mozo di kobinsianan om koruhunan do Kinoringan, i nosuntuan-no sid di Yesus Kristus. Iosido o monuduk om posuntu sid di tokou di koposizan vagu di mad tanda om ondig-ondig di karajaan do Kinoringan.

d) I kobebasan dot ongoulun Kristian

I teologia do Reformasi sampai i teologia biano manarang di kosopulan sid pongoretan do kobebasan om kolobusan. Rontob-nopo, osusa tokou do monodiri di harati kobebasan ko kolobusan. I karabau dit amu akagasan sid bunsaring dau, kalabus sampai lumanjang sid govuton dot amu engat i ralan ko i kabun dot ulun sampai kahambil sid ranau om totonomon dot ulun. Ino kolobusan dino amu engat do rontob ko volit. It ulun dit amu engat do rontob okonko obebas, inoi nga arampus, tu manakau iosido ko mongoginaka dot ongondou, retanko iti kavi, iosido kadapat, tu obebas gima, ka. Pengkaa dino, i riniba di mangavi di kosukupan do vinangun mongorongoi di vinangun, tu amu engat i rontob dau.

Sokovia i kobebasan do riniba engat do rontob om hoturan. Tu minsanko i kobebasan, varo hoturan. Ong otorungku it ulun, okurung iosido iadko manuk ko iinsod iadko vogok. Iri-ogi bai iso o kenginan di nokokurung ko nokensod, ino-no, lumabus om povizau di kenginan dau sid labus. Ko it Ongomomogun, hiza di hinumarap sid ongorogon, ogumu it ongokada om a-kavasa, mad kukurangan di minomogos om minanahan dit ongokenginan dot ulun. Minsanko varo a-ko piro o vaza do mangaranggal dit ongoadat om monimbang ko mangaganti di karanggalan (ong misavo pinsan haring, varo vangal do susu lombus..), kakali engat dot ulun dot tinomod nakaranggal iosido. Ong biano, tu nokokristian it Ongomomogun, okonko harati, aso hoturan om aso rontob. Sid pialatan do razat om ensanan i riniba varo hoturan di mangahatul di kopiopudan om kobebasan dot ensanan i razat om ongobansa om ipat-ipat it ulun. Ong manangkis do kurita, suvai sid gibang dot alun-alun o panahon ong sid Malaysia, ko sid vanan, ong sid Europa tanid mantadko sid England. Ong inansal-no i kabun ko nataad do valai ko nokunsi-no i rongobon, atarang dot i harati dino, okonko dang sokovia, inoi nga dang ulun ko pribadi. Manjadi suvai it ulun mongohondom om mongoguna dit ongorontob dino. Bai iri-ogi iosido nga oguna om amu aranggal. It ansal ko i rongobon ko hoturan

manarang di rontob do kobebasan, songkuro-nopo ahatul i kopiopudan do riniba. Sampai biano varo it a-ko piro o hal di kakali amu-po ahatul. ladko it Ongobritish diri di minanahak di kuasa do managad do himbaan iadko cendramata sid a-ko piro it ulun di kenginan dioti. Biano-ogi kaharati do kodung avi-no i himbaan, orungoi-no i kobuatano do pomogunan, i pangi om manangadau. Ong sid Afrika Utara, minangavi-no it Kaisar do Rom di himbaan diri. Ino pomogunan dino bai belantara-po dot aso tinganan mananom-po di nunu-nopo. Ong bai belantara-po i Sabah, kuran-ma o kopudan tokou? Iti-no o hal do kobebasan om i rontob di kobebasan dino. Varo rontob di kobebasan dit ipat-ipat it ulun om i dang razat om bansa om songriniba. It ongobansa do lumundu di pada dit ongokavanit sid ongo-pomogunan dit ulun dit amu-po kaharati di kopunavatan di kavanit dino, tantu nakaranggal di rontob do kobebasan dino. Bai it osusa, aso-po hoturan di moniag ko mongohukum dit araat o gama dino.

Iti-no o sabap dot osusa tokou ulun Kristian monodiri di nunu o harati kobebasan do Kristian di mad tanda do kosopulan tokou. Ong biano, i keloo do saiens kadapat dot ogumu it ongohal di bai biano kaharati om bai biano o kopongusaha, nga kakali amu-po atantu dot atag ino ko amu, ko kavasa om amu. Elo-no it ongosaientist do monimban di vangun do sapi, supaya ogumu banal o susu dau, ko i vogok, supaya okudik o lunok om ogumu ot onsi dau, ko ong maganak, suvai duvo nopod o kakang dot insani musu. Antad sid ubat varot ondu do kodung maganak, nga limo ko onom ko turu ot anak dau dit insani poustu.

Ko ong mongitung di vaza mamatai do sangod, nokemot dot ubat di polondihu dit ongohimbaan ko pogaas dit ongoulun, sampai matai kavi. Sid ongohal di iadino, mad aso-po hoturan di manarang di rontob do kavasa.

Na keso, ong i kobebasan di dang Kristian amu miabal om tanid mantadko it ongokobebasan sid tanga do riniba om it ongobansa om ongorazat. I kobebasan di tinarang di Paulus om i minongohodtol i Martin Luther, ino-no i kobebasan antad sid pinonuhuan ko Taurat do Kinoringan. I Taurat manarang dit ongorontob om it ongokaranggalan sampai manarang om manantu do siombo karanggal i riniba di rontob do Kinoringan. Topot isuhut di panarangan di Paulus, i pinonuhuan bai manalahas di karanggalan dot ulun. Sabap it ulun di nokensodu antad sid Kinoringan amu kotuluk di kenginan om pinonuhuan do Kinoringan. Iri-ogi ogusa tokou di pinonuhuan di pembulai di karaatan tokou. Suvai tumorima tokou di Habal do Kovosihan om i gama di Yesus palabus om pobebas di tokou antad sid kaadato om kagaratan do

pinonuhuan om otopotko obebas tokou. Iti-no o kolobusan tokou. Ombo it ulun di nosopulan ko notobus di Kristus, nakamung-no sid koposizan vagu sampai ozi iosido mozo di hoturan vagu dot okonko bai agaratan, inoi nga antad sid koginavaan monuluk tokou di kenginan do Kinoringan. Ong sid Kitab Laid i pinonuhuan do Kinoringan iadko ansal di kirugi. Ong aranggal, tantu oruol. Topot i kenginan do Kinoringan di tinarang di Yesus, mad kokovidan di sumusui do bantaran, supaya amu kovudsu om iri-ogi aratu sid bavang. Antad sid koginavaan kondiri sumuhut it ulun di mangasip di kenginan do Kinoringan. Iti-no o sabap, kondiri di Yesus minongonsi di pinonuhuan sid Pinonuhuan dot asamod. Om i Paulus amu abasan mongim-bulit di pinonuhuan dot asamod dino. Ino pinonuhuan dino amu monodiri dit ipat-ipat i hal, inoi nga napajak-no i sokovia i kavazao om kobuatano sampai i gama dot ulun Kristian sid pongoretan samod om manamod. Sabap ong manamod-oku do Kinoringan, amu-oku osusa do varo moniag diti om ino, tu ensanan i gama-ku sid tinoguvangon do Kinoringan, nga ponong sid kohormatan dau. Ko ong manamod-oku dit ulun vokon, am osusa-po do varo moniag manakau ko mongindaraat ko mamatai, tu i kosipan-ku suvai atantu o kosipan, ong ensanan i kobuatan-ku om kavazao-ku om bahazan-ku mongumbasih dit ulun vokon. I kosipan-ku mongusaha om sumunu sid saralom di samod dit antad sid Kinoringan om lumombus sid ulun vokon. Siti nokonong i boros di Paulus dot, *Sokoviai kavasa*, (1. Kor.6,12 om 10,23), ino-no ponong sid kopongombosihan dit ulun. Ong it ongokristian sid Korintus, tanid ot ohorotizan dioti, retanko, ong Kristian obebas do mangagama di nunu-nopo dot aso rontob. Iri-ogi ogumu o hal sid Korintus dit amu atag.

Suvai ohoturanan tokou di kenginan di Kristus, obebas tokou. Ong ohoturanan tokou di hoturan di ginavo ko guvas tokou, ouripanan tokou di kozian om karalazan tokou. I kobebasan do kosipan, ino-no i nohoturanan di Kristus (1. Kor 9,21). Okonko i pinonuhuan momogos om mongorugi di tokou, inoi nga i Kristus mangahatul om mongumbasih di tokou, supaya apasi tokou ponong sid di Kristus (Galatia 2,20: *I nunu-nopo i koposizan-ku dino, nga apasi-oku sid saralom di gama-ku mangasip sid Anak do Kinoringan, i minanamod dohon om i minongontok dohon. I Kristus ot apasi sid saralom-ku.*

Ong iadino o kobebasan tokou, obebas tokou-po antad sid ongokagaratan om kaadato do riniba ko bansa om razat. *Sokoviai, dikou-no kavi. I Paulus om i Apolos om i Kepas om it ongoriniba om i koposizan om i kapatazan om i biano om i tohudi. Sokoviai dikou-no kavi. Topot ong ikou dino di Kristus-no*

om i Kristus dang Kinoringan. (1. Kor. 3,21-22) Iso hoturan dot ulun nga aso kadapat mamalud di tokou, ong i hoturan dino sumaap di hoturan om kenginan do Kinoringan. Banal-no, ong varo hoturan sid pomogunan dot it ongokurita mamananu ponong sid gibang dot alun-alun, a-kavasa momoros it ulun Kristian, ino dino, amu nokonong sid dohon. Ioku diti obebas do mamananu sid vanan. Tu ong iadino okonko bai mangaranggal dit undang-undang sid alun-alun, inoi nga mokipatai om mamatai o harati. Topot hiza dit ulun Kristian kodori diri, varo Kaisar di minongogorot dit razat dau do sumamba ioti sid Kaisar retanko iosido Kinoringan. Kodung a-nokosuhut it ulun Kristian, otorungku ioti sampai apatai.

Sabap ino, i kobebasan tokou nokosokot sid di Kristus om nakabalud sid di Kristus. Isot ulun nga aso mopud sid kondiri dau dot amu nakabalud om nokosokot iosido sid kuasa di momorinta om mangahatul dau.

Koduvo, ong koubasan dit ongoulun do mamakai di pongoretan do "kolobusan/kobebasan" do manarang dot it ulun nakatanid mantadko i kinuripanan ko kotorungku (ino-no manarang sid nega-tiv). I kobebasan tokou ulun Kristian, nga positif manarang om manantu dot it ulun Kristian kikuasa do mongolumbatos di gama dau. Amu agaratan iosido ko osuhu om otilibi do barat ko mozo di kogumuai, gima aso tinganan sumunsung di kenginan dot ulun. Iosido dino tanggung jawab di dau do gama om kavazao sid nunu-nopo situasi. Bai i Habal do Kovosihan o mongohoturan di kosipan do mongusaha di tanggung jawab di iadino.

e) I kosopulan bahagi sid piniizaan.

Okonko bai it ulun dot toriso-iso o tumorima di kosopulan, inoi nga i kosopulan dau kiontok om ponong sid piniizaan dot ulun di nosopulan. Asot isot ulun masi dot iseso iosido, kokiraai iadko sid iso puru dot iso nga asot ulun vokon. Kuran-kuran it ipat-ipat it ulun, varo koruhang dau, minsanko bai i molohing ko it anak, savo. Antad di kinourugan kikoruhang i riniba. Ipat-ipat it ulun mopud om masi-po ponong sid ulun vokon, okonko bai ponong sid Kinoringan. Iti-no o sabap, iadko i kasalaan om kolonduan dot ulun humagut sid ulun vokon, pengkaa dino i kosopulan dot ulun, kiguna sid ulun vokon. I kosopulan sid di Kristus om i kosipan sid Kinoringan suvai kiguna om kosunu, ong ilombus sid ulun vokon sampai ahatul i piniizaan dit ongoulun.

I Habal do kovosihan, tantu habal ponong sid razat, okonko bai it toriso-iso it ulun. Kasalaan-ka, antad di kembulazan do gorija, it ongoulun di piniizaan

di Sundu dot Osusi (UR 2) a-insan do nopud banal. Varo-no laid piouduhan om kopigogutan (UR 6 om 15). Banal-no, varo-po kososizan dot ulun labus, retanko i piniizaan dot ulun Kristian banalko tanid, tu tumiru sid pialatan do razat. Boros di Kelsus diri (TM 95) "miskasmod banal ioti dot a-opitiiman do riniba", ka. Topot sampai biano kakali i gorija bai ngaran-no pemot dot ulun vokon dot i gorija o piniizaan dit ongoulun di nosopulan.

Ino-no i kosusaan do riniba, minsanko inurug i riniba ponong sid koruhang dau, tigogi it ulun rumosi om humalib ko sumolon dit ulun vokon. Ino dino, nokotimpuunan-no laid hiza di Kain om i obpinai dau Habil. It ulun mad engin tumalib di koruhang om monori di vokon, supaya randavi iosido. Iti-no i kosusaan di sompomogunan sid tanga dot ongakob om kampung om suku bansa om pomogunan sampai ensanan it ongobansa. Norungoi-no i piniizaan it antad sid Kinoringan, tu varo korosizan, karalazan, kohombilan, koivoguvan ko kopomorintaan. Na i Habal do Kovosihan pendongou di tokou do varo kosopulan antad dinot ongokaraatan dino, supaya varo piniizaan dit ulun Kristian, ino-not ulun di retanko osusi (1. Kor. 1,1-3) Ong sukul i kovosihan di Kristus o mangahatul di piniizaan do Kristian, varo kesaan dit aso kerad. Rontob-nopo, i puun do kosusaan di piniizaan dot ulun Kristian, kakali ipat-apat it ulun misimbangat di kondiri sampai mongitung dot iosido i keso o kiguna sid tanga do piniizaan ko gorija om piumpugan. Minsanko i mingin dot ulun vokon, iadko kusai om ondu, tigogi, okonko i manamod om mongumbasih o tomodon, inoi nga mokitahak om mokisisinang sampai it ulun vokon baiko pakakas di kosinangan dau. Suvai i Kristus i minanahak di kondiri dau o mangagazad di tokou om ogiangan-ogi i ralan kumaa sid ulun vokon dot asot ansal om rinding sid pialatan dot ulun. Ong nokosondu sid kovosihan om samod do Kinoringan, natanus-no i korosizan dit indoson, Osolon-okou do koruhang, ko, orugizan-okou om ohombilan-okou, ko, ouripanan-okou. Pengkaa dino, amu-okou mokimamaha-po ko sumolon di dohon do kosukupu om barang. Sabap i samod di Kristus o monuduk dohon dot obebas-okou ponong sid ulun vokon, sampai itahak-ku i kondiri-ku, okonko mokitahak ko mongogorot o tomodon-ku sid ulun dino.

Sid kobebasan dino, kogoos-okou do manamod-po do sangod (Matius 5,43-48) Iri-ogi ababak i balud di vozoon do rogon di misusuli, miraraat om miruruginopo. Tu aso tinganan do suvai manamod, ong asamadan-no laid. Sabap ong iadino, asot iso tumimpuun manamod om mongumbasih ko humarap sid ulun vokon.

Bai i samod do Kinoringan o pobeas dohon antad sid korosizan om i gama monongkudau ko mokimamaha, om monginghakang di samod-ku dit amu mongitung di kondiri dau sampai pasasi om posuntu sid ulun vokon di kogozoo do samod do Kinoringan. Antad diri osulian i samod om mimbulai i piniizaan dot samod dit agazad om otunda di Sundu dot Osusi. Sabap i Sundu dot Osusi o laid mongogiang om pobeas di ginavo dot ulun ponong sid ulun vokon, om sid vaza di samod dino mongogiang-po i Sundu dot Osusi di ginavo dot ulun vokon, supaya rumamit iosido di samod om monuli ko mongolombus-po sid ulun vokon.

Ino-no i kengkakatan di piniizaan dot ulun Kristian, Varo iso o Tuhan om iso o Sundu dot Osusi di mangahatul om mamasi di piniizaan dino. Nokopezo-no i piniizaan sid di Kristus. Iti-no o kosopulan di piniizaan, isuhut di boros di Yesus sid Yahya 17,22-23 "supaya kopiiso ioti, iadko i Ama-ku om ioku, nga iso-no, ioku-no o kumiiso dioti om ikau nga kumiiso dohon, supaya arangkap banal i piniizaan om ohorotizan-ogi di vinangun do sinuhu-oku dikau sampai asamadan-nu ioti, iadko i gama-nu manamod dohon", ka di Yesus.

Ino piniizaan sid di Kristus jumadi do piniizaan di keloo om kosipan om pongitungan om samod om i gama sumuhut di kenginan do Kinoringan. Isot ulun nga aso kokristian, ong amu mamung iosido sid piniizaan dit ulun Kristian. Gam i piniizaan dot ulun Kristian mongonsug di vokon, supaya mamung iosido.

Kasalaan-ka-nopo, minsanko sid keloo om kohorotizan, nga oruhai opiduvo it ongoulun Kristian, sampai nabahagi i gorija antad di Paulus om i Markus ko i Petrus do sampai biano. Iti-no o sabap dot ogumu it ongongaran dit ongorija dit okonko di Kristus o ngaran. Varot ulun Kristian di retanko iosido o nakasanganu di katapatan di kavazao do Kinoringan. Bai iosido o nokelo. Ong i vokon, amu, ka. Ong otopot, suvai miopud i katapatan om i samod om atag-ogi ino. Banal-no, amu enizo i pongohorotizan do Kinoringan, tu i keloo om kohorotizan dot ulun bai ngaran-po elo om kaharati dot okonko enizo o keloo om kohorotizan. Ong sukul sid samod o vaza-ku tumorima-oku di kohorotizan dit ulun vokon di tanid mantadko i dohon do kohorotizan om kosipan om keloo, varo harapan-ku dot i Kinoringan kondiri patag om pemumui dit ulun dino om mongimbulai-po di suromo di kovosihan om katapatan dau. Ensanani tokou amu kaharati kavi. Boros di Paulus, "Biano bai ngaran-ogi-ko kotutun" do Kinoringan (1. Kor. 13,12). Topot okonko itino o kiguna, inoi nga, "i kotutun do Kinoringan dohon".

Manjadi, i piniizaan di Kristus mangagazad dit ulun Kristian sid kopihohorotizan om kopisasamadan om kopitatabangan om i gama mongusaha di kenginan do Kinoringan sampai kembulai i kopiobpinezan di mipapasi om mioopud. I puun di kopiobpinezan dino, i gama sumambayang om iri-ogi i kopiopudan sid tanga do razat. Sabap sid tanga do razat ososizan i kosipan om ousahaan i samod. Iti-no o sabap dot i piniizaan dot ulun Kristian mad iso ot onkob di Kristus, tu i Yesus Kristus ot obpinai tokou om i Kinoringan o Ama tokou. Inot onkob dino noboludan om nohoturan di samod do Kinoringan sampai mihaharap dit ongoobpinai, gima i harapan sid di Kristus om i Sundu do Kinoringan o popezo di tokou om monunda di tokou.

Ong varo karaatan om karanggalan sid tanga do piniizaan, kakali i piniizaan kogoos do pada dit amu onong om mangatag omba it amu atag. Sabap ensanan i piniizaan mopud, gima i kapangadaan do Kinoringan di karanggalan dot ulun.

Bahagi V: I PIUMPUGAN DIT ONGOULUN DI MANGASIP

1. I puun di piniizaan di mangasip.

Siombo-ka o varo kosipan sid di Kristus? Ino-no, sid piumpugan dot ulun Kristian om sid gorija. Kasip-oku dot iso o gorija dot ulun Kristian dit iseso om osusi-po, ka di kosipan. Ino gorija dino minopud antad diri-po (Pentekosta UR 2) sampai kakali opud biano. I di tokou do kosipan mad iso vuku sid rantai di kosipan antad dit ongorasul diri. Manjadi i kosipan masi om sumurut ko humino sid gorija om piumpugan. Varo boros di Calvin dot i gorija iadko it idi di posusu dit anganak, supaya mopud om sumurut ioti. Ong it ulun Kristian amu mopud om sumurut sid bai kondiri dau. Baikou sid piniizaan varo kopiopudan di kosipan tokou.

I gorija om ipat-ipat i piumpugan dot ulun Kristian nga suntuan om ondig-ondig di karajaan do Kinoringan, om i riniba vagu di nemvoguvani sampai pakakas om koburuo di Kristus om i hoturan do Kinoringan sid tanga do razat. I Paulus mongonsug di piumpugan sid Filipi (1,27) oingkakat-kou-no dot apapag sid iso-no i Sundu sampai iseso o ginavo dikou magavi bahagi di kosipan sid Habal do Kovosihan, do meradi i samod dikou om iseso i ginavo dikou sampai iseso i pongitungan dikou om kadan-no misolon ko mokipangkat, Ino-no it atag, ong osibak i ginavo dit ipat-ipat it ulun Kristian do kiroon-no i koruhang dot asavat mantadko i kondiri.

Suvai sid tanga do piumpugan kadapat tokou posurut di kosipan. Iri-ogi ensanan i piumpugan om ipat-ipat it ahli do piumpugan sasi di Kristus (UR 1,8): Ikou dino o sasi-ku, ka di Yesus sid kinoruhangan dau i hiza di humuntad. I toriso ulun Kristian, nga koburuo di kososizan di nosuhu om antakan do piumpugan.

Pengkaa dino ipat-ipat it ulun Kristian mamung sid kopomintaan dua do piumpugan. Sabap i pomintaan dua do piumpugan momongindazou do Kinoringan om momongontok minta dua bahagi dit ensanan i riniba. Ino dino kiguna banal i hiza do sumambayang. Minsanko i bai manangamin hiza di kinompuso do pomintaan dua, nga kiharati dot ensanan i nokopiumpug, nga mamung om miso sid pomintaan dua dino.

Tanid mantadko ino, i piumpugan om gorija kitugas ponong sid razat om i porinta. It ulun Kristian om i gorija, okonko bai masi ponong sid Kinoringan om ponong sid surga. It ongokosompitan om ongokodolikatan di razat, sid kampong ko daerah ko bansa, nga kosusaan om kodolikatan di piumpugan. Tu i piniizaan mopud sid tanga do razat. I piumpugan moniim do monodiri di nunu-nopo i kenginan om hoturan do Kinoringan sid sokovia i it ongokosusaan di razat om bansa om porinta, supaya ipat-ipat it ulun Kristian tumanggung jawab di kolombusan om kopudan di razat om porinta, isuhut di kenginan do Kinoringan. Okonko it ulion do gorija o kobongut om mogkovosihan do iadko i gorija nakatanid mantadko i razat, inoi nga antad di kohorotizan di piniizaan dot ulun Kristian, ipat-ipat i Kristian mongolumbatos mansadang om sumuhut dit ombo it atag o gama, isuhut di kovosihan do Kinoringan.

2. I piumpugan dit ongoulun di mangasip om ensanan i gorija.

Nunu-ka om siombo-ka i piumpugan om gorija di iadino?

Sid sokovia i panarangan dino mimbulai dot i kavazao dit ensanan it ongorija om it ongoulun di retanko Kristian sid sompomogunan amu kopionong di gorija isuhut di kenginan do Kinoringan om i vaza di Kristus mangahatul di gorija.

Sid kopomodsuhan om poginakanan di Tuhan Yesus minongodim om minamung i Kristus dot ulun sid piniizaan om piumpugan dau, dot i kopomodsuhan om poginakanan diri, tanda di kinapatazan om kinogulianan di Kristus. Iri-ogi i piumpugan retanko, "Guvas di Kristus" om i Kristus, nga it ulu di guvas dino (Rom 6,4 om 1.Kor. 12,12 om 10,16). I Kristus o mongumpug om momodsuhan om pakan dit ulun di kamung, om popihot dioti sid

piumpugan dau o tomodon. I Sundu do Kinoringan pogiang dit ongoginavo om mongimbulai di kosipan om popezo dit ongoulun Kristian sampai potugas dioti, supaya sasi ioti di Habal do Kovosihan om tanda ioti di karajaan om hoturan do Kinoringan sid tanga do riniba.

Rontob-nopo, amu alaid do iadino o kinotimpunan, ino duvo sakrament dino mad hojimat di kovosihan do Kinoringan om ubat bahagi di koposizan penlaid o kiroon di kogumuai. Antawa ong i Paulus diri minomoros dot iosido rasul antad sid suhu om kodim di Kristus (1. Kor. 1,2 om 5,4), tigogi amu songkuro, varo kapamangkatan dot ongobishop om pandita sampai retanko i Bishop do Rom, i kuasa antad sid di Petrus nokolombus sid dau. Iosido o minonungkus di kuasa di Petrus dino sampai kumavid di kungsi sid surga Mat. 16,19).

Tigogi okonko i habal do Kovosihan om i kuasa di Sundu do Kinoringan o minomongo mangahatul di gorija, inoi nga varo tudukan om ajaran di inumpaladan do bishop om sinoda. Ioti minangaratu dot ombo it atag osipon, retanko baiko ioti elo mangaharati di Kitab. Om iri baiko it ulun di kihak sid hoturan do gorija kavasa mamahagi di Sundu do Kinoringan sampai it on-gopandita mad kungsi do gorija di mangavid di kopomodsuhan om poginakanan di Tuhan Yesus. Nengkod-no i kuasa om tudukan di Kitab. Iti-no i kinopolidan do gorija RC. Kagi, sabap i Kaisar Konstantin minomili di kosipan sid di Kristus dot ugama rasmi sid karajaan do Rom, varo suhu dau dot ipat-ipat i warga negara Rom, a-milo-milo opodsu om ahli iosido do gorija. Ensan an i razat di karajaan do Rom nakamung-no sid gorija dot amu monodiri do kasip ko amu.

Antad di hiza diri varo razat di retanko nokokristian, tu nopodsu-no dit anak-po. Topot tinumanus-no i kosipan dot antad sid di Kristus. I gorija jinumadi dot organisasi di ginumavul sid duniawi sampai linumawan om minonolod-po do kuasa do porinta. Bai i hoturan di Kaisar o kinovidan di gorija.

Na i hiza di Reformasi nakaharati it ongoulun di minongimbulai di kopongimvoguvan do gorija dot banalko a-nokonong ino hoturan do gorija. Topot amu kogoos ioti do monimban di hoturan do gorija. Minsanko pinengkakat-no vagu ioti di Habal do Kovosihan do kongkod di kosipan om gorija, minomongo ioti do manahak di hoturan do gorija sid palad dit ulion do pomogunan om daerah. I koubasan laid inovit-no sid hoturan dino, isai-nopo i nokosuvang sid iso o daerah om pomogunan do kivaro ulion do

Kristian do Protestant, Kristian iosido do Protestant om opodsu iosido isuhut di hoturan dino. Minsanko i tudukan di Reformasi minongolumbatos do suvai it ulun di mangasip o kokristian, kakali tiumurut di hoturan laid diri antad sid ongokuasa dit ongoulion do pomogunan. Iti-no o sabap, sid ongopomogunan dit alaid-no nohoturanan dit ongoulion di retanko Kristian, RC ko Protestant, sampai biano i kogumuai dot ulun opodsu-no laid dit anak-po iosido, topot amu tantu gumavul sid gorija om piumpugan. Varo pitonidan dit aso tinganan sodirizon, i gorija di mad organisasi do duniawi om i gorija di piniizaan dot ulun di mangasip.

Ong itungon tokou do nunu banal i gorija om piumpugan sid Sabah, tu nakatanid tokou mantadko i kaadato dit ongogorija sid Europa om Amerika, pengkaa dino,

a) Sabap i Gorija sid Sabah okonko bai tinumungkus dit ongogorija laid diri, inoi nga antad di kodim di Yesus Kristus hiza biano, i tokou tantu okonko bai razat di ngaran Kristian, gima i kopomodsuhan dit ongoulun Kristian antad sid gama di Sundu do Kinoringan om i timpa dot ulun sid kodim di Kristus. Banal-no, biano tumimpun-ogi do varo mongiro di kopomodsuhan dot anak iadko adat om undang-undang ko bai vaza mangaramai. Iti-no o sabap, atag dot engat tokou om kumavid tokou dot i gorija, ino-no i piniizaan dot ongoulun di mangasip om i tempat dot i Kristus mongodim dit ongoulun sumuhut di piniizaan dau.

b) Iadko i Yesus minongimbulai di kopiobpinezan di nahatul-no di Sundu om samod do Kinoringan, iti gorija diti mopud sid piniizaan dino, ong eseso o kosipan om eseso o ginavo kumavid di samod do Kinoringan dot amu engat do varo-po rontob di samod dino. Elaan tokou-no dot nokodim tokou om inanu tokou do koburuo di Kristus sid osinggazun o kososizan om gama minta dua om ponong sid gama mongumbasih di riniba di kikosusaan. Ipat-ipat it ulun Kristian kitugas sid saralom do gorija, isuhut di keloo om kakansango om panahakan di Sundu dot Osusi dot amu atag monodiri, ombo i baiko suka rela om i kerja penuh. I hoturan di gorija antad sid upakat om kolumbatasan di sokoviai it ulun Kristian di nakamung sid gorija (sinoda, wilaya, puruvan, piumpugan, ongekob). Pengkaa dino engat i gorija sitid Sabah dot nokopezo dit ongogorija vokon sid ongopomogunan vokon, gima iso o Tuhan di mangagazad di sokoviai it ongogorija sompomogunan.

c) I piniizaan sid kosipan okonko bai hal do rohani, inoi nga i sokoviai i kobuatano, rohani om duniawi, nga ohoturan-no di kuasa om kotuhanan di Yesus Kristus. Iti-no o sabap, masi i piniizaan di Kristus, ino-no i gorija,

ponong sid ulun vokon om ensanan i riniba (UR 1,8) dot ino tugas dino a-
engat do rontob ponong sid sodu om i hiza.

d) Songkuro-nopo varo organisasi om hoturan di dang riniba, kakali i gorija
nga gama om usaha di Sundu do Kinoringan. Iti-no o sabap dot onining i
gorija do nunu banal o kenginan om gazadon di Sundu do Kinoringan.

e) Sabap ino, engat di gorija dot i hiza biano bai pongodumparan di karajaan
do Kinoringan di nokotimpun laid hiza di Yesus Kristus sid Kana diri, nga
amu-po otuluk sampai kakali rumikot-ogi. Iti-no o sabap do humarap i gorija
di kamanangan di Kristus. Topot kakali magavi posurut di dau do tugas,
isuhut di kogooso dau.

Bahagi VI: I VAZA DI KITAB MANARANG DI SUNDU DOT OSUSI

Songkuro-nopo alaid tokou ulun Kristian, kakali amu-po koduzan om karamit
banal ko kotutun di kumuro i Sundu do Kinoringan. Kagi, pempatai tokou
misingilo om tumoguvang di kuasa do Kinoringan dot aso tinganan
mongompus do keloo kananganko i Kinoringan om i vaza do Kinoringan
mingsomok sid di tokou sid saralom di kuasa dau i retan do Sundu dot Osusi.

Kagi, ogumu o kogolivongo antad sid ongoulun om gorija vokon di monuduk
di Sundu dot Osusi sid onpongoretan om panarangan vokon, tanid mantad-
ko sid PCS. Varo di turus mamakai di pongoretan sid Bahasa Malaysia, ino-
no ROH KUDUS. Gam vokon-no ong amu mamakai di boros daerah sid
gama mengkhotbah, tu i kopurimanan dioti, suvai sid Bahasa om kadapat-ogi
posondot di boros do Kinoringan. Indoson dioti ong i Kinoringan mamakai di
Bahasa, iadko it Ongosilam, suvai sid Arab om kadapat-ogi mamasa di
Quoran.

Dot ong otopot, ino pongoretan Roh Kudus, okonko Bahasa, inoi nga boros
Ibrani di nakaraliu sid Boros Arab om nokolombus-po sampai inolos-no sid
Bahasa. Sabap i boros banal dino, ino-no RUACH KADOSH. I Ruach, ino-no
o harati, BARAT om pinohobo. Iti-no ot atalahas, ong barat ko pinohobo, a-
emot, bai opurimon ko sid roun do kazu emot tokou ong varo barat, barat dot
ololomoi ko borizu. Kagi i barat banalko ahakang om kikuasa. Tu minsanko
tarabang dot 300 tan, oviti, ko ong sid tair do kurita om lorry, manaan di
kavagato do barang sid lorry. Topot i suvang sid tub, a-kemoti.

Ong i pongoretan *kadosh*, ino-no o kosondoto: banalko tanid mantad
koubasan, osodiri banal, okonko hal dit okovidan om ensasakahan. Ong varo
boros di Kitab dot osusi i Kinoringan, ka, ino-no o harati, banalko tanid

i Kinoringan mantadko i sokovia i kiroon do riniba om amu kadapat i riniba do minsomok sid Kinoringan.

Manjadi it ulun di mamakai di pongoretan Roh Kudus, mad malan iosido do manarang di kogunaan di Sundu do Kinoringan, gam mamakai di pongoretan dino iadko ngaran banal. Ong amu manalin di pongoretan dino, ino-no o harati, kumaa sid bansa vokon om misisingilo di boros dioti, supaya humarati tokou di boros do Kinoringan. Dot ong otopot, hiza di Pentakosta minongirim om minonuntug i Kinoringan di Sundu om kuasa dau sid ipat-ipat it ulun, supaya it ulun mongining di kogozoo di gama di Kristus bahagi di riniba sid dau om dau do boros daerah, okonko sid boros Ibrani. Iti-no o sabap, do suvaiko sid boros dot ulun om varo-ogi kahabaran di Habal do Kovosihan om sumuhut tokou di kenginan do Kinoringan, ino-no, koromut i boros om habal om samod dau sid ipat-ipat it ulun, supaya iosido kopurimon di samod om kaharati di boros om osuvangan iosido di kuasa di Sundu dot Osusi.

Manjadi sid gama manalin, it ulun di manalin momorisa di boros dit rikoton di solinan, omba o pongoretan kadapat mangatod di harati do pongoretan dino. Kagi mongimot-po sid gama manalin sid ongoboros vokon do kuran o gama sori. Ino-no rontob, amu humago o gama dau molos di boros pasok di Kitab om mamakai sid boros di rikoton di solinan.

Na sid boros Ingggris, ino Ruach kadosh nasalin dot, Holy Ghost ko Holy Spirit dot i Ghost, ino-no bubuha om spirit, ino-no rogon. Suvai nakamung-po i pongoretan "holy" = osihat, avanus, oulud om ovit-ogi i pongoretan dino do bai ngaran di tinomod di pongoretan dino. Na alaid-po pipapakai i pongoretan dino, noling-an-no dit ongoulun dot i pongoretan ghost om spirit, nga pongoretan om ngaran di kuasa dot araat. Topot ong ulun dit okonko Nokokristian antad dit opodok-po, ogolivong do kening iosido do varo bubuha dot avanus ko varo rogon dot oulud. Sabap ino, i vaza di Kitab Ingggris poromut sid ongoulun di Habal do Kovosihan om i gama di Sundu dot Osusi, tantu amu nokonong i pomilihan do pongoretan.

Na i hiza di minoghihim-okoi di pongoretan di kopionong di harati Ruach Kadosh, minongontupat-okoi di gama do bobolizan. Iosido minoniim sid gama mangambo do pedu dit indorosi do binatang ko i panakit sid gama povizau di kuasa dot araat sid gama mokitulung di kuasa dit avantang di monulung di riniba do manangkis di kuasa dot araat. Na i kuasa dot araat di panakit dot ulun ko pasala dot ulun, i retanko mongoruzou do pomogunan ko mongolizud do pomogunan om porikot di butu om gizuk, ino-no, Rogon. Gam varo`t

ogumu o rogon dot ikid rogon, kingaran iadko Rusod, Bambarazon om i iadino. Inot ongorogon dino, isot ulun nga aso nokemot. Tu mad varo sid ropuhan, sid valai, sid pampang, sid tagad, sid sulap, sid luvang, sid talaga, sid indai om siombo-nopo. Ensanani i pomogunan om vinangun ohoturan om orugi om oporinta om ouripon do rogon, ka diri. Manjadi kodung mangambo i bobolizan sampai rundukan, manabul-po laid iosido dot monizas di vagas ponong sid savat, ino-no o harati, mongodim iosido di kuasa dot avantang, ino-no i Sundu. Ino dino banalko agazo o harati. I bobolizan, okonko ulun Kristian iosido, nengat-no laid dau do varo kuasa sid savat di monulung om mangahatul do pomogunan om mangapad di riniba. Nokokuro-ka? I hiza di kinsavatan di Yesus, minomoros iosido sid kinoruhangan dau dot,

Sokoviai i kuasa sid surga (avan) om sid pomogunan, nakatahak-no kavi sid dohon, ka.

Ino-no o harati, minsanko it ongoulun dit okonko Kristian om it ongomogunan dot amu-po norikatan di Habal do Kovosihan, sid palad-no laid di Kristus sampai i kuasa om Sundu dau nokosino-no laid om mamakai dit ulun iadko pakakas di hoturan dau. Iti-no o sabap do minongonsug i Paulus dit ulun Kristian minta dua bahagi di Kaisar dit okonko Kristian sampai i tokou, nga iadino o gama. Tu harapan tokou dot i Kinaringan kadapat mangagazad om mongoluhung dot ulun dit isai-nopo, i Clinton sid USA ko i Ketua Menteri di pomogunan tokou, ko i Deng Shau Peng sid Kina, supaya atag o hoturan sid pomogunan dioti. Okonko bai sid ongomogunan di nokokristian o kikuasa i Kristus. Minsanko it ongobobolizan varo kiroon do varo kuasa antad sid savat di monulung om mangapad do riniba.

Manjadi, tu sid boros Momogun, osodiri-no laid i kuasa dot avantang dit a-emot om i kuasa dot araat di monusa om momogos dit ulun, dit miabal dot a-emot, oruhai-no dara momili di pongoretan di kopionong sid Ruach Kadosh, ino-no **SUNDU**.

Topot banalko aso tanganan mamakai di pongoretan **ROGON**, retan do rogon dot avantang ko rogon dot avanus, ko rogon dot olidang. Ong i Kitab Dusun mamakai di ngaran banal dit iso o rogon, i monusa dit ongekob, ino-no Rusod sampai mangarait di Ruach Kadosh dot, **RUSOD DOT OLIDANG**. Ino dino, sabap ino hiza do manalin, amu-no minogihim banal i minanalin do pongoretan sampai it ulun di minonuduk di misionari, nga sukod vagu dit a-po nakaharati di dau do boros om i kobuatano dit ongobobolizan. Ino-no ot inihim dioti, i kuasa di mintoron sid valai dot ulun, ino-no, i rumusod sid ongoulun om i monguasa dit ongoulun. Kagi napalid-no ioti sid panarangan

di boros Inggeris dot i ruach kadosh dino, nga sangkazu (person) ko buatan di nakamung sid retanko Trinity ko ong BM Tritunggal. Tu sid dogmatik dot Inggeris, retanko i Trinity, varo tolu o person ko buatan dit antad sid iso-no.

Ong otopot, ino pongoretan dot Kinoringan it Ama, anak om Sundu dot Osusi, nga vaza manarang dit aso tinganan tarangon. Moniim dara i panarangan dino do manalahas dot i Kinoringan, i minongurug dit avan om i tana, iadko Ama, tu antad sid Kinoringan i sokoviai. Iri-ogi i Yesus Kristus, i minongovit di samod do Kinoringan sid riniba (Yahya 3,16), tu antad sid Kinoringan, retanko Anak dit iso-no. Kakali asarok o boros sid Kitab dot it ulun Kristian dino Anganak do Kinoringan. Tanid mantadko ino, i Yahya 1 manarang di gama di Yesus sid gama mangarait di Yesus dot, BOROS DO KINORINGAN. Ino boros do Kinoringan dino, varo-no laid hiza di kinourugan. Pengkaa dino, i Sundu (ruach) do Kinoringan, varo-no laid hiza di kinourugan, tu mulud-tulud sid soribau do vaig, ka sid Kinotimpunaan 1,2.

Manjadi, ong moniim tokou do rumamit di kogozoo om i suromo do Kinoringan sid di tokou do pongitugan om boros - dot atalahas-no laid dot a-kotutun tantu om amu akandai tokou banal i Kinoringan, tu bai ngaran ot ohorotizan om bai ngaran ot elaan tokou do Kinoringan, isuhut di boros di Paulus sid 1. Korintus 13,12 -, amu atag do mamakai tokou dit ongopongoretan do varo tolu o buatan do Kinoringan ko varo tolu o kondiri do Kinoringan ko varo tolu o pribadi do Kinoringan ko varo tolu nakazu o Kinoringan, iadko momoros dot varo tolu nakazu ot ulun ko varo tolu batang o babaal. Sabap ino kavi-avi ino, amu-po miuma manarang om amu apatut mamakai sid gama manarang. Tu aso't iso o kadapat monondot do sampai akandai i kobuatano om harati do Kinoringan.

Ogumu o poniiman manarang, iadko sid nizuw sid Bak-bak om Tinutudan di varo't iso batang di miniparang do tolu batang ponong sid untu. Ko it ulun, varo guvas dau om varo boros dau om varo kuasa dau. I boros dau oening, om i kuasa om kakansangan dau opurimanan, ong okovidan ko ohodtungan ko abambangan, dot iri-no ko iri it ulun dino o mongimbulai.

Varo-no manarang sid elektrik, ino-no varo puun do karan, ino-no it enjin di poturug di generator, om iri-ogi i davai i pengrikot sid valai om bulb di karan, om iri-ogi i karan. I davai mangatod di kuasa antad sid generator, ong kodung mamanan om oturug i generator dino. Sabap ino, i davai iadko i Kristus i porikot sid di tokou di samod do Kinoringan om i Habal do Kovosihan. I

mengkhotbah, nga vaza mangatod. Ong korikot i karan sid ulun, sid ginavo dau, iri-ogi varo kanavaho. Ino karan dino, ino-no mad i kuasa om Sundu dot Osusi di mongimvagu om manganavau dit ulun, supaya iosido nga panganavau do ponoguan, isuhut di boros di Yesus sid Matius 5,13-15. Kodung noputut i davai, aso-no karan, nga kakali amu kemot do karan mamantau sid davai. Suvai opurimon, ong okovidan, ponong sid kanavahan om ponong sid kapatazan.

Minsanko iadino o gama manarang, nga ngaran-no kotudu di kogofoo om kohormato om kosunduvo om suromo do Kinoringan. Amu akandai tokou i Kinoringan. Inoi nga, gam sid palad tokou do Kinoringan sampai ajadi tokou do pakakas do Kinoringan. Okonko i sunggip momorinta ko mamakai di monunggip, inoi nga i sunggip o pinakai di monunggip, ko i sangkul, ko i nuu-nopo o pakakas.

Iti-no o sabap, do bai iadino o kadapat tokou humarati, ino-no, varo tolu o vaza do Kinoringan mongimbulai di kondiri dau sid di tokou, ino-no, sid kinourugan om sid koponopulan om sid basahan tokou. Kinoringan o minongurug di tokou do iadko Ama tokou, om i Yesus o minanapul di tokou do iadko obpinai tokou. Iti-no o sabap, Anak iosido do Kinoringan di randavi. Iri-ogi i kuasa do Kinoringan sumuvang sid di tokou om mamakai di tokou do pakakas di samod om Habal do Kovosihan ponong sid kopioondusan om kabanaran do Kinoringan sid suvang do pomogunan.

Na sid Kitab Laid, it ohodtol banal manarang di korikatan di Sundu do Kinoringan sid rinba, ino-no i Yoel 2,28-32 (3,-5) om i Yesaya 44,3 om 30,15 ko Zakaria 12,10. Okonko bai it toriso-isot ulun sikiban om orolungan di kuasa do Kinoringan, iadko i raja Daud i nabi Elia om Elisa ko i Amos, ko i turu nopod ongosukod sid belantara om i Musa-po, inoi nga i kuasa do Kinoringan, it Sundu dot Osusi kotuntug om sumuvang sid sokoviai it ongoulun di mangasip. Iri-ogi kaharati-no it ongoulun di kenginan do Kinoringan om polombus di samod do Kinoringan.

Ong i Yeremia mamakai di suntuan dot it ongoulun atahakan do ginavo vagu. Ong i Yehezkiel, i baiko tulang-po om bangkai i riniba, nga ogulianan vagu do jumadi riniba vagu.

Na sid di Yoel, ensanan it ongoulun, solumpak vagu, ongosukod, ondu, kusai, minsanko it ongouripon, inot ongoulun dit aso ngaran om otomihion karamit kavi di Sundu do Kinoringan.

Ino koromitan di Sundu, okonko gama dot ongoulun, ko i keloo om kopintaro dot ulun. Amu kadapat it ulun mansahari sid kosunduvo dau,

retanko iosido o manansanganu di Sundu, ko Kisundu ong ioku, ka, ko, Ioku o manansanganu di kosinaan vagu (memiliki lahir baru Yahya 3,3-5). Gamko kodung nosuvangan-no do Sundu dot Osusi it ulun dino, amu-no oburuvak it ulun, inoi nga antad sid agazad di Sundu mokiuripon-no iosido di sokoviai om mongimbulai dit ongotanda om uva do Sundu, isuhut di boros di Paulus sid Galatia 5,24-25.

Na it ongonabi iadko i Yesaya, Amos, Yeremia, okurang o gama dioti posondot dit ongobahanda kananganko i hiza di rumikot-ogi. Ong i nabi Yoel manarang di hiza dino iadko kotutun banal iosido do nunu o jumadi. Nokotoguvang laid di nabi i tajuk dot, ADAU DI TUHAN sid fasal 1-2 (i bahagi keso). Iti-no o sabap, hiza di minonurat i nabi di kinahajangan om kinosusaan di nakatalib diri, nga pinamung-po iosido do panarangan om kuran do iosido nakaharati dit ongobahanda laid kananganko i hiza di rumikot, iadko noboros laid sid Amos om Yesaya om i vokon it ongonabi sampai posondot di kinohorotizan dau sid buuk dino. Iti-no o sabap dot inot ongoayat dino o kosondoto om inonsi di pangalaman di Yoel kananganko i boros di Tuhan om i vaza do Kinoringan mangagazad di bansa dau.

Manjadi ayat 28-29 mongusul om mamahanda do kuran di Kinoringan potuntug di Sundu om kuasa dau sid riniba, ayat 30-31 it ongotanda dit Adau di Tuhan om i kensamakan dino. Ayat 32 pendongou di kosopulan dit ongoulun di mangasip sid Tuhan.

28-29 Iri-ogi pentahan i nabi Yoel do varo hal di rumikot-ogi. Asarok do varo pamarasan om bahanda di iadino o kotimpuunan: Iri-ogi, ka. Kinoringan manahak di Sundu dau sid sokoviai it ongoulun. (Ino pongoretan "guru" sid 2,23 mad bahanda laid kananganko i Sundu dot Osusi) Ino boros dino mongimbulit i Petrus hiza do Pentakosta, retanko biano nokosunu-no iadko nibahanda-no laid di Tuhan, ka (Usuran rasul 2, 16-21). Varo-no vagu boros do iadino sid Yesaya 44,3; 32,15 om Zakaria 12,10). Ino-no o harati ino boros dino, I hiza di rumikot, okonko bai it a-ko piro ot ulun o sikiban di Sundu do Kinoringan, iadko i raja Daud diri, ko i nabi Eliya om i Elisa, i Amos omt ongonabi vokon, ko i turu nopod it ongosukod sid belantara om i Musa, inoi nga i kuasa do Kinoringan, retan do Sundu dot Osusi momodsuvang sid sokoviai it ongoulun di mangasip. It ulun di nosuvangan di Sundu do Kinoringan nakaharati om nokelo di kenginan do Kinoringan om i panangan di gama do Kinoringan ponong sid riniba. Inot ulun dino amu-no engat i dau do kenginan om dau do pongitungan, inoi nga agazad iosido di kuasa om kenginan do Kinoringan. Noboros-no laid hiza di Musa do varo hiza rumikot dot amu osusa do varo-po nabi di pentahan sid bansa om it ongoulun sokoviai

i kenginan om pinonuhuan om kovosihan do Kiningan, tu gamko kondiri dit ulun kotoguvang om kopiboros om kaharati di boros do Kiningan. Ong i hiza di Musa kakali osusa do varo mongolintanga om bantaran sid pialatan do Kiningan om it ongoulun, retanko it ongoulun, minsanko sumonsob sid vuos do Kiningan nga amu kogoos ong kodung kopitoguvang do Kiningan, ka. Na i Yeremia 31,33 om Yehezkiel 36,26 varo boros di miabal dino, ino-no, it ongoulun kopikondiri do Kiningan, sabap varo ginavo vagu om varo koposizan vagu di mad ogulian it ongobangkai ko buntung dit ulun minatai. Sid a-ko piro panarangan di iadino mimbulai i kiroon om jangkaon do varo kosinaan koduvo dot ulun, i retanko lahir baru ko vangun vagu.

Ino-no i kovongo siti, okonko bai it anganak dot ondu om kusai, it ongolumohing om it ongosolumpag vagu, inoi nga minsanko it ongouripon, it ulun dit aso guna om aso ngaran, kotorima kavi di Sundu dot Osusi. I harati, hiza di rumikot-ogi, amu mominaig-po dot ulun di bai uripon ko puhavang, ulun do lumundu om mosikim, ulun do kigalar ko kipangkat om ulun di pokudiai. Ong sid Kiningan, kiguna ko gunaon kavi, sabap i kosopulan di Tuhan Yesus ponong sid isai-nopo it ulun di mangasip (Yahya 3,16). Ino nuvan do Sundu okonko gama ko keloo dot ulun ko kopintaro dau. Kagi it ulun a-kadapat mansahari sid kosunduvo dau, retanko iosido manansanganu di Sundu, ko, Kisundu ong ioku, ka ko ioku o manansanganu di kosinaan vagu (memiliki lahir baru). Gam kodung i Sundu dot Osusi monguasa dit ulun om i ginavo dau, amu-no momuruvak it ulun dino, inoi nga antad sid agazad di Sundu mokiuripon-no iosido di sokoviai om mongimbulai dit ongotanda do Sundu, ino-no samod om kabanaran om kovosihan sid isai-nopo it ulun. Sabap, kodung i Sundu dot Osusi manansanganu dit ongoulun, otopot-noko i Kiningan o mangahatul om manaud dit ongoulun sampai i pomogunan, isuhut di kenginan dau. Iti-no o sabap, i Sundu di nokosuvang-no sid ginavo dot ulun popezo dit ongoulun, okonko popitongkizad di piumpugan om gorija. Sabap ino, siombo-nopo varot ulun di retanko kisundu iosido, topot i gama dau nga ponong sid kopitongkizadan, tu retanko bai iosido o kisundu om bai iosido nokelo di sokoviai om notudukan di Sundu, ka, ino dino tanda dot okonko i Sundu do Kiningan o monguasa dit ulun dino, inoi nga i kuasa do Rogon di mangasau om mongunang, momurugou dit ongoginavo dot ulun. (iti kagi i harati di pongoretan do Saitan ko Iblis ong sid boros Yunani: Diabolos, ino-no i momurugou om mangasau di sokoviai). Ong i raja Daud, hiza dot banalko araat o gama dau di minonolod iosido do savo dot ulun om minangahatul-po di kapatazan di savo dit ondu dino,

minindamo iosido dot atahakan iosido di Sundu dot Osusi om i ginavo dit avanus (Zabur 51,12-13)

Ong i Lukas sid UR 1,8 om 2,18-21 manarang dot i Yesus pinentahan di korikatan di Sundu (1,8) om iri sid tuturan do Pentakosta i Petrus mongusul dot ino korikatan di Sundu nokentahan-no laid di nabi Yoel. Iosido kondiri, nga katama-no momoros om mengkhotbah antad sid kuasa di Sundu. Om it ongoulun di noumpug diri, nokening-no di kahabaran di habal do Kovosihan sid dau om dau do boros, sionggo-nopo ot inantadon dau. gam hopod om duvo bansa o narait sino di nokoumpug di hiza diri dot i harati, otimumng it ongobansa kadapat mongining di Habal do Kovosihan, gima i kuasa di Sundu dot Osusi. Ensan it ongoulun di siri, nga orikatan di kuasa dino. Bai it ongoulun di minangagauk ot amu anangan.

Iri-ogi mimbulai sid Usuran di Lukas dot varo`t ongoulun Kristian dit asot elaan om asot orikatan di Sundu dot Osusi. i kiniro di Lukas, i Sundu dot osusi i mad laba di kamung sid kosopulan om kolobusan (kasalamatan) om kopioondusan di nakadapat it ulun di muli sid Kinoringan, i retan do mangasip ko i nokokristian om i nakamung sid piumpugan ko gorija. Sid UR 8,17 mongusul i Lukas dot, Amu-po norolongan di Sundu antad sid Kinoringan, rontob nopodsu ioti sid ngaran di Yesus, ino-no sid Samaria. Iri-ogi pinintamparan-no di Petrus om i Yahya ioti sampai nosuvangan-no di Sundu dot Osusi. Na i Simun, i bobolizan sino, minokitahak dara di kuasa do porikot di Sundu do tobuson dau dara i kuasa dino. Topot nanangan iosido di lulupu di Petrus, tu i kiniro di Simun dot kumandai dara di Sundu do Kinoringan.

Pengkaa dino, sid UR 9 suvaiko i Hananias o minanampal di Paulus sid Damshek om nosuvangan-ogi i Paulus di Sundu dot Osusi. Iri-ogi mokipodsu i Paulus.

Sid UR 10 i Kornelius ulun dit elin om okosog. Hiza do mengkhotbah i Petrus, nokosuvang i Sundu dot Osusi sid ipat-ipat it ulun di noumpug sino, minsanko okonko ulun Yahudi ioti. Ino pangalaman di Petrus dino iadko Pentakosta koduvo, tu varo kopiboboros dit ongoulun do tasantanid-tanid o boros. Iri-ogi minonuhu i Petrus do momodsu dit ongoulun di sid valai di Kornelius sid saralom di ngaran di Yesus, i Minananggung (10,44-48). Sid UR 15 manarang i Petrus di dau do pangalaman. Ulun Labus om ulun Yahudi natahakan di Sundu dot Osusi, ka.

Sid UR 19,2 mongoduat i Paulus dit ongoulun dit okosog sid Efesus dot, Nokotorima-kou-ka di Sundu dot Osusi di hiza di kinemumuzan dikou? Na

ponimpa-nopo ioti, Minsanko opirongou dahai do nunu i retan do Sundu dot Osusi, nga amu-po, ka dioti. Ioti bai nokotorima di kopomoduan di Yahya iadko i Yesus sid Markus 1. Kodung nokening ioti di Habal do Kovosihan, minokipodsu-no ioti sid ngaran di Yesus dot i hiza do natampal-no di Paulus ioti dino, sinumuvang-no i Sundu dot osusi sid dioti sampai varo-no minomoros do boros dot osundu, om varo-no minonorou om minamahanda.

Ong onsizon tokou i kinohorotizan di Lukas kananganko i Sundu do Kinoringan, ino-no,

I piumpugan dot ulun Kristian dit amu orikatan di Sundu dot Osusi, amu kadapat monginjil ko sumasi sid ulun vokon, tu aso kuasa dioti ponong sid kososizan sid ulun vokon.

Topot ong i Paulus: i gama dot ulun minta dua om mangasip, antad laid sid kuasa om gama di Sundu dot Osusi di pengrikot di kuasa dau sid ongoulun om mongogiang di ginavo om kabang dot ulun. Sid Rom 12,7 om 1. Kor. 12,5 manarang i Paulus do kuran i Sundu pengilo dit ulun Kristian, supaya monulung om tumabang it ulun dino. Ko sid Rom 12,8: manahak i Sundu di keloo do mangahatul di piumpugan om i gama monian dot ulun om i ginavo dot olomi, supaya manahak it ulun (amu odoot iosido). Sid 1. Korintus 7,7 minsanko i kobuatano om ginavo dot amu manansavo/mokisavo, gima i Habal do Kovosihan sampai tamanang bahagi di karajaan do Kinoringan, o panahak om gama do Sundu, meradko i musavo it ulun. Sid ayat dino kagi nakaharati tokou dot i hal do musavo okonko hoturan do riniba, molohing ko kamaman om kominan, inoi nga hoturan do Kinoringan antad di kinourugan om nahatul-no laid di Sundu do Kinoringan. Ong agazad di Sundu do Kinoringan, otudukan it osukod vagu (ondu om kusai) ombo it sovoon dau dit antad sid kenginan do Kinoringan.

Manjadi kuran-ka o gama tokou monolod di gamaon di Sundu do Kinoringan? Tu iti kavi, antad kavi sid Sundu, om iso nga aso hal dino kilaba ko okurang di bai mangasip it ulun. Amu monodiri i Paulus do varo laba om varo kurang do varo't ulun Kristian dit obombong ko borontuvilon, om varo di bai ngaran-po kokoristian.

Kananganko it ongokosunduvo iadko boros di Sundu ko kosunduvo do pengkod do sakit ko it apatong o mengkhotbah om monorou iadko nabi, nipoontupat banal di Paulus it ongoulun Kristian sid Korintus. Sabap sid Korintus minansahari it ongoulun sid keloo do iadino sampai minomuruvak,

retanko bai ioti o kiguna om kisundu. I gama di Paulus dumahava, loku lobipo elo di boros do dila (ko Sundu) om monorou (1. Kor. 14,18 om 2. Korintus 12,2). Topot okonko ino o kiguna. Limo linsou o boros dot avalang lobipo kiguna mantadko 10 ribu o boros do kosunduvo. Amu mangakun i Paulus do monodiri dit ongokogunaan di tasantanid-tanid o vaza di Sundu dot Osusi monongkoburou dit ulun Kristian do pakakas di Sundu. I kogunaan banal, ong varo kosusaan. Ong kisakit, kioruol, kihongkobon, mosikim, lumikop, amu ahatul i piumpugan. Nunu-ka o guna ong elo di boros dot osundu? Boros di Paulus sid 1. Korintus 12,7: suvai kiguna sid sokoviai o ponukat di kogunaan, okonko i vaza mokindazou. Kagi, ong sid Paulus, okonko i hal do suromo om kogolivongo o tanda dot antad sid kuasa om Sundu do Kinoringan. Okonko i hal di kotirai sid koubasan antad sid Sundu dot Osusi. Sabap i Sundu do Kinoringan mintoron sid ulun di mangasip, it ulun dit amu humarap sid kondiri dau, it ulun di tinumorima di Kristus dot i ginavo om guvas dau dang Kristus (2.Korintus 5,17 om Galatia 2,20 ko Rom 14,7-9). It ulun dino sabahagi di gorija, ino guvas di Kristus (1. Korintus 12). Sabap ino, ong sid di Paulus, i Sundu dot Osusi di nokosuvang sid ulun Kristian okonko laba sid kosipan, inoi nga tanda do kosipan dot ulun. Isainopo it osorungan di Sundu, ino-no ot jumadi dot anak do Kinoringan.

Insan-po, ino kuasa do Kinoringan mopud sid ipat-ipat it ulun di dang Kristus. Ong sukul it ulun sumahau sid kenginan do Kinoringan, ohoturan iosido di Sundu do Kinoringan sampai pakakas iosido di Sundu dot Osusi om i samod do Kinoringan. Ong okonko i Sundu o manansanganu om mangagazad om monunda dot ulun, okuasaan it ulun do rogon di tasantanid-tanid o bansa. I kodori diri, varo Rusod om Bambarazon om i vokon sid indai, pampang, ropuhan ko sid tagad om sid talaga. Topot ong bianco, tanid o rogon, Mokipangkat, nga rogon, mokingaran, nga rogoni, monongkudau, tazonko rumbul satu it ulun, mongorugi dot ulun, ko bai kinomol, nga rogon, ko it ongokaralazan vokon. It ongokusai di mangavi di balanja do valai sid sigup, amu engat i savo om anganak, nga okuasa di rogon do Sigup, om nunu-nopo hoturan di kenginan kondiri, nga iadinoi. Minsanko i TV di mongutatang di tokou sampai amu otibang mamasa do Kitab, ko kumiboros do savo om anganak ko magandaha dit ulun di sumakit, nga rogoni.

It ongorogon kodori diri, nengat-no dit ongoulun om varo vaza do min-samung om manangkis. Kagi, i tinomod dot ongoulun Rungus kodiri do mizon sid binatang, okonko i hal do piniizaan do samod ko piniizaan do

mitatabang o puun do piniizaan diri, inoi nga piniizaan do songrosi-rosi dit ongorogon. I rogon o minomorinta dit ongoulun sid binatang. Iri-ogi sid binatang varo jaga, ino-no i bobolizan i kadapat kumiboros dit ongorogon om bantaran sid rogon. Ino-no rontob, ino korosizan do rogon o popezo dit ongoulun sid binatang diri, supaya iseso o ginavo om gama monukup dit indomoon do rogon, hiza do mamapak ko monogit om moginum.

Suvai i Yesus, i Minananggung di tokou, o pobeas di tokou antad sid korosizan om i kuasa dit ongorogon diri. Na kenginan di Yesus, biano, okuasa tokou do Sundu dot Osusi, supaya obebas banal i tokou antad sid sokovia i it ongo kuasa om ongorogon vokon. Sabap suvaiko i Sundu dot Osusi mangahatul om mangagazad di tokou, ong otopot-ogi ko obebas tokou om kalabus antad di nunu-nopo songkuasa dot otuvong. Ino gama dino, it iso o Sundu di momodsuvang sid ginavo dit ipat-ipat it ulun Kristian. Ong bai iso o Sundu o mangahatul om kumavid di tokou, enizo o ginavo tokou ponong sid kosurutan do gorija. Sabap i gorija, ino-no i guvas di Kristus dit ohoturan di Kristus.

Ong kakali varo kuasa di manarik di tokou sid ralan vokon, ino Sundu ozi mangagazad om pemumui di tokou sid ralan dot atag, supaya varo rikoton tokou. Ong kodung amu tokou agazad di palad ko kuasa om Sundu dot Osusi, okuasa om ouripon tokou di tanid i kuasa di mad rogon, di mongunang om mangasau di tokou, it toriso-iso it ulun Kristian om i piumpugan-po. Ong engat tokou om opurimon tokou dot i tokou sid palad do Kinoringan om i Sundu dau o pangaharati sid di tokou di kenginan om samod do Kinoringan, iri-ogi ulun tokou di kihasil, isuhut di boros di Paulus sid Galatia 5,23-24: It ongouva do Sundu o ino-no, samod, otomon o ginavo, kopioondusan, kamamanan, kolomian, kovosihan, katatapan, kovonusan, kotulidan.

Kananganko i vaza di Paulus manarang dot isai-nopo it ulun Kristian, varo`t a-ko piro o vaza manarang, ino-no,

- a) it ulun di tumolikud dit ongorogon om muli sid Kinoringan (1. Tes. 1,8-10)
- b) it ulun di mangasip om opodsu-no (Markus 16,18)
- c) it ulun asanganu di Kristus (Gal. 2,20 om Rom 14,7-9)
- d) It ulun ajadi do vangun vagu om gorija vagu om riniba vagu (2. Kor. 5,17; Gal. 6,17)
- e) It ulun Kristian dino ulun vagu-no (Efesus 2,15)

Pengkaa dino, it ongopanahak di Sundu dot Osusi, okonko hal do povongo dot ulun ko pogolivong, inoi nga hal dit oubas dit avantang sid pialatan dit ulun.

It uva di minanarang i Paulus sid Galatia 5,24-25 atandas ponong sid kosurutan do piniizaan om samod om kopioondusan, ponong sid kosurutan do piumpugan om gorija om i kosipan dit ipat-ipat it ulun Kristian.

Pengkaa dino, ogumu o vaza vokon sid Kitab di manarang di rikoton tokou: I karajaan do surga (ong sid Matius) ko Karajaan do Kinoringan (ong Markus om Lukas)

Yahya 3,3+7: Suvai nokosino antad sid savat, ka di Yesus.

Yahya 3,5 Nokosino antad sid vaig om Sundu

Yahya 3,6+6 nokosino antad sid Sundu

1. Yahya 2,29; 4,7; 5,1+4 +18: nokosino antad sid Kinoringan

2. Korintus 5,17 Suvaiko dang Kristus om vangun vagu iosido.

Efesus 2,15 om 4,24 Suvai ulun vagu om nakamung-ogi sid gorija

Ibrani 8,8; 9,15; Lukas 22,20 Matius 26,28; 1. Korintus 11,25; 2. Kor. 3,6:


i janji vagu

2. Petrus 3,13 om Kentalangan 21,1 Surga vagu om vinangun vagu

Kentalangan 2,17 om 3,12 Suvai ngaran vagu

Kentalangan 21,2 I Yerusalim vagu om Yerusalim sid savat.

Inot ongovaza dino, iso-no o panangan om tomodon: ino-no, manarang dit aso tinganan dot asansad ong baiko ginavo do riniba. Sabap i gama do Kinoringan manamod di tokou tumalib di nunu-nopo it etung tokou.



ETIKA DOT ULUN KRISTIAN

KO ADAT DOT ULUN KRISTIAN

Umpatod: I Teologia koubasan monodiri dit ongotajuk do tudukan sid

TAFSIRAN -	i gama manalahas dit ipat-ipat i buuk do Kitab.
DOGMATIKS _	I GAMA MONGONSI DI KOSIPAN DO Kristian
ETIKA -	i gama mongonsi di kenginan do Kinoringan bahagi di gama sumuhut
SEJARAH DO GORIJA -	it usul di gorija antad kinotimpunaan
HOMILETIKA -	i vaza mamakai di Kitab sid gama poromut sid ongoulun om it ongopiumpungan di Habal do Kovosihan om i gama manaud om mangagazad di piumpungan om ipat-ipat it ulun Kristian
LITURGIA -	i vaza mangahatul di gama sumambayang

Na minsanko nosodiri-no it ongotudukan dino, ong otopot-no, kopiakan inot ongotudukan dot aso tanganan do bai it iso o posurut om i koduvo alasan-no. Dogmatiks dino inanu antad sid gama popigimbang dit tafsiran di kogumuai it ongororos do Kitab, om it **Etika** dino posondot om mongusaha ombo it onsi di kosipan (Matius 7,24: Isai-nopo i mongining di boros-ku diti sampai sumuhut, iosido-no kerad ko it iso it ulun dit elo mongitung...)

Sid **Sejarah do Gorija** kembulai do sera om kuran i gorija laid o nakabambol om kuran ot atag do sumuhut banal om posurut di kenginan do Kinoringan. Na i **Homiletika** dino vaza poromut sid ongoulun Kristian, i kavavagu om it alaid do kuran o vaza mangasip om sumuhut sampai mongontupat di pangalaman do gorija sid atag o gama om it amu antad diri.

Na i pongoretan dot **Etika** boros do Yunani = ETHOS = bahazan, kebudayaan om adat koubasan. Ong ADAT sid Momogun om i kogumuai it ongobansa ino-no i hal dit a-milo-milo masti agama ko it a-kavasa. Na hiza dot it ongouripon, i retanko Ibrani di nakalabus antad sid Masir, jinumadi do Bansa do Kinoringan, tu i Kinoringan o minanganu dioti do bansa dau om minangajanji dioti diri, minonurat-no i Musa di kenginan do Kinoringan sid hopod ot ayat ko hopod pinonuhuan. I tinomod, i vaza sumuhut di pinonuhuan dino o vaza di bansa monuluk di kenginan do Kinoringan. Ino pinonuhuan dino pinakai-no dit ongoulun dot Israel iadko ADAT, varo-no suhu, varo-no

ong tiag sid tohudi't adau. Na it ongoulun dit elo di Kitab minoniim-no posondot om manarang dinot hopod pinonuhuan sid sokoviai it 666 o hukum om tiag, ino-no 306 o suhu om 360 o tiag. I kiniro dioti dino, suvai osodiri banal dot ombo i kavasa om amu: songkuro o kavasa om siombo i rontob do kavasa om amu.

Suntuan: I gama monorima kaseh minta dua bahagi kakanan. Ka di panarangan dioti diri; Ong insan-no ogopo om otolon-no, amu osusa minta dua do monorima kaseh. Suvai induvo ko kilaba o gama mongogop om osusa-ogi minta dua monorima kaseh. Kokiraai, ong bai orupag ko rondongung, amu osusa minta dua. Topot ong rukom, lansat, rangalau ko mampalam, suvai minta dua-po laid do monorima kaseh om atag-ogi mangakan, ka.

Na i Yesus diri, tanid o vaza dau posondot di pinonuhuan do Kinoringan. Boros dau diri, Sid gama mongontupat dit ongohal dot opodok, tu minsanko i gama manahak do persepulohan ong bai i pangavau, bavang ko lompos, topot ong alazan-ogi ot ongohal dit agazo o harati, ino-no i samod, kabanaran om kobinsianan, amu-no atag. (Matius 23,23) Manjadi sid tudukan sid burul sid Matius 5-7 manarang i Yesus sid gama dau posondot di pinonuhuan dot, Somputik nga aso ohino di Taurat, sampai otuluk-no kavi. Na onibak banal i vaza di Yesus mongonsi di sokoviai i pinonuhuan (ko Taurat) om i kovosihan dit ongonabi: Matius 7,12: Nunu-nopo it ozi-kou do gamaon dit ongoulun sid dikou, atag dot gamao-no laid dikou ioti, tu ino-no i Taurat om i Kitab dit ongonabi, ka dau. Om iri-ogi mamakai i Yesus dit noonsi-no laid sid Ulangan 6,6 om sid Matius 22,37: Manamod-ko-no di Tuhan Kinoringan-nu dit iseso o ginavo-nu om iseso o kaposizan-nu om iseso o pongitungan-nu om manamod-ko-no dit ulun vokon iadko i kondiri-nu.

Na i pitonidan di vaza laid posondot: manarang dot ombo o kalai kavasa om siongo i rontob o kavasa do kakal-po amu kalandu. Ino iadino mad koluu do polobusan do karabau ko i ralan dit inansal-no do dawai rugi. Ong sukul amu korikot sid dawai, nga amui otogu. Topot sid tanga do nadawai, ombo-nopo o gama lumanjang, nga kavasa-nopo.

Ong i vaza di Yesus manarang, I kuran do kemumui banal it ulun sid kenginan do Kinoringan. I pinonuhuan dau dino iadko sondihon ko kokovidan sid ralan dit apansung miampaping-paping, supaya it ulun nga amu-no aratu sid gibang ko sid vanan, ong sukul kumavid iosido sid kokovidan dino ong tumupak sid bavang do baiko bantaran di varo kokovidan. Manjadi sid duvo

i vaza dino, agazo o pitonidan: Kemumuzan ong sid di Yesus do vaza, sukul amu kalandu ko ahaba om amu otoguan do dawai sid vaza vokon.

Iadino o gama dit Ongoparisi monuluk di pinonuhuan dit Adau do Pongintaranan: A-kavasa di nunu-nopo i gama dot opodok, minsanko manganu ko mongotu do ravo do gandum, tu vitilon sid tanga do ralan, nga amui kavasa. Pengkaa dino amu kavasa do monulung dditulun do sumakit. Suvaiko adau vokon om mongubat-ogi, ka. A-kaharati ioti dot i tomodon dit adau do pongintaranan dino posinang di riniba, okonko ponusa di riniba. Ong i Yesus, antad sid kosusaan dotulun o gama dau monulung.

Atalahas dot amu oruhai posurut i kenginan do Kinoringan. Iti-no o sabap do varo boros di Paulus sid 1. Tes.4,7: Sid gama posurut di kosusian kinodim tokou do Kinoringan, ka. Om iri-ogi Galatia 5,1: I tokou diti pinalabus di Kristus, posuvang sid kolobusan. Sabap ino, kavid-kou-no ino kolobusan dino om kadan-kou-no sumulung vagu di sulungan di kinouripanan diri. Ino pongoretan kolobusan, Merdeka o harati. Topot varotulun di nokomerdeka-no, nga kakali i buatan iadko uripon ko nokotorungku iosido.

Topot ong i nokobebas dino, atag dotulun-oku do nobebas dot amu orugi ko hoturon-po di nunu-nopo i hal di monguripon dotulun. Okon nakalabus tokou iadko karabau sid dau kolobusan dot osizau i karabau om arampus tumangkus lumanjang, sukul a-korikot ko a-otogu do rugido dawai. Siri-no ko siri i karabau, aso rikoton dau. Topot ong i tokou, nebabas antad sid kuasa do rogon, supaya varo rikoton. I tokou nokotoguvang ponong sid rikoton, na suvaiko kemumui sid ralan dit opit, vokon-no ong apansung, sid bantaran-po, na mozo-vozo di ralan. Om i kovosihan om kenginan do Kinoringan o monuduk om mangagazad di tokou sid ralan dino, supaya amu tumongkizad do rumizang sino.

Manjadi i kosipan dit ongoulun Kristian sid Kinoringan okonko baikohal do ginavo, inoi nga ensanan o kopoulosan sumuhut (Markus 1,4+15; Rum 1,3) okonko rontob mangasip sid kabang, inoi nga muli sid Kinoringan, tumolikud di kobuatano laid diri. (Lukas 6,45: Boros di Yesus, Nokokuro-ka, tu monontuan-kou dohon do kakal-kou-po dot amu-kou sumuhut di boros-ku, ka. Ko Matius 7,24-27 Suvai mongining om sumuhut om atag o gama dino.

Sabap i Habal do Kovosihan okonko baikoo

- monginsasamod, inoi nga mongimuhun om monuhu
- manahak do kovosihan, inoi nga monuhu
- potorima di kosunduvo, inoi nga posusui sid ralan dit atag.

It ulun di kotorima di Yesus, tumolikud sid kobuatano laid sampai sumaan di sangkap dau (Matius 10,36 om 16,24), moniag di kondiri dau om iduan i sokovia i dau laid diri (Matius 19,27) sampai sumusui di Kristus (Pilipi 2, 3-11) om Efesus 5,1 om 21.)

I kodim di Yesus o monginsasamod om mongimuhun (Matius 11,25-30) Siti-kou-no o sokovia i it ulun di nopogos om nemvagatan. Impanggalan-ku ikou. Sumulung-kou sid paud-ku, tu i dohon do paud alus om i dohon do binabo agaan, ka di Yesus. I suhu om i samod miobpuput-puput-nopo. Na it ulun dit amu sumuhut dot ensanan o ginavo, iadko it amu nokosuhut. Matius 22,1-14: It ulun di mamung sid mogontong do kokiitan ko sulung do gumama, iadko i linigou dit amu nokorikot. Suvaiko sumuhut di hoturan vagu dot antad sid ginavo, okonko bai tomodi, om ensanan o ginavo sumuhut, okonko malang-alang ko opiduvo i ginavo, sampai otomon o ginavo sumuhut, okonko oupus. Markus 10,17-31 manarang do varo ulun do lumundu di mogihim di koposizan penlaid. Engin iosido monobus om dumagang dara di karajaan do Kinoringan, mad notuluk-no dau kavi, ka dau. Iri-ogi i XYesus o minonuduk dot okonko kovosihan do riniba o manansanganu di karajaan do Kinoringan, inoi nga antad sid kenginan om kovosihan do Kinoringan varo vazaan sumuvang, ong sukul ensanan i ginavo sino.

Minsanko nokosuhut-no it ulun do lumundu dit ongoliang di pinonuhuan do Kinoringan, iadko a-nokosuhut, tu okonko ensanan o ginavo om koposizan sid Kinoringan, Baiko ngaran o nokosuhut iosido, tu a-koho do kumoruhang di Yesus. Kakali ino barang om kolunduan dau o harapan dau, kakal-po asanganu iosido di barang dau. Nening-po dau i syarat do sumuhut, oruol-no i ginavo dau om minogidu-no iosido do tumolikud di Yesus. Sirid tuturan diri mnongoduat-no i Petrus dot, Nunu-no o kanangan dahai, tu iokoi sokovia niopung-za. Nunu-no o suul-za, ka dau. I Petrus kakali monimbang dot ombo it avagat, it iniduan ko i rikoton sampai mad kakali kumovili iosido dot nopiduvo i ginavo dau.

Na i gama sumuhut a-nokosurat sid jadual do hatas ko soribu ot ayat, inoi nga suvai ipat-ipat it ulun momorisa di dau kondiri om i situasi dau do suvab-suvab sampai mongoduat dot, **Nunu-ka ot apatut do gama-ku do sumuhut di kenginan do Kinoringan?** Manjadi i boros do Kinoringan o monuduk dit

atag o gama, ong sukul monging it ulun Kristian sid boros do Kinoringan.

Ino-no o gama dit apatut: okonko i tokou o momili di gama tokou dit apatut, inoi nga i boros do Kinoringan o momoros om mamalang di suhu dau. I tokou diti nakasanganu-no di Kristus. Iti-no o kobebaso tokou. It apatut o gama; okonko i kenginan-ku om i koozian-ku, antava tomodon-ku om ginavo-ku ot suhuton-ku, inoi nga it apatut: i kenginan do Kinoringan (Matius 26, 39)

Topot asarok o gama-ku: i hal dot obpinai om it ulun vokon, nga elo-no kavi do mongintutun om manalasai. Topot ong i di tokou do hal, mad a-el-elaan om a-and-andaman. Na i boros do Kinoringan nokontok sid dato om amu apajak koorumpung o momoros, inoi nga >ioku-no ot anangan om ioku-no ot impurasan, supaya ioku o tumimpa om posurut di kenginan do Kinoringan.

I gama-ku: amu miumpa ong i kabang sumasi om mumbongut dot, Kasip-oku diti dot i Tuhan o Tuhan-ku, ka. Suvai mongusaha-oku di kenginan do Kinoringan. (1, Yahya 2,17) Kodung nokening ioti hiza di Pentakosta i tudukan di Petrus, mad notobok-no i ginavo diotisampai minongoduat-no dot, Nunu-ka o gamaon-za dot apatut? (UR 2,37ff) om timpa di Petrus: Piguli-kou-no sid Kinoringan om pokipodsu-kou-no sid ngaran di Yesus, ..ka. i boros do Kinoringan sid Kitab monuduk dot ongoulun Kristian dot atarang om atalahas o boros. Isai-nopo i karanggal ko amu sumuhut, ino-no o monipu do Kinoringan. Imatai sid Kotimpunaan 3: Kadan-kou-no mangaakan, tu matai-kou ong mangakan-kou, ka. Ko F. 12: I Ibrahim sinumuhut di boros do Kinoringan dot okudik nga asot alazan. Antava i Musa (Kolobusan 3-4) nga banalko mangamu iosido, nga sumuhuti, tu ginaratan do Kinoringan. Ko i Amos, ulun mukabun om momiara do pangazam, sumuhut di kodim di Tuhan. Niopung-no dau i kabun om pangazam dau, tu mangahabal di kenginan do Kinoringan (Amos 3,3-8 om 7,10-17: Inanu-ku sid butul, ka di Amos). Sid Yesaya 6,1-7 minongoduat i dolou dot, Isai-ka i suhuon-ku, ka. Ponimpa-nopo i Yesaya, loku-no beti, ka. Om i Yeremia 1, varoboros do Kinoringan: Kadan-ko-no momoros dot, omulok-oku-po, kanu. Jodizon tekau do kuta dot apapag om rinding do basi o ginama, ka di Kinoringan sid di nabi Yeremia.

Iadino dino, i hoturan dot ulun Kristian manarang do kuran it apatut i gama dit ongoulun monimpa di boros do Kinoringan om i Habal do Kovosihan, tu ino habal dino mongimvagu dit ongoulun (Rum 1,17). Pengkaa dino, inot hoturan ko ADAT VAGU manala di sokovia i kobuatano laid om manarang do kuran i Habal do Kovosihan o pavaliu di tokou antad sid otuvong,

posuvang sid anavau, antad sid sala om karaatan ponong sid kabanaran, antad sid kinuripanan posuvang sid polobusan, posuvang di tokou sid kuasa di Kinoringan di mongimbulai di kopolosizan penlaid.

Ihimon tokou-no do kuran i gama di Tuhan Yesus manalahas di boros do monuhu om mongimuhun di gama dot apatut. Basao tokou it Injil Matius 1,20: I Yusup noiduvo i ginavo, tu kitizan-no gima i sovoon dau. Sinuhu-no iosido di malaikat dot, Sovoo-no i Mariam dilo, tu ino kitizan iosido dino antad sid Sundu, ka di malaikat. Ko i hiza di varo kosusaan ponong sid anak-po i Yesus, gima i Herodis mogihim mamatai di "raja di nakalandai", sinuhu-no di malaikat dot, O Yusup, pogidu-no, ovito-no i savo om inot anak-nu, ka. (2,13) om Mat. 3,15: I Yahya i minomodsu amu engin momodsu di Yesus, nga sinuhu di Yesus i Yahya do momodsu dau, supaya "otuluk i sokovia i kopotutan," ka. Mat. 4,19: I Yesus minionuhu-no di Petrus om i Andorias dot, Mozo-kou-no dohon, ka. Manjadi ioti dino tinumolikud-no di kobuatano laid, tu najadi-no do koruhang di Yesus. 8,3: sinuhu-no di Yesus i kibalang dot, Susio-no, ka, sampai minsanko i sakit dibalang, nga sinumuhut di suhu di Yesus. 8,13: Sinuhu-no di Yesus i kopitan dot, Uli-no. Najadi-no i iadko ino kosipan-nu, ka. I tinomod di kopitan sid di Yesus, mindamo do kengkadan di sakit dit uripon dau. Mat. 9,9: Boros di Yesus sid di Levi, i mogom sid kositum, Vozo-no dohon, ka. Om i Levi nga miningkod-no do mangahatul do sukoi, tu najadi-no do koruhang di Yesus. 9,24: monunsub i Yesus dit ongomogkorudu, Otos-kou-no, amu minatai it anak di Yairus dino, ka. 14,16: sid kinoruhangan dau di nopipitan dot asot akanon di 5000 ot ulun sid tanga do belantara, Paakano-no dikou ioti, ka di Yesus. 16,23 sid di Petrus dit engin moniag di Yesus do kosuvang sid sansara, minomoros-ogi dot, Pogidu-no, setan, ka di Yesus. om Mat. 19,23 sid anak vagu di lumundu: pojuvaro-no i sokovia i barang-nu om vozo-no dohon, ka di Yesus. ko 26,52 minomoros iosido sid di Petrus di minionibas di mata-mata dot, Pangkapo-no i sapadang-nu, ka om 28,16-20 sid kinoruhangan dau di huntad-no dau tumongkizad sid dioti: Pamanau-kou-no pahabaro-no dikou i Habal do Kovosihan om podsuo-no dikou i sokovia i it ulun, pojodion-no ioti do koruhang-ku, ka di Yesus.

Sokovia i Injil nga Habal do Kovosihan, atandas-no do suhu om imuhun. I Habal do Kovosihan mongimbulai dit ADAT VAGU, i ralan vagu, i hoturan vagu. Pengkaa dino i tudukan sid Burul, (Mat. 5-7) manarang do kuran i gama di Yesus pohodtol om posondot di hopod pinonuhuan. I Habal do Kovosihan okonko i keduana di hopod pinonuhuan, gamko i Tuhan Yesus o

monuluk di pinonuhuan dino (5,17: Kadan-no sangkaon dokou dot, Mananus-oku di pinonuhuan do Kinoringan om i Kitab dit ongonabi. Okonko riumikot-oku-nopo om mananus, inoi nga monuluk... Sabap boroson banal-ku sid dikou, Sampai orikot i kotonusan diti avan om iti pomogunan, somputik nga asot ohino di pinonuhuan do Kinoringan, sampai notuluk-no kavi i Taurat dino. Bang aso kabanaran dikou do lobipo abanal mantad sid kabanaran dit ulun do Parisi, om it ulun do Katib, tantu-tantuko amu-kou kosuvang sid karajaan do surga, ka di Yesus.

I gama di Yesus posondot di Taurat antad di kodori-po, pengkaa dino o gama: Boros dau, Norongou-no dikou i boros dit ulun do kodori dot, ... Mat. 5,21; 5,27; 5,38; 5,43) Topot boroson-ku sid dikou dot, ... , ka di Yesus. Okonko mongohino i Yesus di Taurat laid diri, gamko iadko asaon-no dau i Taurat dino, supaya banalko atarom.

5,21-26: i gama mamatai dot ulun okonko baiko i kumavid do sapadang ko senapang, tu monibas ko monimbak, inoi nga i gama mamatai mimbulai sid dila di momoros dot araat sid koruhang. Minsanko i pongitungan dot araat ponong sid ulun vokon, iadko mamatai-no dot ulun!. Minsanko i sumirot i mato, iadko nakaagai-no. Minsanko i ginavo o mongindaraat, iadko nasala-no i hukum penlaid.

I Yesus o minongimbulai dit ADAT VAGU. iosido kondiri nga sinumuhuti dino hoturan dit adat vagu dino, iadko ulun vagu, iadko i Adam koduvo, sampai iosido iadko mangaranzat di riniba vagu. Ino-no i gama dau mongovit di karajaan do surga, i retanko karajaan om Hoturan do Kinoringan, om poromut sid di tokou ulun Kristian:

Matius 5,13:

Ikou-no dino it asin do pomogunan.

Ikou-no dino i panganavau di vinangun. Sabap ino, poosin-kou-no om panganavau-kou-no diti pomogunan. ka di Yesus,

om iri-ogi, Suvaiko katalib i kabanaran dit ulun do Kristian di kabanaran dit ongoulun do Parisi om osukup-ogi. Topot ino kabanaran dino okonko gama dot ulun, inoi nga itahak di Tuhan Yesus, ong sukul kumavid it ulun di kosipan sampai sumuhuti: Tujuo-no i karangkapan dikou iadko it Ama sid surga, nga arangkapi, ka di Yesus (Mat. 5,48) om boros di Paulus sid Rum 1,17: Sabap i Habal (do Kovoŝihan) dino o koiintalangan di kapamanaran do Kinoringan, antad sid kosipan sampai monong sid kosipan, iadko i nokosurat-no laid dot, Apasi it ulun dit embanaran di kosipan dau, ka.

Manjadi atarang-no dot, I boros do Kinoringan o mongohukum om manala di kobuatano laid dot ulun sampai mangatag om mangahatul di kobuatano vagu dit ulun Kristian, ong sukul it ulun dino kumavid ombo i nosodia di Yesus.

BAHAGI KESO: IT ADAT DOT ULUN KRISTIAN PONONG SID KINORINGAN IT AMA, I MINONGURUG DI TOKOU

I Kinoringan, i minongurug di tokou, okonko songkoinurugan do iadko i momoi dit aso guna, inoi nga minangahatul om minonuhu iosido di tokou riniba, om ino gama ipotugas di tokou, nga sournul-umul sampai biano.

a) i tokou ulun Kristian okonko asot inantadon, gam ensanan tokou om i riniba vokon nga antad kavi sid kinourugan. Minsanko i riniba di nokensodu antad sid Kinoringan, kakal tokoui vangun dit inurug do Kinoringan.. Kagi i kovosihan do Kinoringan amu ningkod, gam monunda di tokou om mon-gohondom dot i tokou diti, nga inurug di palad do Kinoringan sampai kakal tokou sid palad dau. Sabap ino, engat tokou i boros do Kitab di manarang sid di tokou di hoturan do Kinoringan bahagi di vinangun dau.

b) Ino hoturan dino konong sid kobuatano dit ipat-ipat it ulun. Mnsanko nakada-no i sokovia i kasalaan, gima i Yesus Kristus sampai antad sid di Yesus mad varo-po hoturan vagu, ino hoturan di Minamangun di kakali opud i tomodon, mangahatul di koposizan tokou suvab-suvab sid sokovia i vaza masi om mokipasi.

c) I tokou diti i nokosuvang sid piniizaan dot ulun Kristian, i harati, ulun di mamanau ponong sid karajaan om hoturan do Kinoringan, isuhu di hoturan di Yesus Kristus, nga kakal tokou sid tanga do riniba om i riniba di sombahagi di vinangun. Ino kobuatano dino amu engkod sampai matai. Sabap ino hoturan di Minongurug o mangagazad di tokou, supaya ahatul i kobuatano tokou sid tanga do vinangun, isuhut di hoturan di Minongurug. Ino hoturan dino, mad apat o panangan, ino-no:

keso: ponong om sid tinoguvangon do Kinoringan

koduvo: ponong om sid tinoguvangon dit ulun vokon

kotolu: kananganko i koposizan kondiri

kaapat: kananganko i gamaom hormat dit ipat-ipat it ulun vokon.

A: I GAMA DIT ULUN SID TINOGUVANGON DO KINORINGAN

I Kinoringan, i minongurug di tokou, engin dot it ulun, it inurug dau, nga apasi sid tinoguvangon do Kinoringan. Sabap ino, i boros do Kinoringan o mangahatul di(t)

a) Adau do Pongintaranan, supaya inot adau dino adau do lumatang om adau dot otomon, gima i Tuhan om adau dot asot "masti".

b) Gama dit ullun sumasi do Kinoringan sid saralom di boros, pongitungan, ginavo om gama dau.

c) Gama dit ulun minta dua, mindamo om mongindazou do Kinoringan om i ngaran dau.

IT ADAU DO PONGINTARAN

Sid Rom 12,12 om 1.Tes.5,17 varo boros di Paulus dot, Amu-kou mintonon minta dua, ka. Ino boros dino manarang sid di tokou dot atag ong i tokou nga soumul-umul sid tinoguvangon do Kinoringan, okonko minsomok ko tumoronong sid Kinoringan om mogidu-ogi vagu (iadko tumongkizad antad sid Kinoringan, tu varo-po tampat om intoronon dit okonko sid tinoguvangon do Kinoringan.

Na minsanko iadino i sokovia i kopolisan tokou sid tinoguvangon do Kinoringan, kakali varo-pot ontok di nakatanid-no, ino-no it Adau do pongintaranan. Engin i Kinoringan dot varo't adau dot ensanan bahagi dau. Ino-no noboros sid pinonuhuan kaapat dino: *Hondomo-no it adau do koturu om susio-no it adau dino. Onom-ko-not adau gumama sampai minggama di nunu-nopo i gamaon-nu. Topot'ong it adau do koturu, ino-no it adau do pongintaraan, nakatanid-no bahagi di Tuhan Kinoringan-nu, ka. Om i boros dino kolombus-po dot, Kadan-no gumama dit adau dino, ikau kondiri ko it anak-nu do kusai ko ondu, antava it uripon-nu do kusai ko it ondu antava i pangazam-nu antava it ulun di nokotombuvoi sid dikau. Tu sid saralom dot onom-not, adau o kinourugan di Tuhan it avan om i pomogunan... Topot'ong it adau koturu kintaranan di Tuhan ... om nabarakatan-no di Tuhan it adau do pongintaranan, ka.*

Nunu-ka o harati dino sid di tokou? Okonko i tokou o manansanganu di hiza tokou. I riniba ong kiroon tokou, aso kapangaan di gama dau, na aso kalatangan. Sabap ino, kondiri di kinoringan o pentoron dit ulun, supaya engat it ulun dot okonko iseso iosido om okonko kikuasa iosido do kerad do Kinoringan om okonko aso kovian dau om rontob ko kosungguvo. It Adau do

pongintaranan dino o manarang di rinitb di riniba. Tolu-no o pongoretan tokou bahagi dit adau dino:

Adau Minggu, Adau do pongintaranan, Adau di Tuhan. Kagi, ong sid Malaysia, retanko, Hari Ahad.

ADAU MINGGU: ino-no it adau di mangahatul di sokoviai it ongoadau sid saralom do songminggu. Adau di kinapangan do kinourugan do pomogunan om tanda do varot ontok do gumama om varo-pot ontok lumatang om rumehat. Sabap i kinourugan dino okonko bai tomod gumama ko bai tomod lumatang.

ADAU DO PONGINTARANAN: okonko rumbul satu harati Adau do lumatang, iadko adau do modop om adau dot a-kavasa minggagama. Sid adau dino kotibang it ulun ponong sid Kinoringan, tu amu osongkutan do gama om ponsohorian. Otibang it ulun bahagi di gama mongohormat om mongindazou do Kinoringan om mongining di boros dau om i Habal do Kovosihan sampai ohigak om ounsopot om otomon, gima mongohondom it ulun dit avantang i gama do Kinoringan ponong sid riniba. It adau dino popuhondom di tokou di janji do Kinoringan bahagi do riniba: ino-no i Kinoringan manaud om monunda di riniba songkoledo di hiza do riniba. Na it ulun mamung sid gama mangarazou do Kinoringan iadko i boros di Zabur 103:

Avasih i Kinoringan om alanut i kovosihan dau. Amu engkod i kobinsianan dau.

Na minggu-minggu miguli-guli rumikot it ontok om kotibango do mokitarang di kogozoo di gama do Kinoringan mongurug om manaud om monunda di riniba. Kinotimpuunan 2,1-3 om Yehezkiel 20,12-20 manarang dot it adau dino nitahak do Kinoringan sid ti tokou, supaya inot adau dino tanda di janji do Kinoringan, supaya atalahas-no dot i Tuhan Kinoringan o posusi di tokou. Sabap ino, i Kinoringan minud di kotulukan di pinonuhuan dino. Sabap ong mongohormat it ulun dit adau/do pongintaranan, ino-no o tanda di gama sumuhut iosido di kenginan do Kinoringan (Yesaya 17,1-4 om 58,13)

ADAU DI TUHAN. Kagi-po, it Adau do Minggu nga adau di kinogulianan di Tuhan Yesus. Iti-no o sabap dot i ngaran kotolu, ino-no, Adau di Tuhan. Sabap ino, it ongorasul o minangahatul dot okonko it adau koturu, inoi nga it adau keso do minggu, ino-no it adau di kinogulianan di Yesus ot adau dot agazo om ahatul sid di tokou ulun Kristian. (Banal-no sid gama ditit ongoulun

Kristian minomili dit adau keso dino, varo tinomod, ino-no tumanid mantad sid vaza dit ongoulun do Yahudi mongohormat dit adau do pongintaranan, it iti-no kagi i kopigogogutan di Hari Enam, ino denominasi di mongontupat di Hari Sabtu, tu ka dioti, iti-no it adau Sabbat, isuhut di hoturan di Kitab Laid. Dot ong otopot, i hiza dit ongorasul nosimbanan-no laid i vaza dino do mongohormat dit adau do kinogulianan di Yesus do lobipo mantadko it adau do Sabbat)

I kiro tokou, inot adau di Tuhan mad adau do kinapangan di kipongourugan koduvo di riniba sid gama di Yesus monuluk di sokovia i it ongojanji sid Kinoringan it Aama. Kagi it adau dino, nga popuhondom di tokou do varo-po vagu't Adau do Tuhan, ino-no it adau do rumikot vagu i Yesus Kristus, tu "mongohukum dit ongoulun di mizau om minatai."

Manjadi it adau dino o mangahatul om monguasa di sokovia i gama tokou sid saralom do songminggu (Gal. 2,2= om Rom 14,7-9) Sid gama sumambayang it ulun, tumolikud iosido di dau do ponsohorian om rancangan. Topot kakali okonko harati dot aso gamaon, aso panahon, amu magazau, amu makan. Sabap nunu-nopo it atag o gamaon, ong minggu, ino-no ponong sid Kinoringan om it ulun vokon, nga atagi. Ong it ulun Parisi diri minonusa dit ongoulun, tu ogumu it a-kavasa, ka diri. *Mamanau do labaan tanga vatu, amu kavasa, monompiri do bai ravo do gandum, a-kavasa, tu i gama diri mad mongomot*, ka. Dot ong otopot, Kenginan do Kinoringan dot it adau dino, adau di posinang do riniba. Markus 2,23- 3,6: Boros di Yesus, It adau do pongintaranan okonko iponusa, inoi nga posinang di riniba.

Ong onsizon tokou i boros di Kitab kananganko it adau dino, pengkaa:

a) It adau dino nakatanid, supaya amu olingan tokou dot i tokou dang Tuhan. Sabap ino okonko i tokou o mangahatul om mongumba dit adau dino, inoi nga ihoturan tokou dit adau dino. Amu mogihim do sangkut kolingon, ko madi-badi, mongogiling do parai ko mogihim do karabau, ko pounjal ko modsu sid rahat ot onuvon do sangkut gumorija, inoi nga keso o gamaon sumambayang om mongining di boros do Kinoringan, supaya kemot tokou di kosinangan di nohoturan do Kinoringan bahagi di tokou.

b) adau dino adau dot otomon om ohigak, tu andaman tokou i kotulukan di kinourugan om i kinogulianan di Tuhan Yesus antad sid ongoulun minatai, sampai mongohondom di korikatan vagu di Tuhan. Ino-no o sabap dot i hiza

dit adau do pongintaranan aso koingkadan. Sabap ino, it adau dino okonko adau do kapagasan, gima asot akanon, aso gamaon, aso panahon. Gam iadko i pandita ko tumpuk om ponulung, ogumu o panahon om gamaon sid vaza mangagazad dit ongopiumpugan. ko it ongonaas om dokutol sid Rumah Sakit, om i vokon di monorundakai di kosukupan do pomogunan, iadko i vaig, karan, mata-mata om iadino Sabap ino, i gama posinang om potomon do vokon, minsanko antad sid gama dino, nga kavasai do tumabang di nanangan dot ongosakit, magandaha sid ongolumohin, tu antad-no kavi sid gama polombus di samod do Kinoringan sid ulun vokon.

c) Kagi sid gama miuumpug, ohondom tokou dot okonko iseso tokou. Varopot ulun vokon. Sabap ino, it adau dino, nga otibangan tokou mamung sid ulun vokon, sumombol, miaamung-amung, miuumpug-umpug sid gama sumambayang, mamasa di Kitab, mongining di tudukan om sid gama minta dua. Varo koriatan bahagi di gama sumasi dot iseso o ginavo om manalasai om mananus di sokoviai i piouduhan om i kasanaan om i kohungatan di sid tanga do piumpugan om razat. Sabap i boros do Kinoringan o mangahatul di kipoondusan dino.

d) It adau minggu, adau keso (AHAD). Bang atag o gama mongohormat om mongoguna dit Adau do Minggu, mad atag-no i sokovia it ongoadau sid saralom di minggu di sumusuhuti. Bang asazou ko otuvang it adau do minggu, tantu it ongoadau vokon, nga otuvongi om olingan. Kiontok banal it adau dino bahagi dit ongoadau vokon. Bang araat it kopurimanan om gamaon it adau dino, mad ensanan-no o minggu dot ounong. It adau dino monunda di sokoviai i minggu, sampai i gama di sid saralom dit onom adau vokon, iadko ondig-ondig di gama dit ulun ontok dit adau do minggu.

I GAMA SUMASI DO KINORINGAN

I koduvo i hal di hoturan do Kinoringan sid ongoulun di sid tinoguvangon dau, o ino-no i gama dit ulun sumasi do Kinoringan. Atag dot it ulun amu amalu di Habal do Kovosihan. Rom 1,16: Boros di Paulus, Amu-oku ekum mangahabal di Habal do Kovosihan, tu ino habal dino kokuasaan do Kinoringan, ka.

I riniba inurug do Kinoringan do suvai apasi it ulun, ong antad sid Minongurug. Sabap ino, amu osukup ong baiko opurimon i kinoruhangan dot i

kobuatano-ku mad posimozo di Minongurug. Kenginan do Kinoringan dot it ulun ohorotizan i Kinoringan sampai sumasi di Kinoringan om i gama dau. I kinoringan minongumbasi dit ulun antad di kinotimpuunani, engin iosido dot it ulun sumasi di kovosihan dau.

Okonko rontob i riniba o sumasi do Kinoringan, inoi nga sokoviai i vinangun sumasi di Kinoringan sid saralom do gama mongindazou di Minongurug. Imatai sid Zabur ko 113,1: It ongoulun do Kinoringan mangarazou di Kinoringan, ka. om Z.

145,10: It ongoulun dot osusi mangarazou di Kinoringan. Z. 135,19: It ongoulun dot Israel mangarazou di Kinoringan. Z. 66,8 om 117,1 It ongobansa vokon mangarazou di Kinoringan. Z. 145,21 om 150,6: i sokoviai i mizau, nga mangarazou di Kinoringan.

Z. 69,35: It avan, i pomogunan om i rahat mongindazou di Kinoringan. Z.148,3: It adau om i vulan mongindazou di Kinoringan. Z. 103,32: It ongomalaikat mongindazou di Kinoringan

It ongoulun ko sandad riniba baiko sambahagi di vinangun, nga atagon-no i gama dau mambat di gama di vinangun sumasi di Kinoringan om mongoguna om mongohormat di kinourugan dau. Ino-no i kososizan, Ioku diti inurug do Kinoringan. Kagi-po niamung-oku di Kinoringan sid dau, ka. Ino gama sumasi dino okon baiko sangpajak-no o gamaon, okonkobaiko insan-no om opongono. Inoi nga i kavazao do munung om dila om kabang om i buatano suvab-suvab mongohondom om mananda di kososizan di iadino.

Manjadi kodung sumasi di Tuhan, harati, mongolombus-no di kovosihan do Kinoringan sid ulun vokon. Manjadi ino gama dino okonko olingob do iadko amalu, iadko ekum, inoi nga sid tinoguvangon dot ulun. Imatai sid Usural Rasul 4,18 Boros di Petrus om i Yahya, Ioku diti amu kavasa dot amu momoros di sokoviai i hal dit nemot om i norngou-za, ka dioti. Pengkaa dino Yeremia 1,6: Boros di Yeremia, Ioku diti omulok-po, amu-oku milo mangahatul, ka, nga kakali sinuhu iosido di Kinoringan. Ko i Musa (Kolobusan 4,10ff) Boros di Musa, Apanggol i dila-ku, ka, nga sinuhu iosido, tu boros di Kinoringan, Okon-ka ko ioku-no o minangajadi di kabang do riniba, antava okonko-ka ko ioku-no o pobolou om pobobou om pobongung om posirotdot ulun? Sabap ino, pamanau-no, ioku-no diti o kabang-nu sampai monuduk-oku dikau dot ombo-nopo o boroson-nu, ka di Kinoringan. om Yeremia 20,9: Pongitungan dara di Yeremia, Amu-oku mangahabal vagu di

boros do Kinoringan, tu asaadan-oku, ka. Nga opurimanan-ku sid saralom-ku iadko apui dit ahakang dit a-milod pisokon. Manjadi amu elaan dot amu mangahabal-oku, ka di Yeremia. Om sid 1. Kor. 99,16-17 boros di Paulus, Amu milo-milot nga mangahabal-oku, tu osusa ino ong amu-ku ihabal ino habal dino, ka di Paulus. Om iri-po i Yesus sid Matius 10,32: Isai i sumasi dohon sid tinoguvangon dot ulun, ino-no o pososizon-ku sid Ama-ku sid surga, ka di Yesus.

Sabap ino,

a) i gama dit ulun sumasi di Kinoringan rontob sumasi, okonko iosido o mogkovosihan di Tuhan, okonko mokindazou, antava mangagil, okonko sumasi do iadko mokisuul. Sumasi do Kinoringan, harati, mogihim di hormat do Kinoringan. Matius 21,1-11 It ongoulun mad amu elaan ko minongumba di gama diri, baiko manatas do kazu om mangalapik di ralan. Aso tomodon dioti, rontob mongohormat dit Anak di Daud. Minsanko anganak dit aso-po tantu dot ohorotizan ino gama di Yesus diri, nga iadko i boros sid Zabur minamung sid gama mangarazou di Yesus. Zabur 8,3: It aanganak di ragang-po om sumusui, nga mongindazou dikau, ka.

b) I gama sumasi sumaap di karaatan om posurut di kovosihan do Kinoringan. Manjadi kodung varo kosusaan, varo kopurimanan do sansara. Topot okonko monuli di karaatan, gamko sumasi di gama di Kristus bahagi di sokoviai. Tu minsanko it ulun dot araat, om it ulun dit amu mangasip, nga atanggunggi di Kristus. Sabap ino, i gama sumasi mongovit dit anavau sid tanga dot otuvong. Ino gama sumasi om kopurimon do kosusaan, nga nahatuli do Kinoringan. Mat.10,19: I Sundu dot Osusi ino-no o momoros sid ssuvangi ginavo dikou, ka di Yesus. Iri-ogi amu obimbibitan it ulun di sumasi, tu i Sundu o pasasi. Topot ong iadino, i gama sumasi amu bozoturur di gama dit ulun dit amu mangasip, amu mantas di gama pakaso do Kinoringan, gamko sumasi om porongou di vokon dot, I Tuhan o Minongurug om iosido o manansanganu di sokoviai.

c) I gama sumasi okonko iseso, om okonko hal sid kondiri dau. Sabap ino, mongining tokou di boros do Kitab, supaya elo tokou sumasi. Topot okonko baiko mongimbulit di kosipan antava i boros di Kitab, inoi nga sokoviai i koposizan tokou mongontok di kososizan. I Petrus minongolim i hiza di korundan dara iosido (Markus 14,66). Olingob-no i gama dau sumasi, hiza dot asot ulun sino tanid mantadko i kinoruhangan di Yesus (Mat. 16,15). Aso

tenganan iadino. Na it onsi di kososizan, ino-no: 1. Kor. 12,3 I YESUS O TUHAN-KU, ka. Iosido ot ontok banal di kososizan. Tu bang bai Kinoringan o boroson dot okonko mangarait di ngaran di Tuhan Yesus, amu-po kavalang dot ombo o Kinoringan o boroson. Topot ino kososizan dot, I Yesus o Tuhan-ku, ka, na kavalang-no banal i Kinoringan.

d) I gama sumasi okonko hukum, iadko i hukum manahak do sukoi. Minsanko manahak do sukoi, nga kakali varoi do iadko sumaap do perintah. It ulun di sumasi suvaiko antad sid dau do ginavo, antava dau do koginavaan ko kenginan om antad dau do katamanan. Okonko hukum, okonko mokisuul, okonko gumaji, okonko suvai agaratan om sumasi-ogi. Sabap ino, amu rumosi it ulun do sumasi dot onong ka ko amu i gama dau. Tu kodung sumasi, mad nakamung-no iosido sid Kinoringan om i Kinoringan nga nakamung-no. Bang iadino, katama-no it ulun momoros iadko i Zabur 119,46: Sumasi-oku dikau sid tinoguvangon dit ongoraja, nga amu-oku rumonok, ka. It ulun di nakamung sid Kinoringan sid saralom di gama dau sumasi, iadnoko pampang sid tanga do riniba dit amu oguzu.

I GAMA MINTA DUA

I gama sumasi nga mongindazou di Kinoringan sid tinoguvangon dot ulun. Pengkaa dino i gama minta dua, mongindazou do Kinoringan sid tinoguvangon, gulu do Kinoringan om iri-ogi sid ongoulun. Tu i gama minta dua ponong sid Kinoringan, kumiboros do Kinoringan om mindamo sid Kinoringan. Okonko sid toguvangon dot ulun vokon. It ulun di minta dua, mongindazou sid tinoguvangon do Kinoringan dot amu mongiro dit ongoulun vokon.

Sabap ino,

a) it ulun katama minta dua sid Kinoringan, tu pinatama do Kinoringan di mongimuhun sampai monuhu-po di tokou minta dua sid dau. Zabur 50,15 Boros di Kinoringan, Kodimo-oku-no, ong kikosusaan-ko-no, supaya mongining-oku om manapul-oku dikau. Manjadi otindal-po, mongindazou-ko-po dohon, ka di Kinoringan sid Zabur dino. Ino-no o harati, i pinta dua, nga antadi sid suhut do Kinoringan. Yeremia 33,2-3 Ino-no i boros di Tuhan, i Minongurug di pomogunan, i minongurod di pomogunan, supaya apapag i pomogunan dino, ino-no i ngaran dau, Tuhan. Pongodim-no dohon, supaya mongimbulaioku sid dikau do kosunduvo dit a-opirongou, ka di Kinoringan.

Om Yesaya 55,6: Ihimo-no dikou i Tuhan biano it alaid-laid-no kemot. Kodimo-no dikou iosido biano di sisino-no laid iosido, ka di Yesaya. Om Matus 7,7 Boros di Yesus, Indamo-kou om atahakan-kou-ogi. Ihimo-no dikou om emot-ogi dikou. Koritik-no dikou o rongon om ogiangan-kou-ogi, ka di Yesus.

Bang sukul i gama minta dua antad sid nokosuhut di koturan om kenginan do Kinoringan, atag-no i pinta dua sid tinoguvangon do Kinoringan dino, tu antad sid hoturan di kovosihan do Kinoringan o gama minta dua.

b) Minta dua, rumbul satu o harati, Mindamo sid Kinoringan. Suvai mindamo ong it aso dau kondiri. It ulun di minta dua sid Kinoringan amu mongovit sid Kinoringan di nunu-nopo ong okonko rontob i dau kondiri. Baiko mokitahak, okonko manahak it ulun di minta dua. Ong iadino, osibak i ginavo minta dua om obinsuhut di hoturan do Kinoringan, supaya kemumui i gama minta dua di kenginan do Kinoringan, tu minsanko amu tokou milo di kopotutan minta dua, nga i Sundu do Kinoringan o momihot om mongontok di tokou minta dua (imatai i boros di Paulus sid Rom 8,26)

c) I gama tokou minta dua okonko iadko iseso. I tokou, ong kodung minta dua, nakamung tokou sid Tuhan Yesus om i dau do gama minta dua. Iosido obpinai tokou, iosido minongontok minta dua bahagi di tokou. I tokou nga pengkaa dino, okonko baiko i dau otengat minta dua, inoi nga engat-po i hal di sokoviai i riniba, iadko i pintaan dua di Tuhan Yesus dit engat i surga, i karajaan do surga rumikot sid riniba om i kenginan do Kinoringan om i ngaran do Kinoringan di tumongkop do pomogunan. Sabap ino, popuhondom tokou i Kinoringan dot amu pinosimozo iosido di kosurutan di kenginan dau om i gama dau monindal di riniba.

d) Manjadi i gama minta dua nga engat it ambat do Kinoringan. I gama minta dua okonko baiko tumiim iadko i gama dot ulun mogihim do siin sid siombo-nopo, tu kalu-kalu ong kemot. Bang minta dua, elaan-no banal dot varot ambat do Kinoringan. Iadino i pinta dua isuhut sid kenginan om kovosihan do Kinoringan. 1. Yahya 5,14-15 Ino-no o harapan tokou sid Kinoringan, iningon dau i gama minta dua om mindamo, ong sukul mindamo tokou sumuhut di kenginan dau. Bang elaan tokou do mongining i Kinoringan di gama tokou minta dua om mindamo, elaan tokou-no do varo katahak dit inindamo tokou sid dau, ka di Yahya. Om Zabur 91,14-15 Boros do Kinoringan, loku-ho o manapul om mongorinding dit isai-nopo i tumopiri i

ginavo sid dohon om kotutun dohon. Ong mongodim iosido dohon, tantu timpaon-ku. Ong kikosusaan iosido, vozoon-ku. Tindalon-ku om iinsavat-ku iosido, ka. Om Zabur 145,18-19: Osomok i Tuhan sid ulun di mogihim dau, ong sukul otopot o gama dioti mongodim. Manahak iosido do sumuhut di gama mindamo dit ongoulun dit obinsuhut om mongining-no iosido di tokou di kikosusaan sampai monulung iosido.

Markus 11,23: Boros di Yesus, bang momoros do povolihon sid rahat ino burul hodi dot amu opiduvo i ginavo dau do momoros do iadino, gamko humarap dot ajadi i boros dau, tantu ajadi ino iadino. Sabap ino, boroson-ku sid dikou, Sokoviai i nunu-nopo ong sukul mangasip-kou di minta dua om mindamo-kou dino, tantu kotorima-kou dino, ka di Yesus.

Sid Yakub 1,5: Bang varo't amu miuma i kelaan dau, mindamo-kou sid Kinoringan, tu i Kinoringan manahak do nunu-nopo dot okonko mamajal di mokianu iosido do kelaan dino, ka.

Bang minta dua dot okonko iadino o gama humarap, tantu aso kogunaan i pinta dua dino. Manjadi i tokou diti baiko sumusui di pinta dua di Yesus, tu sid pomintaan dua dino o kelaan tokou do nakamung tokou sid Kinoringan sampai ophot om nemvagatan om atapat i piniizaan tokou om i Kinoringan, gima i Yesus ot obinsuhut sid saralom di koposizan om kasansaraan om kinapatazan dau di banalko minongontok di tokou. Yahya 16,23 Boros di Yesus, I hiza diri amu-kou mongoduat-po dohon di nunu-nopo. Boroson banal-ku sid dikou dot, Bang mindamo-kou-ogi sid Ama-ku do nunu-nopo, tahakan-kou dau, gima i ngaran-ku. Sampai bianco, nga amu-kou mindamo sid ngaran-ku. Manjadi indamo-kou-no, supaya kanu-kou do kotulukan di katamanan dikou, ka di Yesus. Om Mat. 18,19: *Bang varo duvo ot ulun di minizo mindamo dot iso o hal, tahakani dit Ama-ku i sid surga*, ka di Yesus. Manjadi antad sid harapan di iadino, otopot i Sundu dot Osusi o mangagazad dit ulun Kristian sid kolobusan di retanko anganak do Kinoringan di katama do kumiboros sid Kinoringan.

e) Kuran i vazaan di gama minta dua. Bang minta dua sid tanga do piumpugan, antava iseso it ulun, nga atag dot amu olingan it obpinai om it ulun vokon. Suvaiko arangkap i gama minta dua ong mongontok-po dot ulun vokon dit osusa, om mongontok-po mindamo bahagi di sokoviai i piumpugan (Yahya 17,9) Minsanko i sangod, nga antakani di Yesus (Lukas 23,34) Kagi-po, atag ong ipat-ipat it ulun varo hoturan dau minta dua. Okonko baiko minta dua ong ontok dot osusa, sampai ong minta dua, okonko pingguli-gulian i

noboros antava iadko tomod moroboros.

Atag ong it ulun di minta dua mongohondom banal laid dot ombonopo it tomodon dau minta dua, supaya amu olingan antava kalandu iosido. Okonko suvai osukup ong anaru o boroson (Matius 6,7) tu boros di Yesus, Kadan-kou-no momoros dot asapou iadko it ulun di moroboros sid rogon. Tu i pongitungan dioti, Suvaiko ogoroot om sumuhut-ogi it ongorogon. Kadan-kou-no iadino, tu i Ama dikou sid surga, elaan-no kavi dau it ongokenginan dikou dit amu-po nokoboros, ka.

Atag dot it ulun Kristian moubas minta dua do sasarap om sosodop om ontok do monginakan, topotokonko iadko hukum ino hoturan dino dot a-milomilo suhuton. Tu suvaiko atag minta dua ong antad sid ginavo om kiguna-ogi.

Atag ong minta dua it ulun, okonko horotizan dot amu-no sumimban i noboros laid, sampai alaid iadko rundukan om monguji antava iadko enjin momoros.(pirin ko kaset)

I ponulung om i pandita, nga atag dot ihimon i vazaan minta dua sid tinoguvangon dot ulun di noumpug, supaya i tuturan om i pomintaan dua mionong, sampai i pinta dua okonko baik antad sid pongitungan di gulu. Sabap ino, i ponulung om i pandita mongitung om monurat laid dit atag om atarang o gama minta dua, supaya i piumpugan okonko modop dit ontok minta dua, inoi nga engat do sid tinoguvangon di Kinorngan ioti. Iri-ogi momihot-po i piumpugan di pomintaan dua dit pandita ko ponulung om tumpuk sid gama mangamin om mamanal di pomintaan dua dino. Tu i boros AMEN ino-no o harati, Banal-neno, sampai sid gama mangamen mamung i piumpugan sid gama minta dua.

B: I GAMA DIT ULUN SID TINOGUVANGON DOT ULUN

Sid saralom di gama do Kinoringan mongodim di riniba sid tinoguvangon dau, popitotoguvangan dau it ulun om i koruhang dit ulun dino. I hukum do Kinoringan manarang di tolu o bansa do koruhang dit ipat-ipat it ulun, ino-no:

keso: i kusai om it ondu

koduvo: it ongomolohing om it anganak

kotolu: it ulun di sid somok om i sid sodu.

Manjadi antad sid hoturan do Kinoringan o kelaan tokou dot ombo it atag, ong ipat-ipt it ulun okonko baiko i dau do kobuatano om koposizan o posizon diosido, inoi nga i-po koruhang dau o posizon dau sampai morumatan om umbosihan dau.

KESO: ONDU OM KUSAI

It ulun di koruhang do Kinoringan ohondom antad sid hoturan di Minongurug dot, it ulun suvai ulun banal ong kikoruhang iosido. Iso`t ulun nga aso`t dot iseso banal. Kagi-po i kusai okonko iseso antava it ondu. Minsanko varo pitonidan di kusai om it ondu, nga ioti miduvo dino apasi ponong sid vokon. It ondu ino-no it ulun vokon di kusai om i kusai ino-no it ulun vokon bahagi dit ondu. Sokovia i koposizan di kusai om it ondu nahatul-no di Kinoringan i minongurug dioti miduvo dino. Kenginan do Kinoringan do sompi mamakai ioti di dau do kuasa, rontob, okonko iadko aso vokon, inoi nga kerad di hoturan di kinourugan. I pitonidan di kusai om it ondu okonko baiko i komoluan dioti. Sabap ino, okonko baiko ino dino o hinatul di hoturan do Kinoringan, inoi nga i sokovia i kavazao om koposizan mioonong, sabap gima i hoturan di kinourugan. Kagi-po minsanko ino hoturan di misavo o rumbul satu, nga okoni ko sokovia it ulun musavo. Banal-noko kihoturan it ongoulun dot Israel dot musavo sokovia, ong sukul amu ohukuman do Kinoringan. Topot sid tanga di Kitab Laid o kinembulazan di harati vokon di manarang dot okonko i musavo o kosungguvon di riniba. Yesaya 56,3-5 minomoros i nabi Yesaya: *Kadan-no momoros it ulun dit amu maganak dot, Ioku diti iadko kazu do noruzou-no, kanu, tu boros di Tuhan, It ulun dit amu maganak ong sukul sumuhut di hoturan dot adau do pongintaranan, sampai mongumbasih o gama dau kerad di kenginan-ku, nga gamaon-ku bahagi dau dot ongotanda sid kuta-nu di lobi-po kingaran ko anganak kusai om ondu, ka di Kinoringan. Om sid Kitab Vagu varo tudukan dot, <It ulun dit amu musavo, nga antad sid kovosihan dot Sundu do Kinoringan dot amu musavo. I Tuhan Yesus kondiri amu minanansavo. Matius 19,12: Boros di Tuhan Yesus, Varo tamanang antad sid vangun, varo-n9o ong antad sid gama dot ulun mokiontoluw, varo ong inontoluhani dau kondiri, sabap gima i karajaan do surga, ka. 1. Korintus 7,7: I kenginan do Kinoringan manahak a-enizo, varo iadino, varo iadilo, ka di Paulus.*

I nokorikot-no i Tuhan Yesus, nga nelaani dau dot, I hal do musavo okonko

a-milo-milo nga masti. I musavo okonko hoturan di kinourugan dit a-milo nga tulukan, inoi nga gama do Kinoringan. Suvaiko Kinoringan o mangagazad om mangahatul dit ipat-ipat it ulun. I musavo om it amu musavo, nga sumuhut di kenginan do Kinoringan, okonko i kenginan do riniba o suhuton dau. Manjadi suvai sumuhut di kenginan do Kinoringan, it ulun di manansavo antava mokisavo engat dot, Iadino i kenginan do Kinoringan, ong okonko guvelan i kenginan do Kinoringan dino. Tu i hoturan do musavo antad kavi sid Kinoringan. Manjadi suvaiko elaan om ohorotizan-po dit ulun do suhu om kenginan do Kinoringan dot apatut o gama dau musavo om apakai-ogi. Topot ong baiko musavo, tu akanggau antava tisavo antava sumusui dit ongo-koruhang, tu asavo, tantu okonko antad sid kenginan do Kinoringan o gama dino. Sabap ino,

a) i kusai om it ondu inurug di Kinoringan, supaya ioti miduvo dino apasi kerad di kinourugan. I kusai amu ajadi dot ondu ko misingondu, om it ondu amu misingkusai. Kagi-po amu atag dot i buatan dot okonko kusai antava ondu iosido, iadko bansa do kotolu iosido, ino-no pundan.

b) It ongokusai amu apasi ong iadko asot ondu o buatan, om it ongoondu pengkaa dino. I kusai apasi ponong sid ondu om it ondu pengkaa dino, tu 1. Korintus 11,2-4 minomoros i Paulus dot, It monguasa dit ongokusai ino-no it ondu om i monguasa dit ondu ino-no i kusai. Om iri-po 1. Kor. 11,2-3: it ulion dit ondu, ino-no i kusai om it ulion di kusai, ino-no i Kristus. I harati, i kusai ong aso't ondu antawa it ondu ong aso kusai, nga asoi kogunaan dau sid tinoguvangon do Kinoringan. Sabap it ondu antad sid kusai om i kusai dino ajadi, tu it ondu. Topot antad kavi sid Kinoringan, ka di Paulus.

c) Antad sid hoturan di kinourugan, i kusai o mangahatul om mangagazad om monguasa dot okonko mongogorot om monguripon antawa monuhu dit ondu (1. Kor. 14,34; Kolose 3,18; Efesus 5,22-24; 1. Timotius 2,11; Titus 2,5; 1. Petrus 3,8.) It ondu nakamung-no om nokosuvang-no sid hoturan di kusai. Topot okonko iadko uripon di kusai. It ondu dino iadko odundungan di kusai om naapadan. Topot okonko boros di Kitab dot, I kusai o tuan dit ondu, antawa momorinta dit ondu. Suvaiko antad sid samod o hoturan di kusai sid ondu dino. (Kolose 3,19; Efesus 5,23-26; 1. Petrus 3,7; 1. Timotius 2,8; Efesus 5,21; 1. Petrus 3,5). It ondu sumuhut di kusai, gima i hoturan di Kinoringan, okonko gima i kuasa di kusai, om okonko iadko it asu di suvaiko sumuhut ong ginaratan. I kusai o mangahatul di gama mikoruhang di kusai

om it ondu. Iti-no i rumbul sato karanggalan di hoturan di kinourugan bahagi di kusai om it ondu, ong i kusai momorinta do kopogos o hoturan, ko it ondu ong mokiuripon iadko asu. Antava it ondu di kumodou om obingguvail di hoturan di kusai dit antad sid samod do Kinoringan.

I GAMA MISAVO

I misavo ino-no o rumbul satu o hal mikokoruhang it isot ondu om iso kusai. Manjadi aso-no nobi di piniizaan do minisavo, tu minizo i sokoviai i koposizan dit duvo it ulun dino. Bang baiko mirogop it ulun, baiko i mizo sino i gamaon dau. Bang engin mivovo-vozo sid ralan, baiko kopivozo ong mizo do vazaan om panahon dioti. Topot kodung minisavo, sokoviai i koposizan nga nokopiizo-no. Sabap ino, varo turu o hal di manalahas dit atag o gama musavo-ogi om i minisavo.

a) I gama misavo antad sid kodim do Kinoringan

I kovosihan om kodim do Kinoringan mangahatul di duvo it ulun di iadino o gama dioti misavo. I gama misavo okonko hal dot adat antawa undang-undang antawa kenginan om kovosihan dot ulun antawa i kenginan do molohing. Suvai atag ong antad sid gama sumuhut om mangasip di hoturan om kenginan do Kinoringan, i gama musavo, nga gama do sumuhut di hoturan do Kinoringan. Matius 19, 6: avangaan i kinoruhangan di Yesus, tu varo hoturan do Kinoringan dot, *kodung minisavo, pempatai dot amu miada*.

Aso kengkadan di gama minisavo. Isai i kisavo, nga nahatul-no i koposizan dau sampai pempatai. Ohorotizan tokou ino duaton di kinoruhangan dot, Bang iadino, osuhl-no dati ong amu musavo it ulun, ka dioti.

Suvai kening it ulun di hoturan do Kinoringan om kosuvang-ogi iosido sid piniizaan do minisavo. Okonko osukup-no ong miginavo it duvo it ulun dino, tu ong i koginavaan okonko hal sampai penlaid. Koginavaan mengkod om sumimban om sumiliu do kasaanaan. Suvai tumatap i koginavaan dot ajadi do samod di misasamod, kolu di boros di Paulus sid 1. Korintus 13 om opihotogi i piniizaan do minisavo, sampai atahan i samod sid katamanan om kosusaan di duvo it ulun dino.

b) I gama di minisavo okon ko baiko opurimanan, iadko sakit om iadko kovorisan dit okonko otopot, nga kovorisan iosido, tu baiko bozoturut di boros. Gamko kodung nokopisavo, ino duvo it ulun dino ihimon-no i kopudan di piniizaan do minisavo, tu nokopiluzung-no i gama dioti sumuhut di kenginan do Kinoringan. I koposizan di duvo it ulun dino nokopiluzung-no

mivozo-vozo-no ioti sid ralan, miharati-no ioti miupakat, miangu ioti di kavagatan om kosusaan. Okonko baiko nokopiluzung i komoluan dioti, okonko baiko mikokoruhang di gama mansahari i kusai om magazau om manaud do valai it ondu, okonko baiko tomod mamaganak antawa mongim-bulai om mangaranzat dot ongakob. I gama minisavo nga piniizaan dit asot kerad, minikoruhang dot asot kerad. Suvaiko opud it ongakob om it anganak om i gama sid valai om i sid mansahari, ong opud i piniizaan dinot iso o kusai om i savo dau dino, do miduvo-duvo ioti nga mogihim om posurut di kopudan.

c) i piniizaan do minisavo dino piniizaan dot nensanan.

Boros di Kitab, i duvo it ulun dino ajadi dot iso o guvas, ka. Okonko harati i kusai monguripon dit ondu dot asot elaan dit ondu do kuran, antawa it ondu momorinta di kusai. Kakali it ondu dot ondu om i kusai nga kusai. Topot milavan ioti manamod om mongumbasih, supaya tumatap i gama dioti misasamod om mitulung dot andaman-no dot tanid i kobuatano di kusai om tanid it ondu.

d) I gama misavo, a-elaan dot ulun vokon.

Aso koruhang koduvo dit ulun minisavo. Kenginan do Kinoringan dot iso o kusai momili dot iso ot ondu. Manjadi kodungko nopili-no di ginavo, nga tumatap-no i samod sid gama minisavo. I misavo dino mongopud do samod. Manjadi kodungko nopili-no, aso-no pilion-po vagu. Kodung nokopisavo-no, nopongo-no momilo om i gama do posurut di piniizaan do minisav nga nokotimpuun-no. It ongoanggai laid diri, dit anak vagu-po i kusai om i sumuni-po it ondu, nga nengkod-no, tu baiko mongunang di piniizaan di minisavo. It ondu, nga ino kusai ot ulion dau. Amu-no muli vagu iosido sid ama om idi dau, tu asot ulun vokon do kerad kosomok ki i savo dau. Kagi-po i gama minisavo iadko ondig-ondig di piniizaan dit ulun sid tinoguvangon do Kinoringan. Sabap ino, it ulun do mangasip momoros dot, Inot ondu dino, ko ino kusai dino, aso vokon, savo-ku-no, ka. Okonko i ginaratan o boroson, inoi nga antad sid kosipan dau.

e) i gama minisavo piniizaan dit aso kengkadan.

Songkuro kalaid dot apasi it duvo it ulun dino, nga nokopisavo-no. I gama minisavo sampai pempatai ot ondi-ondig di katatapan di Kinoringan sid riniba. Iadko amu engkod i samod do Kinoringan sid riniba, amu engkod i gama misamod di misavo. Sabap ino, kodung nokopisavo, pempatai-no do

nokopihot-no i piniizaan do minisavo. I gama musavo okonko janji do duvo ot ulun do sera-sera nga kadapat monimban vagu iadko janji do kumbani antawa iadko syarikat,do kosuvang om kalabus-ogi. Matius 19,6 om Markus 10,9 boros di Yesus, Kodung nokopisavo om nokopiamung do Kinoringan, kadan-no popitongkizadon do riniba. I janji do misavo janji antad sid Kinoringan sid tinoguvangon do Kinoringan. I Kinoringan o sumain om momihot dino janji dino. Manjadi iasi-nopo i karanggal dino janji dino, karanggal-no iosido di pinonuhuan om hoturan do Kioringan, om i kovosihan do Kinoringan.

Sid Kitab Laid varo vazaan miada om misavo vagu (Ulangan 24) Topot ong i Kitab Vagu, nga tanid o hoturan. 1. Kor. 7,12-13 om Matius 19,1-12, i Yesus minongimbulit-no vagu di hoturan do Kinoringan dit antad sid kinourugan. I Yesus minomihot dot, *ipat-ipat it ulun di mangada di savo dau dit aso sala, ino-no i iadko kumiagai*. I tudukan di Tuhan Yesus mongimbulai-no vagu di hoturan do kinourugan di popiamung i Kinoringan do duvo ot ulun, ondu om kusai. Ino rontob o kopihatan, okonko i kopiupakatan do musava antawa miada om mitotongkizad om okonko i boros di pandita di mamarakat dit ontok do mogontong, antawa i gama di duvo it ulun kopiluzung do komoluan. Suvaiko mangasip om humarap do kodim om hoturan do Kinoringan om atag i minisavo.

f) i gama minisavo suvaiko it inantadon do gama miginavo.

Suvaiko miduvo duvo nokopipili kopisamod, kopiengin sampai sompismuhut di kosipan sid Kinoringan, iadko i samod di Kinoringan sid riniba o mongimbulai do samod dot ulun di monuli di samod do Kinoringan o gama dit ulun di miginavo. Antad sid kosipan di kusao o kenginan dau dot isot ondu om inot ondu dino o monuli di samod di kusai dino, ong ohorotizan do iadino i kenginan do Kinoringan. Tu bang antad kavi sid kenginan do riniba, tantu aso kanangan. Bang amu monuli it ondu di samod di kusai, atalahas dot okonko kenginan do Kinoringan. Suvaiko mionong i kenginan do samod om mionong i gama mangasip om atalahas-ogi do iadino o hoturan do Kinoringan popionong di ginavo di duvo it ulun dino, tu iadino i dau do hoturan. Sabap ino, suvaiko sompi mangasip sid Kinoringan om mionong-ogi, sampai suvaiko sompiasamod.

Sabap ino,

- amu mongogorot dot ulun musavo.
- amu manansavo/mokisavo sid ulun dit amu mangasip

- amu manansavo/mokisavo sid ulun do tanid ot ugama
- amu manansavo/mokisavo dit ulun di kisavo laid
- amu manansavo/mokisavo dit ulun dit anak-po.

Tu ino iadino sokovia i adko ontok do kotongkihalan, tu elaan-no laid dot baiko tiim, okonko otopotko musavo.

g) I gama minisavo, suvaiko nakasasi sid tanga di piumpugan do Kristian.

I duvo it ulun di musavo sumamung sid piniizaan dot ulun do Kristian, ontok di kopisavaan, tu i gama dioti misavo okonko olingob, inoi nga alanta om sid tanga do piumpugan. Kagi-po ioti miduvo dino ajadi do piniizaan dot opondok sid tanga do piumpugan.

Manjadi varo hoturan do mihukum om mogontong. I mogontong nahatul-no do porinta, supaya minsanko sid porinta nga atarangi. Iduvo it ulun dino om it ongomolohing dioti di nopongo-no laid miupakat, pasasi sid ongoulun sid piumpugan dot, lokoi diti, nga kopiluzung-no sampai pempatai. Manjadi it ongoulun do piumpugan nga kasasi di nokopogontong-no sampai mongoho di gama dioti misavo sampai mindamo sid Kinoringan do barakat dioti miduvo minisavo.

Ino gama manarang, keso sid molohing, tu ong a-koho i molohing, nga araati i piupakatan. Kagi-po i porinta manantu di mogontong sid saralom di gama sid goriya. Gulu di mogontong, sumain-no laid it ongomisavo om it ongomokisavo om it ongomolohing, tu pentahan do padino o kenginan dioti. Katalib-po i janji do duvo sampai apat minggu, kopogontong-no ong sukul asot ulun manahan, tu andaman-ogi do varo sangkut do misavo ioti. Isai-nopo i nokorongou do sangkut, tu i savo laid ko nunu-nopo i hal dit aso tantu-tantu, poruputon-no ino sid pandita di mogontong.

Manjadi i mogontong sid tinoguvangon di piumpugan sampai i piniizaan o kasasi di kinopiupakatan dioti sampai mindamo do barakat bahagi dioti.

Nunu-ka i harati sumuhut di hoturan do Kinoringan dot ontokko ino hal dino? om nunu-ka i kobuatano dit ulun Kristian di kumavid di habal do Kovosihan ong ontok diti piniizaan di kusai om it ondu di misavo?

- It ulun amu sumuhut di dau do kenginan om dau do kozian om dau do kosinangan, dau do kobuatano, inoi nga sid sokovia i kopisizan engat it ulun do mongoguna om mongohormat om monuluk iosido di kenginan do Kinoringan dit amu monimban om amu milod antasan.

- It ulun di rumamit di pinonuhuan om kenginan do Kinoringan, elaani kuran-nopo it amu onong banal i gama dau. Na i Habal do Kovosihan o manala di sokoviai i buatan dit aso tantu-tantu, sampai it ulun dino kumavid di kuasa di kovosihan do Kinoringan, supaya ajadi iosido dot ulun dot osusi.

- It ulun di magavi sumana di karaatan nga tumabang di Kinoringan monori di sala om karaatan dot ulun.

- Manjadi i kakal tokou-po sid tanga do ralan kumaa sid karajaan om hoturan do Kinoringan, i kusai om it ondu baiko nokoponong sid hoturan vagu dino, engat tokou i boros di Paulus do Rom 4,25: *nembanaran tokou di Tuhan sid kinogulianan di Tuhan Yesus*. Sabap ino, sid saralom di gama minisavo apasi tokou ponong sid karajaan do Kinoringan. Iti-no o kosungguvo di piniizaan do minisavo, mikoruhang miduvo sid ralan kumaa sid karajaan do Kinoringan o ponong sid kopolisan penlaid.

- It ulun di minisavo amu olingan inot tomodon om kogunaan di minisavo ioti, do mitatabang, migagazad, mivovo-vozo ioti miduvo dino, supaya varo rikoton, ino-no i kosungguvo tokou ulun Kristian sid di Kristus.

KODUVO: IT ONGOMOLOHING OM IT ANGANAK

I kinosinaan dit anganak an tad sid kinopuluzungan dit ongomolohing dau, o ino-no i kusai om it ondu di najadi do molohing dit anak dino. Manjadi it anak kusai-no om ondu-no. Topot i piniizaan dit ongomolohing om it anganak tanidko i piniizaan di minusavo, tu it anak amu momili dit ongomolohing om it molohing amu momili dit anganak, inoi nga kodung nokosino, iri-no it anak om iri-no it ongomolohing.

1. MOLOHING, ino-no o harati, it ongogulu. It anganak it ongotohudi. Manjadi it anganak misisingilo sid ongomolohing dit avantang o hoturan om it ongomolohing mangagazad dit anganak posuvang sid riniba, monuduk dit avantang o gama mansahari om mongira di bahazan dot apatut, supaya it anak sumurut om sumukod om jumadi dot ulun dit atag o kavazao om kobuatano om kagamaan.

I pinonuhuan kolimo o manarang:

Pongohormat-no dit ama-nu om it idi-nu, supaya oloun-ko sid pomogunan dit itahak di Kinoringan, ka.

It ongomolohing okonko baiko minaganak dit anak dau, inoi nga ajadi do guru dit anak dau om it anak, suvaiko mongohormat om mokiajal, mongoguna om monorima kaseh sampai obinsuhut iosido om apaham o kobuatano dau. Kagi-po it ongomolohing mongontok di Kinoringan, tu i Kinoringan ot molohing banal do riniba, iadko ama om idi do riniba, tu minsanko i minaganak, nga antadi kavi sid Kinoringan. Sabap i Kinoringan minongurug do riniba om i Kinoringan o mangahatul di maganak, sampai mangajadi dit ipat-ipat it ulun. It ongoulun, iso nga aso't elo mongurug dit anak om monguasa dot anak dau, antawa monindal dit anak dau antad sid karaatan, antawa antad sid kapatazan om posuvang sid koposizan penlaid. Suvaiko i Kinoringan, i Ama dot obinsianan, gima Ama di Yesus Kristus. Antad sid dau do kovosihan om kinavaraan varo't ongomolohing sid tanga do riniba di mongontok do Kinoringan (Efesus 3,15).

Sampai-no, it ongomolohing posuntuan di gama di Ama tokou banal, tu i Kinoringan banalko mangagazad om mangahatul di tokou om i koposizan tokou. Manjadi, antad sid kaharati tokou di hoturan di Kinoringan o kosuhut tokou dit ongomolohing, om i pinonuhuan kolimo o manalahas di pinonuhuan keso, supaya atarang i kovosihan dit Ama tokou, ino-no i Kinoringan.

2.I gama maganak ong i minisavo okonko hal do kuran-kuran, nga masti varo. Suvaiko kianak ong kenginan do Kinoringan. Tu, *varo tamanang, ka di Yesus*. (Matius 19,12). Manjadi isai it ongoulun di minisavo dot asot anak dau, ogumu o kotibangan dau monulung om manaud dit ulun vokon om it anganak dioti. Sabap ino, okonko mitongkizad ong asot anak, tu tamanang it iso't ulun, gamko toudon banal i savo dau do mibabo di kosusaan dit aso't anak.

3. I gama kopiluzung i minisavo okonko atandas bai maganak o tomodon, ko pozom di manggau-kanggau i karalazan di kusai ko't ondu, inoi nga vaza do mongimbulai om miimbulai di gama misasamod. Sabap i piniizaan do minisavo, sinod kopiluzungan di guvas mad otuluk om arangkap banal i gama misasamod, tu jumadi di mad iso-no o guvas om ginavo. Ong bai hal do guvas om kenginan dot iso't ulun, a-konong i gama misasamod.

4. I kusai amu mongogorot dit ondu sampai opogos om asaadan it ondu dino, dit oholian o gama dau manaud om momiara dit anganak dau ko varo kosusaan vokon ko korukungan om koguguzan. Atag dot i kusai mongitung

- It ulun di rumamit di pinonuhuan om kenginan do Kinoringan, elaani kuran-nopo it amu onong banal i gama dau. Na i Habal do Kovosihan o manala di sokoviai i buatan dit aso tantu-tantu, sampai it ulun dino kumavid di kuasa di kovosihan do Kinoringan, supaya ajadi iosido dot ulun dot osusi.

- It ulun di magavi sumana di karaatan nga tumabang di Kinoringan monori di sala om karaatan dot ulun.

- Manjadi i kakal tokou-po sid tanga do ralan kumaa sid karajaan om hoturan do Kinoringan, i kusai om it ondu baiko nokoponong sid hoturan vagu dino, engat tokou i boros di Paulus do Rom 4,25: *nembanaran tokou di Tuhan sid kinogulianan di Tuhan Yesus*. Sabap ino, sid saralom di gama minisavo apasi tokou ponong sid karajaan do Kinoringan. Iti-no o kosungguvo di piniizaan do minisavo, mikoruhang miduvo sid ralan kumaa sid karajaan do Kinoringan o ponong sid kopolosizan penlaid.

- It ulun di minisavo amu olingan inot tomodon om kogunaan di minisavo ioti, do mitatabang, migagazad, mivovo-vozo ioti miduvo dino, supaya varo rikoton, ino-no i kosungguvo tokou ulun Kristian sid di Kristus.

KODUVO: IT ONGOMOLOHING OM IT ANGANAK

I kinosinaan dit anganak an tad sid kinopuluzungan dit ongomolohing dau, o ino-no i kusai om it ondu di najadi do molohing dit anak dino. Manjadi it anak kusai-no om ondu-no. Topot i piniizaan dit ongomolohing om it anganak tanidko i piniizaan di minusavo, tu it anak amu momili dit ongomolohing om it molohing amu momili dit anganak, inoi nga kodung nokosino, iri-no it anak om iri-no it ongomolohing.

1. MOLOHING, ino-no o harati, it ongogulu. It anganak it ongotohudi. Manjadi it anganak misisingilo sid ongomolohing dit avantang o hoturan om it ongomolohing mangagazad dit anganak posuvang sid riniba, monuduk dit avantang o gama mansahari om mongira di bahazan dot apatut, supaya it anak sumurut om sumukod om jumadi dot ulun dit atag o kavazao om kobuatano om kagamaan.

I pinonuhuan kolimo o manarang:

Pongohormat-no dit ama-nu om it idi-nu, supaya oloun-ko sid pomogunan dit itahak di Kinoringan, ka.

It ongomolohing okonko baiko minaganak dit anak dau, inoi nga ajadi do guru dit anak dau om it anak, suvaiko mongohormat om mokiajal, mongoguna om monorima kaseh sampai obinsuhut iosido om apaham o kobuatano dau. Kagi-po it ongomolohing mongontok di Kinoringan, tu i Kinoringan ot molohing banal do riniba, iadko ama om idi do riniba, tu minsanko i minaganak, nga antadi kavi sid Kinoringan. Sabap i Kinoringan minongurug do riniba om i Kinoringan o mangahatul di maganak, sampai mangajadi dit ipat-ipat it ulun. It ongoulun, iso nga aso't elo mongurug dit anak om monguasa dot anak dau, antawa monindal dit anak dau antad sid karaatan, antawa antad sid kapatazan om posuvang sid koposizan penlaid. Suvaiko i Kinoringan, i Ama dot obinsianan, gima Ama di Yesus Kristus. Antad sid dau do kovosihan om kinavaraan varo't ongomolohing sid tanga do riniba di mongontok do Kinoringan (Efesus 3,15).

Sampai-no, it ongomolohing posuntuan di gama di Ama tokou banal, tu i Kinoringan banalko mangagazad om mangahatul di tokou om i koposizan tokou. Manjadi, antad sid kaharati tokou di hoturan di Kinoringan o kosuhut tokou dit ongomolohing, om i pinonuhuan kolimo o manalahas di pinonuhuan keso, supaya atarang i kovosihan dit Ama tokou, ino-no i Kinoringan.

2.1 gama maganak ong i minisavo okonko hal do kuran-kuran, nga masti varo. Suvaiko kianak ong kenginan do Kinoringan. Tu, *varo tamanang, ka di Yesus*. (Matius 19,12). Manjadi isai it ongoulun di minisavo dot asot anak dau, ogumu o kotibangan dau monulung om manaud dit ulun vokon om it anganak dioti. Sabap ino, okonko mitongkizad ong asot anak, tu tamanang it iso't ulun, gamko toudon banal i savo dau do mibabo di kosusaan dit aso't anak.

3. I gama kopiluzung i minisavo okonko atandas bai maganak o tomodon, ko pozom di manggau-kanggau i karalazan di kusai ko't ondu, inoi nga vaza do mongimbulai om miimbulai di gama misasamod. Sabap i piniizaan do minisavo, sinod kopiluzungan di guvas mad otuluk om arangkap banal i gama misasamod, tu jumadi di mad iso-no o guvas om ginavo. Ong bai hal do guvas om kenginan dot iso't ulun, a-konong i gama misasamod.

4. I kusai amu mongogorot dit ondu sampai opogos om asaadan it ondu dino, dit oholian o gama dau manaud om momiara dit anganak dau ko varo kosusaan vokon ko korukungan om koguguzan. Atag dot i kusai mongitung

dau mogihim di kosinangan di bansa dau. Amu tumolikud iosido di hoturan do Kinoringan di mamasi iosido di dau do bansa, gamko antad sid hoturan do Kinoringan i gama do mongumbasih om mamasi di bansa dau.

4. It ongoulun sid sodu

I gama tokou mamasi do koruhang, ino-no it ulun vokon, a-engat do rontob. Minsanko it ulun vokon dit amu mintoron sid rinuvang di volit do pomogunan tokou om tanid o bansa om ugama dau, nga kakali rinibai dit antad sid palad do Kinoringan. I gama tokou mamasi gamko konong sid songriniba. Iadko it ulun Kristian sid Europa o minongitung do mangahabal di Kovosihan do Kinoringan sid ongoulun dit a-po opirongou ino habal dino, gima i suhu di Tuhan Yesus, i tokou nga mongohondom dit ongobansa vokon sid saralom di gama tokou minta dua, ong sera-sera ong kikosukupan tokou, mogihim do vaza polombus sid ulun dino di Habal do Kovosihan dino sid saralom di gama maanamod dit ulun vokon.

Ong bianco, tu i Television manarang sid di tokou di kobuatano om kosusaan do sompomogunan, a-milo-milo tokou mongitung do kuran kopitombil tokou om kopikaraving tokou sid Sabah sid kosusaan om kosinangan dit ongobansa vokon, dot amu miuna ong baiko i Kristian sid pomogunan vokon o kiroon, inoi nga i sokoviai i riniba di mongohomu om mogodoi sid ongokurangan om kolikapan ko kopirumpakan om kopisasanaan dit ongobansa.

KAPAT: IT ULUN OM I KOPOSIZAN DAU

Sid saralom di gama do Kinoringan mongodim dit ulun potoguvang iosido dit ulun sid koruhang dau sampai mongimuhun iosido dot ulun do mamakai di dau do kopoulosan om mongoguna di kopoulosan dot ulun vokon. Tu i kopoulosan di sokoviai i riniba baiko niposiva dit ulun, supaya i riniba om ipat-ipat it ulun mongoguna di kopoulosan om mangapad di dau do guvas, supaya aso kounangan om it ipat-ipat it ulun mamakai di kopoulosan dau sid saralom di gama sumuhut di kenginan do Kinoringan.

1. Mongoguna do kopoulosan

a) I minongurug i Kinoringan dit ulun, nga tonidan-no dau it ulun, supaya it ulun osodiri om katanid-no. Topot kakali i kopoulosan dit ulun baiko inolos, sinivaan-no, okonko dang ulun.

b) It ulun kikopoulosan, okonko baiko kiguvas, inoi nga kiginavo, kikopoulosan sampai kiutok dit elo mongitung. Amu ihas i ginavo om guvas dot ulun.

c) Ipat-ipat it ulun, tanid o kobuatano, okonko iadko it ongoenjin dit iseso banal o kavazao, ong kodung iseso o bansa ko rumbul.

d) I kopolisan dit ulun okonko penlaid, inoi nga varo kotimpunaan, varo kengkadan sampai i kobuatano di kopolisan muhut-suhut di kavazao do hiza dau.

e) It ulun, varo kenginan kondiri, okonko baiko pakakas iosido ko koburuo di hal vokon. Topot kakali i kogunaan dit ipat-ipat it ulun, ong apasi iosido ponong sid Kinoringan.

f) It inantadon do kopolisan, Kinoringan, i kosungguvon pengkaa diru, Kinoringan. Sabap ino, sokoviai i kopolisan sid tinoguvangon do Kinoringan.

g) I kopolisan dot ulun okonko iseso, inoi nga sid tanga do piniizaan do songriniba. Amu mopud it ulun iadko sid puru dot iso't ulun vokon nga asoi.

Sabap ino, keso mongoguna tokou do kopolisan, okonko iadko bai tomod makan om modop o gama tokou. Minsanko baiko noles, kakali do varo kogunaan di kopolisan tokou. (Hondomo-no i tuturan dit ongouripon di tinahkan do ringgit ko talenta Matius 25,14-30.)

2. It ongokoozian dot ulun

It ongokoozian do riniba o ino-no, tiakan, tisamod, tiadon. Topot ino koozian okonko iadko oroloi antava iadko dupot di banalko magavi mogihim di kosukupan di koozian dau, inoi nga elo it ulun tumahan om mangahatul dino kozian dau. Engat dit ulun dot okonko tomod makan o kopolisan dau. Suvai ahatul-no i pongitungan om kenginan dot ulun dot okonko mad lalang, inoi nga ahatul om atag, sumuhut di hoturan do kopotutan.

3. I kosihatan dot ulun.

It ongosakit ino-no harati, tanda di kapatazan om tanda di hukum do Kinoringan di manala di karaatan dot ulun. Sabap ino, it ongosakit antad sid gama dot ulun pakaso do Kinoringan om pakaso di kinourugan. Antad sid hoturan di kinourugan sinuhu it ulun do momili do kopolisan om kosihatan. Sinuhu iosido dot apasi sampai osihat iosido. Sabap ino, it ulun sumaap dit ongosakit om humarap di gama do Kinoringan posihat vagu. Kiutok it ulun dit elo monodiri ombo i ponong sid kosihatan om ombo ponong sid korungazan di guvas om ginavo. It ulun tanggung jawab di guvas dau ponong sid kavantango om katagan.

Na varo sakit antad ginama dit ongogulu-gulu dot okonko it ulun kondiri ot kisala om varo dot aso't elaan di siongo antad i sakit dino. Na it ulun popuhondom di sakit om kosusaan dau sid Kinoringan sid saralom do minta

dua; tu antad sid Kinoringan o koposizan om kosihatan. Kagi-po, it ulun andaman sid tanga do sumakit iosido, dot i koposizan amu penlaid (Zabur 90,12 *tudukai-okpi-no mongizap di sukud-za, supaya elo-okoi monguog, ka di Zabur*). It ongosakit vokon-no nga vazaan do Kinoringan potoguvang di tokou sid dau om mongohondom dit inantadon tokou.

4. I katamanan dot ulun.

I koposizan okonko tomod bozoturur di nunu-nopo. Okonko olungui it ulun, tu ogumu o kokurangan dau, dot amu lumundu iosido ko amu osukup o koposizon dau. Engin i Kinoringan dot ohigak om otomon i kobuatano dot ulun, tu i katamanan dot ulun o tanda dot agazo o ginavo dau sid Kinoringan monorima kaseh.

- Aso katamanan dot antad sid gama mongorongoi do guvas om ginavo
- Aso katamanan ong olingan it inantadon tokou
- Aso katamanan dot antad sid gama mongorongoi dot ulun vokon.

I katamanan opud ponong sid Kinoringan om ponong sid ulun vokon, sampai alanut i katamanan dino, tu emot i kosungguvo dau sid tinoguvangon do Kinoringan sid gama posurut di kenginan dau om hoturan dau.

5. I kuasa dot ulun.

Ipat-ipat it ulun varo pibidaan do kuasa om kakansangan. I pinonuhuan do Kinoringan mangahatul dit ipat-ipat it ulun, supaya ahatul-no i gama dot ulun mamakai di kuasa ponong sid ulun vokon do okonko monginsavat di kondiri ko momorinta di vokon. Ombo i kuasa dot ulun, ino-no it ontok do iosido o tanggung jawab. I kuasa dot ulun okonko iosido o sanganu, baik inolos om notugasan-no. Sabap ino, suvai andaman dit ulun it inantadon di kuasa dau om atag-ogi o gama dau mamakai di kuasa dino. Ino-no i manahak di kuasa, sid raja om sid isai-nopo, Kinoringan, nga engin i Kinoringan dot it ulun di kipangkat posinang dit ongoulun razat, okonko momogos dioti, supaya osinang iosido do kosinangan, inoi nga agazo o ginavo dau posinang dit ongoulun di nokosuvang sid kuasa dau. Sabap it ulun do kikuasa baik mandul do Kinoringan, dot amu osodiri, porinta, pandita om isai-nopo. Antad sid Kinoringan kavi i kuasa dau. Sabap ino, it ulun tumatap sid gama dau monguasa dit ongovokon, supaya i gama dau otorima do Kinoringan.

6. I gama mangapad do koposizan

I pinonuhuan dot, Kadan-ko-no mamatai, manarang dot amu atag ong it ulun mamatai dot ulun. Ino pinonuhuan dino mangapad di koposizan dot ulun,

supaya aso karanggal do tomod mongorongoi dit ulun vokon, antava mamatai, tu amu ontupat. Kagi-po, boros di Tuhan Yesus, It ulun dit araat o pongitungan sid ulun mad mamatai o gama. Okonko bai i karis ko senapang om pabambang o mamatai dit ulun, inoi nga it araat o pongitungan mongivogu ko sumana om humungot. (imatai sid Matius 5,22: Boros di Yesus, *lopat-ipat it ulun do humungot antava sumana di koruhang dau, ino-nga it onongi do hukum.... sampai kosuvang sid naraka.*)

a) Mitinganu

A-kavasa it ulun mamatai di kondiri, tu i koposizan dau inolos sid Kinoringan. It ulun okonko mongohukum di dau kondiri, iadko i dau do hakim iosido. Minsanko a-elaan dit ulun o ralan, atag ong humarapa iosido sid kobinsianan do Kinoringan. Baiko iso o vazaan do mamatai di kondiri dot okonko mitinganu, ontok do manapul dot ulun vokon sid saralom di gama monulung dit ulun vokon, ong kikosusaan iosido, ahandab i valai dot andaman do varo-po ulun sid saralom di valai dino.

b) Mamatai do vokon.

Varo pensubaan dot ulun do momoros antawa moniim do mamatai do vokon. Anak-po o boroson, tu amu engin i vokon. Ino pongitungan dino sumurut sampai minsanko sid saralom do ginavo, iadko gama, ka di Tuhan Yesus. Ino pongitungan dino, it ulun iadko mongohukum di vokon. I gama mamatai tumimpun sid bai boros om i pongitungan dit araat ponong sid ulun vokon.

c) Mamatai di kakal-po sid tizan dot idi

I koposizan dot ulun okonko baiko tumimpun ong kalandai-no it anak, inoi nga ontok do kitizan it idi dau. Manjadi it ulun di pedu do tizan nga mamatai iosido dit ulun dit a-po nemongo.

d) mamatai dit ongoulun di kisakit dot osusa.

Varo't ulun di kisakit do mitinganu. Varo kovorisan, varo dokutol do mogihim di kapatazan dit ulun do sakit, tu amu agasan, apagon momiara, ka. Na i pinonuhuan do Kinoringan momoros dot minsanko iadino, kakali atag dot it ulun mogihim do koposizan sampai atag do monorundakai di koposizan dit ulun di iadino pempatai. Sabap minsanko it ulun dit orukung ko okugui dino, nga varo ginavo dau om varo hormat dau sid tinoguvangon do Kinoringan.

e) Mamatai dit ulun

ong varo't ulun di sumaap dohon, kakali amu-oku kavasa mamatai dit ulun di sumaap. I Kitab manarang dot i tokou okonko hakim dit ulun di sumaap di tokou. It asaap okonko hakim di sinumaap.

f) I gama do porinta mamatai dit ulun do kisala.

Varo pomogunan dot i porinta maaanala do matai, tu mangapad dit ulun dit asaap dino. Ino-no i tinomod, it ulun di kisala iadko mongindorosi di sokovia i it ongoulun vokon.

Manjadi i kiniro dino, i kapatazan dit ulun do kisala iadko kapaganti di sala dau, iadko monobus di sala dau. Manjadi i kapatazan dau manahan dit ulun, supaya a-kembali vagu o sala. Topot minsanko iadino, kuran kelaan do riniba di mongohukum mongontok do Kinoringan? Kinoringan-no o kumavid do hukum om Kinoringan-no o monuli di sokovia i karaatan dit ulun. Kodungko napatai it ulun dit asala, a-no elo iosido sumimban sid gama dau. Ino-no rontob, Sid Malaysia varo hoturan om hukum dot it ulun di mongojual do dada o harati, iosido mamatai dit ulun di dumagang di dada ko monulung dit ulun dino sid kapatazan ko sid gama mitinganu. Sabap ino, amu apatut dot it ulun di mongimbulai di kapatazan dot ulun do iosido gam mokihuhuntung-po sid kapatazan dino.

g) i hal do rumpak

I kobuatano do rumpak manalahas do sid saralom do rumpak o kembulazan di sokovia i pensubaan, ino-no, mamatai dot ulun, mangarampas, momudut, mongindaraat, mongoginaka, mongudamus om nunu-nopo i nitiag do Kinoringan. Manjadi nokokuro, tu kakal-po moniim vagu it ongoulun om on gobansa do mongorumpak do retanko i rumpak harati, mangatag do karaatan om mongumbasih dot ulun sampai popiandusi.

I keso i hoturan do Kinoringan ontok do porinta, Ipamasi dot ulun. Topot ong i rumpak mogihim di kotonusan di kinogumuan dot ulun. Kuran-no o gama mamasi sid saralom do mamatai. Banal-no, ong varo sangod do monoruvang sid pomogunan dot ulun, i porinta osusa monuhu di sojal dau do mangajaga di volit, na kakali lobipo avantang do mogihim do kopiupakatan om kopioondusan sid gama kumiboros om misosodori dit ongohal dit amu kopionong sid pialatan dit ongoulun om on gobansa.

h) It ulun dit a-mangakun do sumuvang do sojal.

Iadko sokovia i it ongoulun sid iso pomogunan osinang sid kopiondusan do pomogunan dau, kodung varo sangod di mongorumpak di pomogunan dino, ensanan it ongoulun dino orumpakan. Sabap ino, varo hoturan dot ulion do porinta do varo sojal. Vokon-no ong i tentara do pomogunan nga ulun di ogojian. Vokon-no ong varo hoturan dot ipat-ipat i kusai di kakal-po anak

vagu iosido sumuvang do sojal. Topöt bang varo't ulun dit elaan antad sid dau do ginavo om antad sid hoturan do Kitab dot amu atag ong kumavid iosido dit ongopakakas do rumpak, a-kosuvang iosido sid sojal, minsanko konong sid dau do hukum om ipamala do porinta. Antad kodori ogumu ot ulun Kristian dot apatai dot porinta dau antawa torungkuon, tu a-kovoza sid rumpak ioti. Ipat-ipat it ulun mongitung dot ombo suhulon do sid iosido ko sumuhut di pinonuhuan do Kinoringan ko i raja.

ETIKA dot ULUN KRISTIAN Tudukan dit oviton sid Kursus Tumpuk do Kopitatabangan ontok di Julay 1992

Umpatod: Ino pongoretan ETIKA okonko a-tokou elaan do nunu i harati dino. Ino pongoretan dino inanu sid boros do Yunani dot ETHOS = bahazan ko adat ko kavazao dot atag iadko napakai sid tasantanid-tanid o bansa om suku bansa. Ikid bansa om suku, varo dau om dau dot adat, dot it ongoadat dino, amu enizo. Varo hal dot a-kavasa sid iso o bansa, topot kigunaan sid ulun vokon. Ong onsizon tokou i hal dit ongoadat dot onibak o pongoretan pengkaa dino:

It ongoadat mongorinding dit ongorombongan ko bansa om suku bansa sid dau dot koubasan om hoturan sampai manarang di rontob do kavasa. Ong sukul amu humambil it ulun ko kalandu ko kalandak sid rontob dino, atag apakai i kobuatano om tomodon dau. Kodung kalandu om karanggal, ohukuman-no iosido dit adat.

Ong umpamaon i hal dino, it adat iadko it rugi do davai di mangansal di kolobusan do karabau ko i kobebasan dot ulun sid dau om dau do razat. Nunu-nopo i gama sid rinuvang dit ansal dino, kavasa kavi iadko lumanjang i karabau sid rinuvang di kandang. Suvaiko kahid sid rugi om adamat-ogi, ko ong karanggal, ohukuman-no.

Ong i tokou ulun Kristian mamakai di pongoretan Etika om mangamung-po dot ETIKA DOT ULUN KRISTIAN, tanid o kohorotizan. Tu inot ongoadat dit ongobansa, it ongobansa kondiri o pengkakat om manantu. Topot ong i di tokou do hoturan om etika, inanu antad sid Kitab om hinatul-no do Kinoringan. Iti-no o sabap do vokon-no ong mangarait tokou di hal dot Etika Kristian ADAT VAGU, supaya atalahas i pitonidan om osodiri mantadko it ongoadat vokon. Kagi ong posuntuan tokou dit Adat Vagu dino do mamakai do pangalaman do riniba, inot adat dino mad parapad sid valai dot ulun, ko kokovidon sid tukad om sid bantaran dit mangajaga om tumabang dot ulun, minsanko it ulun dit amu opinit, supaya amu aratu iosido. Ong sukul kumavid sino, tantu varo kemumuzan om kopudan.

Sid ongoadat osusa it ulun do mongontupat dit ipat-ipat i rugi, supaya amu kotogu. Ong sukul kiakal iosido do peva dit ongorugi, varo kolombusan di dau om dau do kenginan. Ino-no rontob, vokon-no ong banalko ogumu it ongo-rugi. Iadko sid ongoulun do Yahudi diri, hiza di Tuhan Yesus, varo-no 666 poniagan om ponu-huan sampai opogos it ulun mongontupat, supaya amu karang-gal. Hal dot akanon varo, hal do sulung, varo om ogumu-po o vokon.

Ong i Adat Vagu, nga oruhai om onibak dara, sumuhut di panarangan di Yesus dot, *Nunu-nopo it ozi-kou dot gamaon dit ongoulun sid dikou, atag do gamao-no laid dikou sid dioti, tu ino-no i Taurat om i Kitab dit ongonabi.*

Varo nagama-ku laid do buuk dot opodok, i retan dot ADAT VAGU, bahagi keso do manarang do kuran di Kinoringan it Ama mongurug o mangahatul di koposizan om kavazao om gama do riniba antad di kinotimpuunani. Ino buuk dino amu songkuro om opirin-no vagu. Kagi harapon-ku do kadapat-po pamung sino i bahagi koduvo, ino-no i tudukan tokou biano, ino-no i ETIKA kananganko i hal do POLITIK om RAZAT om it ONGKOB-po.

Manjadi, ong nibakon-ku manarang do nunu i harati i pongoretan om kogunaan dot Etika sid di tokou, ino-no o vaza-ku manarang:

Ong i hal do kosipan, ino-no i vaza humarati om sumasi do Kinoringan om i gama do Kinoringan ponong sid riniba: ponong sid Minamangun om sid di Kristus om i Sundu do Kinoringan, ino-no i vaza di minongurug i Kinoringan di tokou om i vaza dau mogihim om monindal/manapul di tokou om pemumui sid dau sampai i gama dau potugas di tokou, supaya i tokou sisi dau sid tanga di vinangun.

Ong i Etika do Kristian, ino-no i vaza om gama tokou tumimpa sid gama om kenginan do Kinoringan. Tu i Kinoringan okonko baiko minongurug di riniba iadko momoi dau, ko mananom om manunda do kazu dot avantang (i kiguna), inoi nga varo harapan dau dot monguva i kazu dot avantang ot uva(Mat. 7,13-14) ko 1. Kor. 13 Antad sid samod do Kinoringan varo kolonuto di samod tokou dit aso kaabasan. Iadko i boros di Longoi Momogun: I samod do Kinoringan, nokorikot sid di tokou, i tokou nga manamodi, sumuhut di Tuhan.

Na ino vaza sumuhut di kenginan do Kinoringan okonko iadko bai undang-undang di manarang di rontob sid keso, koduvo, kotolu om i vokon, inoi nga sid saralom dit ipat-ipat laang, osusa it ulun humarati om monodiri om momili di sera om siombo om kuran i kenginan do Kinoringan, ontok didino ko i kodiri, supaya sumuhut it ulun dot arantang om atarang o ralan, siombo-nopo varo simpangan. Aso hoturan dot, kodung sid gibang, sid gibang-nopo.

Supaya kemumui it ulun Kristian, paharati dit Etika do Kristian di suvaiko sumokot sid gama om vaza om tudukan di Yesus Kristus di sid tanga do riniba diri om sid hoturan di karajaan do Kinoringan, it minongimbulai di Yesus Kristus diri om varo-no kemumuzan. Okonko ulun ko bansa ko raja o

monodiri om manantu dit atag o gama om kavazao, inoi nga kondiri di Yesus, it antad sid suhu do Kinoringan (Yah3,16) paharati om monodiri om manantu sampai mongonsi om mongorontob di kenginan do Kinoringan om i vaza sumuhut di kenginan dino. Sabap ino, iti-no iadko puun dit ETIKA do Kristian:

Baiko i Yesus Kristus, i nihabal om nisasi-no sid Kitab, ino-no it iso i boros dit a-milo-milo rumamit om mangasip sampai sumuhut tokou hiza di masi ko matai.

Ino Yesus Kristus, ino-no i kovosihan do Kinoringan ponong sid di kapangadaan di sokoviai i karaatan om kasalaan tokou, sampai najadi-no iosido do vaza do Kinoringan mongimuhun om posuhut di tokou sid kenginan dau. Notindal tokou-no antad sid kinuripanan di nunu-nopo songrogon om kuasa, mad nakalabus antad sid kandang dinot ongokuasa, supaya apasi tokou sid tinoguvangon do Kinoringan om kakaa tokou ponong sid karajaan om hoturan dau sid saralom di gama mongimbulai om posuntu di samod dau sid sokoviai it ongoulun.

Zabur 103: Nokotorima tokou di kavantango om kovosihan do Kinoringan, iri-ogi tumimpa tokou sid saralom di gama sumuhut om polombus di samod dau. Iadino sid Rom 12,1; Gal. 5,1; 1. Yahya 4,19; Zabur 1, Fil. 2,12-13; Gal. 5,25; Efes. 4,23; Gal. 2,20; Rom 14,7-9;

Suvai tumohiang om sumaap di hoturan dino, ajadi it ulun do pakakas do karaatan om kasalaan: Yahya 8,34: ipat-ipat it ulun di mangagama do sala, iosido-no ot uripon do kasalaan. It ulun di sumuhut di dau do ginavo (om guvas), nga mongimbulai di kouvaan di dau do kenginan, iadko nokosurat sid Gal. 5,19-22.

I kogumuai dit ongohal di narait sino, minsanko amu kavasa dara sid ongoadat, ong olimon ko isusut, amu ohukuman. Na i Paulus engin pemumui di tokou. Iti-no o sabap do varo boros dau dot atag dot ajadi tokou do pakakas do kabanaran do Kinoringan om mad uripon tokou di kabanaran dino. Tu isai-nopo i monimbaru do karaatan, iosido-no ot uripon do karaatan,ka dau Rom 6.

Om i Yesus minomoros sid Luk 6,46 sid ongoulun diri: Mongodim-kou dohon dot, O Tuhan, o Tuhan, ka dikou. Topot amu-kou sumuhut di boros-ku! Ino-no o kosondoto dinot ongoboros dino:

Suvaiko otopot do varo kosipan ong i kosipan dino kembulai sid gama sumuhut, tu i kazu dot avantang, monguva dot avantang ot urva.

Timai tokou ino sid kavazao om gama tokou sid tanga do razat om i hoturan

do pomogunan tokou. Ino vatas dino kogovit do **POLITIKS**. Na it pongoretan dit rumbul satu manarang dit atag sino, ino-no **KABANARAN**. Iti-no o sabap mogihim tokou laid sid Kitab di vaza humarati di pongoretan **KABANARAN** dino.

Nunu-ka o harati sid Kitab : KABANARAN?

Sid a-ko piro ot ayat tumarang i harati dino:

a) Ong arait sid Kitab i kasalaan di mad kasangai do karaatan, atalahas-no dot ino gama dino sumaap di kabanaran!

1.Yahya 1,9-2,1+6: misangai di kasalaan om karaatan. Baiko i Yesus ot abanal.

Na it ulun di sid tinoguvangon di Tuhan, sumuhut di kobuatano di Yesus(6).

Rom 6,12: Kadan-no dot i sala o raja di guvas dikou...

Rom 6,13: Kadan-no jumadi do pakakas do karaatan, ..gam jodizo-no do pakakas do kabanaran. 16: isai-nopo o patahakan di guvas dikou, tantu ajadi-kou-no dot uripon dau. Ong i kasalaan o patahakan, kosunggu-kou sid kapatazan. Ong obinsuhut-kou-no do Kinoringan, kosunggu-kou sid kabanaran. 18: nakalabus-kou-no sid kuasa do kasalaan om najadi-kou-no dot uripon di kabanaran.

19: i gulu minongimbulai di karaatan, ong biano, uripon-kou do kabanaran do pongimbulai di kosusian.

b) Kinoringan mongining om mongontupat, ong varo karaatan sid tanga do riniba!

Kinotimpunaan 4,10: Boros do Kinoringan sid di Kain: Nunu-ka o ginama-nu diri? Tu kinodim-oku di raha dit obpinai-nu antad sid tana.

Kinot.6,5: Nemot-no di Tuhan do gumazo-no i karaatan do riniba.. ko 6,11: i pomogunan dino nopusok-no do karaatan om guvail sid tinoguvangon do Kinoringan. Kinot.18,20: Banalko araat i gulunggong dit ongoulun do Sodom om Gomora.

Yehez.16,49-50 Ino-no i karaatan dit obpinai-nu Sodom. Amu minongontupat ioti dit ongomosikim om it ousiba o ngaran. Osumbung ioti om obingguvail sampai minonimbaru dit ongothal dit ikasana-ku. Sabap ino rinungoi-ku ioti.

c) Kinoringan posurut di kabanaran om katapatan

Kinot.4,9: Boros di Kinoringan sid di Kain: Siombo-no it obpinai-nu. Boros di Kain: Tau. A-ku elaan. Ioku-naku o mongontupat dit obpinai-ku? ka. Na

ino timpa di Kain, amu tumorima iosido di tugas dau do mongontupat om manamod dit obpinai (it riniba vokon), mad onsi banal di kenginan do Kinoringan.

Banal-no, engin i Kinoringan dot i tokou sokovia, momoros om mongusaha dot,

IOKU O MONGONTUPAT DIT OBPINAI-KU!

Yesaya 5,7: Boros di nabi Yesaya: Minonginud iosido (Kinoringan) do *kabanaran*, topot imatai-no biano, baiko *karaatan*. Minonginud iosido dit avantang o gama, topot biano ogulou-no ioti do mitipitu om mioodu.

d) Kinoringan mangahatul om posurut di kabanaran

Kolobusan 22,21-26: Kadan-no monusa ko mongorodsit dit ombuvoi... Kadan-no mangaladtak di bituanon om usan-usan. Ong aladtakan do sampai mongogizak ioti, iningon-ku i dolou om it ihad dioti dino sampai mongoloub-oku dioti sampai rodusan-ku om punsoon-ku ikou om pempuson-ku i savo om anganak dikou do bituanon om usan-usan. Ong paangkat-kou do siin sid ulun di mosikim sid simbol, kada-kou-no pokibunga ko mokisanda di kurilib dau..

Ulangan 15,4 Polobuso-no it obpinai-nu antad sid longon-nu, supaya aso mosikim sid pialatan dikou.. (7) kada-kou-no kodoot om kokodou do ginavo ong varo mosikim sid pialatan dikou do , (9) Apatut dot osukup o gama-nu manahak dau dot otomon o ginavo-nu. Sabap barakatan-ko do Kinoringan sid saralom di sokovia i gagamaon-nu.

Zabur 98,2 om 103,6 I Kinoringan mongimbulai di kabanaran sid tinoguvan-gon di sokovia it ongobansa.

Yesaya 1,17 Ihimo-no dikou i kabanaran.

Yesaya 41,10 I longon-ku do vanan o mangagazad pakansang dikau sid kabanaran (kamanangan).

Yes.42,3 It uripon di Tuhan pentalang di hukum do kabanaran sid sokovia.

Yeremia 7,5 Suvaiko simbanan dikou i kavazao om i kobuatano dikou di didino om mongimbulai-kou do kabanaran sid pialatan dikou. Amu-kou-no momogos dit ongoombuvoi om it usan-usan om it ongobitanon ko monguzapo do raha dit aso sala sid valai...

Amos 5,24 Ino-no o kenginan-ku, ka di Kinoringan, Kikabanaran-kou iadko momurulun o vaig om iadko vosoi dot osou.

Mikha 6,8 Nokentahan-no di Tuhan sid dikou i nunu-nopo it avantang om ombo it onggohan dau sid dikou, o ino-no: Posurut-kou do kabanaran om i gama misasamod, om soumul-umul-kou sid tinoguvan-gon do Kinoringan dot

osibak o ginavo dikou.

Rom 3,21 Ong biano nokembulai-no i kapamanaran do **Kinoringan** dot okonko i pinonuhuan o minongimbulai, iadko i niintahan-no laid sid pinonuhuan om sid ongonabi dot i **Kinoringan** o mamaanal dit ipat-ipat it ulun di mangasip sid di Yesus Kristus.

Rom 3,25-26 I kolonuto do **Kinoringan** pinosimozo di kasalaan di gulu, supaya kembulai i kapamanaran dau biano dot iosido-no ot abanal om iosido-no o mamanal dit isai-nopo i mangasip sid di Yesus.

e) I kabanaran do Kinoringan mongimbulai di kabanaran tokou

Rom 12,21 Kadan-ko-no mokitori do karaatan, inoi nga torio--no do kovosihan i karaatan. Rom 14,17 Sabap i karajaan do **Kinoringan** okonko hal do kakanan om kenuman, inoi nga kabanaran om kopioondusan om katamanan sid saralom di Sundu dot Osusi. Isai-nopo i mokikoburuo di Kristus do iadino, iosido-no ot ikozi do **Kinoringan** sampai oguna dot ulun.

2. Timotius 3,16-17 I nunu-nopo i nokosurat sid Kitab... kiguna do pakazon manarang di katapatan om monugat dit ongovudut om potolunung di golivong sampai mangagazad sid ralan do kabanaran.

Fil.1,11 Osukup banal sid dikou it uva do kabanaran it agama di Kristus, tu mamantug om mongindazou di **Kinoringan**.

Luk 1,74 I **Kinoringan** manahak sid di tokou do kolobusan antad sid palad dit ongosangod, supaya sumamba tokou sid dau ...sid saralom do kosusian om kabanaran sid tinoguvangon dau.

f) Kinoringan mongoguna di kabanaran dot ulun

Mat.5,6;10;20: Osinang-no it ulun di monombitil om tuliohon do kabanaran, sabap it ulun dino envizahan. (10) Osinang-no it ulun di kopuriman do kosusaan, sabap gima i kabanaran, sabap it ulun dino kasanganu di karajaan do surga. (20) Bang aso kabanaran dikou di lobipo abanal mantadko i kabanaran dit ulun do Farisi om it ongoulun dit elo do Kitab, tantu-tantu-ko amu-kou kosuvang sid karajaan do surga.

Mat. 6,33 Ihimo-no banal dikou i karajaan do **Kinoringan** om i kabanaran dau, tu ongiadino, itahak sid dikou it ongohal vokon.

Sid Mat. 19,30 sampai 20,16 monuriban i Yesus di kabanaran do **Kinoringan**: ino-no miurna dot ipat-ipat it ulun varo kosukupu di balanja dau bahagi dit ongkob dau do monumad kavi sid suvang dit ongkob dau. It ulun di bai pukul lima do minsosodop kadapat do ponsohorian tumorima di kosukupu miabal dit ulun dit asadapan ginumaji di minangakun di kosukupu di gama dau

sangadau.

Imatai sid vokon it ongoayat di manarang di kabanaran: Rom 5,21; 8,10; 1. Petrus 2,24; Yakub 1,20;3,18; Kentalangan 22,11.

Ong iadino i vaza di Kitab pohodtol di tomodon om kogunaan di kabanaran, kuran-no o vaza tokou humarati dino ong hiza tokou biano?

1. I Yesus mamakai di suriban di lalavangon/ ralan dot opiiit om it osongou. It osongou, sid kobinasaan o rikoton. Sori-no di kogumuai it ulun mamaanau. Iadko sid Mat. 2410: varot ogumu ot ongoulun di kasadu om miruruput sampai misasana, sabap ogumu it ongonabi dot ovudut mimbulai do mamalid di kinogumuan dot ulun. <kumurang i gama manamod, tu humali i gama pokih i pinonuhuan, ka. Kiroon-ku, Kristian om i vokon-po ot oboros sino. Tu sid Mat. 7,22-23 momoros i Yesus, Ogumu ot ulun momoros sid dohon dot, O Tuhan, o Tuhan okonka-ko ioku-no o minonuduk dit ongoulun di Habal do Kovosihan sampai minonunsub do rogon?.. na momoros-oku sid dioti di hiza dino, Pogidu-kou-no sid dohon, ot ulun di mangagama dot araat,ka. I harati, minsanko sid tanga do gorija varo mad mondou di kipakazan dot kulit do domba (7,15). Iti-no o sabap do manarang i Yesus sid Tudukan sid Burul diri dot ahatul o tomodon di kopolosizan om kogunaan dot ulun: **I gama tumahan di kasanaan. Ino-no:**

It atag o gama sid pialatan dot ondu om kusai om i minisavo,
i gama sumumpa,
i vaza tumoguvang di sangod
it amu mokimamaha ko mibitan
it atag o harapan
i gama monodiri di karaatan
om i vaza sumokod sid kovosihan do Kinoringan.

Na i sokovia i tudukan di Yesus, mad iso-no ot inantadon om kokoputan: Mat. 28,20 Hondono-no dikou dot, Ioku diti mozo-vozo dikou suvab-suvab sampai sid kovian do pomogunan.

Sabap i Yesus manansanganu om monguasa di sokovia i, i tokou Kristian nga iadko palad om hakod om kabang om dila di Yesus do tomod pavalang om posuntu di samod om kenginan om hoturan do Kinoringan sid tanga do razat om sid tanga dit onkob tokou kondiri.

Tiimai tokou monodiri do siombo it atag dot a-milo-milo posuntu om pasasi tokou sampai mongusaha di hoturan do Kinoringan!

ETIKA KANANGANKO SID POLITIKS

It ulun Kristian a-milo-milo nga monodiri dot ombo o kuasa o suhuton. Tu ong i Yesus o Tuhan tokou, a-kadapat tokou sumuhut do hoturan om kuasa di sumaap di Yesus. Sid Mat. 22 varot ulun di mamalid dara di Yesus sid gama mongoduat dot ombo i kuasa di dang Kinoringan om i dang porinta, tu minogihim ioti do vaza mongoruput di Yesus sid porinta, nga a-nokosulung i Yesus sid tavos dioti. Boros dioti diri, Kavasa-ka manahak do sukoi sid Kaisar,ka. Na it ambat di Yesus, Nunu-nopo i dang Kaisar, patahako-no dikou sid di Kaisar om nunu-nopo i dang Kinoringan, sid Kinoringan-no,ka dau. Dot sid hal diti, varo duvo o hal. Ino siin diri, tantu antad sid hoturan di Kaisar do monulung, supaya ong midagang it ulun, amu osusa it ulun di mongojuval do manuk, iganti do kumut, ko banat, amu osusa do mogihim di tukang jahit di pogontian do manuk. Inoi nga i manuk ijuval sid isai-nopo i dumagang ko midagang dot onsi ko manuk, tu kojuval-po om otorima-no i siin i dang Kaisar, kadapat-no dumagang do nunu-nopo, banat, ko soval. Topot, i porinta, tu aso pongonuvan do siin, tanid mantadko i sid razat, mokisukoi-no iosido, tu mogihim do kosukupu do mangahatul di pomogunan. Ong ino iadino atag, tu mongingruhai di gama migaganti do barang om mongopud sid pomogunan. Rontob-nopo, sinod siin di pinakai dioti diri di nipemot di Yesus, varo surat dot i Kaisar, i sanganu di siin dino, nga anak do Minamangun. Iti-no o sabap do varo boros di Yesus, Patahako-no dikou sid Kinoringan i nunu-nopo i dang Kinoringan, ino-no i hormat dot iosido o Minamangun, okonko i kaisar ko it ama dau. Manjadi sinod gama mongoguna di porinta dit isai-nopo, monodiri tokou di gama mongoguna do Kinoringan om it ongokuasa vokon, supaya atag i gama tokou mongohormat om mongoguna do Kinoringan om iri-ogi i kuasa dit antad sid Kinoringan kikuasa do mangahatul do pomogunan.

Na mamasa tokou vagu sid di Paulus sid Rom 13 do mad tanid i boros dau sino dino. " I gama mongoguna di porinta", ka sino. Boros di Paulus, Atag-no dot ipat-ipat it ulun sumuhut dit ongoulun di kikuasa sid pomogunan dau. Tu aso kuasa ong okonko antad sid Kinoringan. Sabap ino, isai-nopo i sumaap di kuasa dino, mangaranggal iosido do hoturan do Kinoringan. Na atag do mamasa tokou dino fasal pengavi, supaya karamit banal di harati dino. Tu hiza di katalib, varo om varo manafsir, retan, Ong iadino, ino raja ko kaisar ko nunu-nopo songporinta kikuasa do mamatai dot ulun ko mongohukum isuhut di kenginan dau. dot ong otopot, ino kuasa dau dino, dit antad sid kuasa do Kinoringan, bai nitahak sid dau, supaya iosido o tanggung jawab sid

tugas dau dino. Iosido okonko kikuasa kondiri. Bai nipataud sid dau i pomogunan om i razat do tomod mongohukum dit ulun di rumanggal dit hoturan ponong sid ulun vokon o tomodon, iadko it abanakau, i mangarampas, i monipu, i mamatai om nunu-nopo it gama dit amu atag. Minsanko ulun labus dit a-kopirongou di pinonuhuan dit antad sid di Musa, nga varo laid sid pialatan do riniba it a-ko piro ot undang-undang di manarang omba it atag om amu sid pialatan dot ulun. Ong tumiim tokou manarang do kuran dit Ongomomogun kodori minangahatul di razat, varo-no dot amu kavasa mamatai ko kumiagai ko manakau ko mongorongoi di ngaran do koruhang om i iadino... Na boros di Paulus, iti kavi diti, tugas di porinta, supaya aso karaatan sid suvang do pomogunan. Iosido mongontupat, supaya amu oholian i karaatan, sampai isai-nopo i monimbaru do karaatan, ino-no ot asala om ohukum. Sabap iadino i tugas di porinta, suvai varoko balanja dau do mongusaha di gama dino do mangagaji iosido do mata-mata om ongohakim om onpagawai dot i pongonuvan do gaji dino antad sid sukoi dit ongoulun.

Bai iadino i rontob di kuasa di porinta, ponong sid katagan do pomogunan om it avantang o hoturan. Ong sukul iadino i hoturan, atag do mongoguna di porinta. Topot ong i gama do porinta kondiri mad araat, momogos iosido dit razat, ko mongimbulai iosido do kopioduhan ko moniim iosido do gumanti do Kinoringan, retanko iosido kondiri mad Kinoringan dot a-milo-milo it ulun osusa sumamba sid porinta, Kaisar ko raja, ko President sampai mamakai iosido di kuasa dau sid gama monusa om "momorinta" iadko i British diri di nokorikot sitid Sabah, retanko i tana do Sabah dang Raja sid London, tantu amu onong i gama di iadino sampai atag dot amu tumorima di hoturan di iadino. Banal-no, i hiza di nokorikot it British diri, isai katama sumaap, tu ioti kibajil om kisenapang dot it ulun siti, bai bilok om dangol o varo sampai amu elaan dit ulun siti do miupakat do monunsub di British diri. Kagi ioti minongoi-po dot ulun vokon di pinamaju di pomogunan do Sabah, supaya varo hasil dit kadapat mangatod sid England. Ong bianco, tantu amu mangakun it ulun do Sabah do varo mangarampas di pomogunan.

Manjadi i tokou Kristian mongontupat do kuran i hoturan do pomogunan, isuhut dit atag o gama mangagazad om mangahatul dot ulun dot aso gama momeda dot ulun dot monulung dit iso o suku om pemozoon i suku vokon ko pamaju dit iso suku do razat om mongimvagas di vokon. Supaya ahatul ino gama dino, dot i tokou o pomogunan kagi retanko Demokrasi, -ino-no: it razat do Malaysia momili dit ongomangahatul, - i tokou mamung sid gama momili

dit ongomangahatul om moniim tokou dot ulun Kristian nga nakamung sid mangahatul dino, supaya ioti kumavid di hoturan do pomogunan isuhut di kenginan om etika do Kristian. Manjadi ong osomok miundi, atag do mongitung it ongoulun Kristian dot isai it avantang mongontok dit ulun Kristian sid hoturan do pomogunan. Atag do monodiri banal di tomodon dit ulun di mokicalon, ombo i ginavo dau, posurut di hoturan do Kinoringan sid suvang do pomogunan ko bai mokipangkat om moki-YB iosido. Sid gama di iadino atag do miupakat-po dit ongoanggota do Kristian sid ongorija vokon. Ino iadino okonko harati, pengkakat do parti Kristian iadko varo parti Islam, inoi nga mogihim di kavantango om kabanaran sid pomogunan dot amu monodiri do ngaran Kristian ko Silam ko nunu-nopo songugama, ong sukul i kabanaran o tomodon... tu okonko i ngaran do parti o kiguna, inoi nga i tomodon do pengkakat dot ulion om it ongomangahatul do pomogunan. Sorid Europa varo a-ko piro o parti i retanko Kristian, dot ongo otopot, parti dit ongolumundu ioti. I gama dioti mangahatul, bai ngaran o gama posurut di kabanaran, inoi nga i kolunduo o posuruton dioti om i vaza momorinta om mokihuntung sid ongopomogunan sid gama mongojuval di kogumuai do pakakas do rumpak. Alaid-nopo it ongokristian sori ponong minongitung-no dot amu atag do dumahava di gama di iadino, retanko, i Paulus minoniag di gama sumaap di porinta. Sid 80-han om nokotimpun it ulun Kristian do sumaap di gama di porinta di iadino sampai tigogi, i gama miduw it ongo-kuasa dit agazo, Amerika om Russia, nengkod-no, i hoturan do Komunist, nga nahaba-no, gam bianco, a-kavasa sid Russia do varo parti komunist. Iti iaditi antad sid gama minta dua om monoro do porinta sampai moniag di porinta do lumombus posurut do pengkakat di kogumuai do pakakas do rumpak. Na sid hal dino, amu-po miuna it upakat dit ongokristian songpomogunan, nga omogot, tu nokotimpun-no do miupakat om mumbongut dit ongokalamahan di siombo-nopo: ino-no, i hal do kabanaran, i hal do kopioondusan om i vaza potiru di vinangun, supaya amu sumurut i riniba do mamanit di barat om i vaig om mongorongoi dit ongohimbaan om mangavi di kosukupan do pomogunan, iadko it umau tana ko i nunu-nopo.

Iti hal diti, bai iso o kuasa dit atag dot porisaon om impurason, supaya amu kalandu tokou sid gama sumamba di kuasa tanid mantadko i kuasa do Kinoringan.

Na varo-pot ongo kuasa vokon di mogihim do momorinta di tokou. Kiroon-ku pengavi diurus diti amu-po mogihim om manantu om manarang dit ongo-kuasa di milavan do momorinta di tokou. Na tumiim-oku do tumoguvang dit

iso-po o kuasa di mad rogon moniim do mumpalad om monguasa di tokou. Ino-no i kuasa dino:

I SIIN om i vaza dau monguasa di tokou.

I siin banalko akasang monguasa dot ulun, tu kodung kisiin, ogumu o kogunaan. Kodung aso siin, banalko aso kuasa. Iti-no o sabap dot atag do varo Etika kananganko i vaza mamakai do siin. Tu siin poulau dot ulun om i siin mangatag om posinang dot ulun. I harati, i vaza mamakai do siin o monodiri dot ponong sid kavantango i kogunaan do siin antava ponong sid korungazan dot ulun. Ong i siin kondiri, araat amu, avantang amu. I vaza mamakai mongimbulai di kavantango om i korumaato. Boros laid dit ulun Rumi, asot avau ong i siin. Topot minsanko ino pamarasan dino, varo duvo o harati. Ino-no sid nalad do siin, karatas ko linsahan, amu kembulai dot i siin dino tinakau antava nakadapat it ulun di mamakai dit umos dau sid gama monimbaru di siin. Manjadi sid vaza-ku mamakai di siin kembulai do kiguna i siin ko aso guna. Vokon-no ong varot ulun di mintikam ko dumagang sid loterai, tu retanko oruhai kadapat di kogumuai do siin, dot ong otopot, bai mangavi dit okudik i siin di varo. Tu ong sid mintikam, bai iso ot kokohuntungan, ino-no i mangahatul di mntikam. Ko i loterai, duvo ot agazo o kohuntungan, ino-no i porinta, tu iso pitoluvon o sukoi sid porinta, om iso pitoluvan o dang i sanganu di loterei. I nobi bahagi it a-ko piro it ulun di kadapat do hinotusan ko rinibuvan om linasaan. Topot i kogumuai baiko mamarai di sukoi do porinta om kohuntungan dit a-ko piro it ulun. Ong iso ot ulun kadapat sid loterei dot 10 ribu, varo tolu nopod ribu ot ulun di minamarai do tosoringgit-ringgit, supaya kembulai 10 ribu bahagi dit iso it ulun. Minsanko iadino, ogumu ot ulun mangada di siin dau sino, tu mokimamanang inot dino 10 ribu. Ogumu it ongokina, hiza di toun baru mangavi di valai om savo om kabun dau sid gama mintikam, tazonko kadapat do siin.

Vokon-no ong kadapat it ulun do siin, mangavi di siin dino dot okonko etung laid ombo it atag timboruon. Hiza do varo Amanah Raya, vokon-no ong sid inumon mangavi, sukul insan-po dot osinang, tu avuk-no. Vokon-no ong bai radio o dagangan ko TV om vokon-no ong hal dit okonko mongopud dit onkob, tu baiko momoi, bai hal miabal sid koruhang. Tu ong ki-TV i simbol, osuhul ong ioku nga TV, ka di pongitungan dot ulun. Andaman-ku it iso it ulun sid Merebau. Diomagang iosido do radio, kodung kisiin iosido antad sid parai dau. Nokouli-po iosido sid valai om dinumarun-no, odoruman-no i radio sampai orungoi-no, tu minoniri i taap. Suvaiko norungoi-no i radio

om andaman-ogi dau dot atag dara ong mangatag di taap.

Ong nakarait i hal do TV, osuhul dot varot a-ko piro o linsou do boros kananganko i vaza mamakai do TV. Tu mad siombo-nopo, varo TV ong biano sampai minsanko i TV mad jumadi do rogon di momorinta di tokou, vokon-no ong bai it anganak, vokon-no songongkob, tu asadapan om sampai tanga sodop mongouni om mamananau i TV. Sid saralom do tolu jaham i TV mamananau, varo labaan do tanga jaham do bai Dunhill om Rothmann om i iadino di mongonsug do dumagang do jaham om amas om kurita om sigaret, vokon-no ong sabun ko kumut ko umau dot ovongi ot tomodon. Ino hiza kavi mad nakada-no, antava i TV manakau di hiza tokou. Ong varo boros dit Ongomanaud do Puruvan, dot banalko asampit ioti, tu ogumu o gama, duaton-ku do piro o masa navi-no sid tinoguvangon do TV, di iadko sumamba sid TV? Mad nolingan it ongoulun dot varo papakas do pomizau do TV om varo-popakas do pamatai di TV. Avantang ong mongining om memot tokou di Berita Dunia om vokon varo program di kiguna. Topot ogumu o hal do tayangan om vokon, atandas do mipatai, mirurumpak, miaagai om i iadino, okonko hal do kiguna, aso guna sid ongosukod om lobipo aso guna sid anganak. Ong it ongokomiks okonko atandas aso guna. Topot suvai monodiri dot okonko mongorongoi di hiza tokou om hiza dit anganak sid gama povongo di Daud om i Hunter om i iadino. Ong humarati tokou di Habal, iadko kosodop dot i Rabin sid Israel najadi do Ketua Menteri sampai moniim iosido do sumamung dit ulion do Sur om Libanon om Yordania om Masir do kumiandus o tomodon, avantang dot elaan tokou, supaya minsan i tokou siti ponong kadapat minta dua bahagi di gama dau mokiandus, mamung sid gama dit ulun vokon minta dua bahagi di kopioondusan sid Palestina om Israel. Na kakali kiroon-ku ogumu o hiza dot ongomomogun biano porosuma sid gama sumamba sid TV sampai i TV mad kuasa di moniim do momorinta dit ongoongkob do Momogun.

Insan-po dino, i siin di mad rogon oruhai o gama dau mamalid di tokou, lobipo i siin dit okonko i tokou o sanganu, di bai nipataud sid palad tokou. Iadko i persembaan ko rukut. Kokiraai, varo siin di iadino sid palad-ku ko ambit-ku, tigogi, varot orongou-ku do varo barang dot omura, kumut ko pakakas om vokon, ino-no barang dit avantang dara ong varo, topot okonko barang dit osusa ong aso. Sabap, tu omura o ngaran, dumagang-oku do mangkat ko humambil sid siin do gorija ko i siin di dang koruhang antava siin di dang porinta. Ong sid porinta, kodung varo karani di minamakai di siin do

porinta, ong kodung kembulai, osunsub iosido sid tugas dau sampai ohukuman-no iosido. Ong i siin do dang koruhang, timbangon di koruhang. Ong i siin do PCS, kuran ino?

I hiza di nakatalib sid Sabah, varo koubasan dit ongomangahatul do pomogunan, ong kodung nakadapat do projekt om bantuan, ogumu i siin dino amu napakai sid projek, inoi nga tinumagak sid ambit dit ongoulun. Ino hal di iadino retanko korapsi. Iti-no o sabap dot i Porinta pengkakat do AJK do Korapsi di mongimpuras supaya engkod ino hal di iadino. Rontob-nopo, banalko apagon do moniag dot asu monila dit ongomumuk sid sahau do meja. Siti diti i tokou ulun Kristian atag dot sid nunu-nopo o gama makan suap, mangapil, milang sid projekt om nunu-nopo o gama di iadino, kadan-no gumavul. I siin oruhai mamalid di tokou.

ETIKA DO KRISTIAN PONONG SID ONGKOB

ONGKOB ko sirang o harati, it ongominisavo om it anganak dioti dino. Na varo panarangan sid penggembalaan kananganko it ongkob do Kristian di mad sikul do kosipan, tu sid molohing rumamit it anak di kosipan om it atag i gama di molohing misasamod om mitutulung, mioopud-opud om mirururururur sampai miizo sid tinoguvangon do Kinoringan. Na i kopihatan dot ongkob it ulun o boroson, okonko i paku di valai ko i rinuvangan do valai, inoi nga antad sid atag o gama musavo.

Ino vaza musavo - manansavo om mokisavo, ong sid Kristian banalko tanid o harati antad di kodori-po. I diri-po varo harati do iadko midagang dot ondu, duvo o turunan miupakat, topot ong i kusai om it ondu baiko ombo-ko it ongo-sukod. Kodung sumukod it anak vagu, miringkozou ko amu mikotoron iosido, iri-ogi humago i molohing do mongitung di sovoon dau. Kamaman om kominan tumabang sid gama dino. Varo laid ogumu ot adat om undang-undang. Topot ino duvo it ulun dino di pisovoon, a-nakamung sid gama miupakat om mihukum sampai a-nokelo di kapangaan. Lobipo ong i hal do samod om misamod, miginavo amu kembulai sid pongitungan dit upakat. Sukul opongo it upakat dit ongosukod, opongo-no, kopisavo-no. Kagi sid gama momili di sovoon, ogumu o pongitungan kembulai, hal do kolunduo, hal di garal dot ongkob dau, livotung ko mosikim om i iadino, i kogozoo do buru om kogumuai do dapu. Iri-ogi kopibalud di kusai om it ondu, dot a-elaan dioti do kuran om kumuro.

Ong bianco, it ongosukod vagu kondiri, hiza di nopongo-no i sikul om nokemot-no do ponsohorian, i harati nosukod-no banal, otuo-no it utok, elo-no mongitung om mangarancang di kosurutan di koposizan dioti, momili om mongubas di kenginan dioti sampai mitoguvang ioti dino kumiupakat di katagan om kengkakatan dot ongakob. Sabap sompi Kristian ioti, ulun di nakamung sid Belia, sampai nokosikul om oubas-no sid asrama, kopiharati-no it ulun di mad kopionong sid kondiri. Sid gama miubas sid tanga do piumpugan do Kristian om otunda-po dit ongobpinai om varis, varo mad nokopionong do puvalazan om iseso o panangan, tu antad sid Habal do Kovosihan di monuduk dit atag o gama miopud sid piniizaan do misavo, o gama dioti mokibabaal dit ongakob dau.

Na i boros di Paulus sid Galatia 6,2: Mitutulung-tulung-kou-no mamabo dot avagat, ka, lobipo ong sid ongominisavo. Hiza do mogontong, ino tanda om kososizan do misavo sid tinoguvangon do piumpugan dot ulun Kristian, abarakatan-po do Kinoringan, varot atag o gama mongimbulai di piniizaan do misavo om ongakob. Amu-no osusa do rumuzod-po sid molohing dit ondu, tu mokituduk di gama mananom om mutagad, ko it ondu misisingilo-po magazau om kuran tumorima di kusai, ioti miduvo dino sumodiri om posuntu di piniizaan dit nahatul-no laid do Kinoringan hiza di kinurugan, tu i riniba, suvaiko it ondu om kusai om opud-ogi. Mitanid banal di gulu, bianco osodiri-no banal i tugas dit ondu om i di kusai, ino gama mitutulung apakai sid nunu-nopo songgamaon. Ombo it ahakang, kumavid di puun do kazu om it okugui, nga sid untu o kovidan...

Humarati ioti miduvo dino di kogunaan om tomodon midududun, dot ino dino okonko antad sid kozian di kusai di polinggata dit ondu do sera-nopo i kenginan dau, inoi nga minsanko sid kopiluzungan miupakat om mizo dot antad sid agazo o koginavaan om samod sid koruhang do popurimon dau di kogozoo di samod dau do tomodon. Iti-no o sabap dot i kusai mongitung di korukungo ko kosusao di savo dau om it ondu nga iadino, tu mongitung di kuran sompiosinang ioti miduvo dino.

Iri-ogi ong varot anak, sinod anganak dino sompi kitugas do momiara, mipasi, miopud, miira om mituduk do bahazan om it avantang o kavazao. Suvaiko atag ot upakat di molohing, dot okonko it ivanon ko i kominan antava isai-nopo i koruhang om anggai-anggai laid o mangasau, gamko isurut-no banal mangahatul it ongakob dau di gumazo-no, tu kianak-no. Tu kodung kianak-no, banalko tanid it ongakob om nosimbanan-no i tugas om i kopurima-

nan dit ulun. Antad dot opodok-po it anak, it anak rumamit sid molohing di samod dioti om i vaza dioti mongohornat do Kinoringan om sumuhut di hoturan do Kitab sampai mongoguna om monulung dit ulun vokon. Minsanko ragang-po it anak, soumul memot di gama di molohing om tumimpuun-no sumusui, mamung-no manangamin, tumuku-no iosido ong emot dot i molohing minta dua do muku-tuku o gama minta dua. Sumurut i pongohorotizan dit anak sampai tumimpuun-no do monginsosok om mongoduat do monguro i molohing om it ulun vokon. Sid gama tumimpa sid anak, manarang it idi om it ama di kosipan, isuhut di keloo om kadapato dit anak. Ong varo molohing di banalko aso kotibangan ko malan mambat dit oholian oduat om insosok it anak, amu songkuro, tumompik it anak sid ulun vokon sampai it ulun dino ajadi do harapan dit anak. Iri-ogi it anak sid ongekob dino iadko pokoombuvoi, tu mingkod-no iosido humarap om sumokot sid molohing dau.

Ino pongoretan do molohing, ino-no o harati, it ulun di guluko it anak. Iti-no o sabap do suvaiko atag o gama tokou mangagazad dit anganak, iri-ogi it anak sumusut sid ihud tokou sid vazaan om ralan tokou. Sid avantang o suntuan di molohing sumurut i keloo om kobuatano sampai i bahazan dit anak.

POGIHIMAN

I. Tudukan do Kosipan dot ulun Kristian	3
II Dogmatiks	29
Bahagi I	30
Bahagi II	40
Bahagi III	51
Bahagi IV	65
Bahagi V	82
Bahagi VI	86
III Etika dot Ulun Kristian	99
Umpatod	99
Bahagi keso: It Adat ponong sid Kinoringan	106
A: Sid tinoguvangon do Kinoringan	107
Adau do Pongintaranan	107
Sumasi do Kinoringan	110
Minta dua	113
B: sid tinoguvangon dot ulun	116
Ondu om kusai	117
Molohing om anganak	123
It ulun dot osomok om osodu	125
It ulun om i koposizan dau	127
Mongoguna do koposizan	127
C: Adat antad sid hoturan di Kristus	132
I harati KABANARAN	136
Etika do Politik	140
Etika do ponong sid ongkob	145
Poghihiman	148